

## Tuhun vaha nacahyí Lucas sahá Jesucristo

*Ndicani Lucas ndavaha nacahyí da tuhun yóho*

<sup>1</sup> Sa xini vahún, Teófilo ña sa cuahá ñayivi ndúcú na cahyí na tá cáa tá iin ña nayaha tañu nde. <sup>2</sup> Ta najánaha na nuú nde tóco ndihi ña naxini na janda mé saha. Mé na yóho cúu ná na naxica nuu nacahan na tuhun vaha saha Jesús nuú ñayivi. <sup>3</sup> Ta cúní ri yehe va cahyí i ña jáchi cuéé cuéé nandaca tuhún i ndaja cáa anda mé saha já ná cuu cahyí vií ndihi i ña nu mún, Teófilo, da quihvi ndivaha ini i. <sup>4</sup> Jáchi cúní ña ná candaa vaha inún ndaja cáa ña ndaa ña najánaha na nuun.

*Cáxi tuhun in táto Ndióxi ña cacu Juan, da jácandúta ñayivi*

<sup>5</sup> Mé tiempo cán nasacuu Herodes rey nuú na Judea. Ta nasahjin in da cúu jutú naní Zacarías. Ta nasacuu da cuénta in táhnda jutú naní Abías. Ta ñájíhí da naní ña Elisabet, ná naquixi chichi Aarón, da nasacuu jutú sanahá. <sup>6</sup> Mé Zacarías yóho xihin ñájíhí da nasacuu na ñayivi naxica ndaa nu Ndióxi. Ta xihin ndinuhu ini na nacaja na ña sáhnda Ndióxi nuú tuhun mé á caja na. Ta ni in túhún toho ñayivi coó nacuu ñehe iní na cahan núu na saha ná. <sup>7</sup> Joo coó toho jahyi na nacacu jáchi coó nacuu canduu jahyi Elisabet cán. Ta mé tiempo já sa nacayatá ndivaha ndíví na.

<sup>8</sup> Ta ndaja coo in quivi nanditahan nuú mé táhnda jutú xica xihin Zacarías cán caja chúun na cuénta Ndióxi. <sup>9</sup> Tóco ndihi jutú cán nasajíquí na ndá da ná quee vaha ta da cán cacuu da quihvi chiníhmá ini veñuhu cáhnu ndácaan ñuu Jerusalén cán. Ta naquee vaha Zacarías.

<sup>10</sup> Ta nani chíníh<sup>má</sup> Zacarías cán ini veñ<sup>u</sup>hu já nanditútú ñayivi ndúu na yéhe ñ<sup>u</sup>hu cán ndícahán na Ndióxi. <sup>11</sup> Ta nani chíníh<sup>má</sup> Zacarías nu ná<sup>a</sup> cán ndácaan da já na<sup>a</sup> canáha in táto Ndióxi nu dá cándichi a xoo cuáha nu ná<sup>a</sup> nu chíníh<sup>má</sup> da cán. <sup>12</sup> Tá naxini Zacarías táto Ndióxi cán, nayihví ndivaha da ta ni co xini da ndí<sup>a</sup> caja da. <sup>13</sup> Joo nandicahan táto Ndióxi cán xihin dá já nacachi a já:

—A yíhví tohún, Zacarías jáchi sa naxini joh<sup>o</sup> Ndióxi nuú naxica tahvún nu á. Sahá ñ<sup>a</sup> cán quea caja mé á ñ<sup>a</sup> ná cacu in jahyi Elisabet, ñájíhún. Ta cacún quiví dá cananí da Juan. <sup>14</sup> A juú quiahva cavatún ta cajii inún caja taa loho jan tá ná cacu da. Ta cuahá ga java na cajii íní na caja da tá ná cacu da. <sup>15</sup> Jáchi da cáhnu cacuu jahyún jan nu Ndióxi. A cóho da ni in túhún toho dó xíhi ñayivi xini na xihin. Ta cacuu da in da jándicutú ndaa Ndióxi xihin ínima yii mé á janda tá cámaní cacu da. <sup>16</sup> Ta mé jahyún jan caja da ñ<sup>a</sup> ná ndicó coo cuahá na Israel nu Ndióxi, xitoho na. <sup>17</sup> Ta jihna ñúhú mé Juan cuhun da caja tiahva da ñayivi janda ná quixi mé á chindahá Ndióxi. Tá quiahva nandicutú ndaa ínima profeta Elías xihin ínima yii Ndióxi quiahva já ndicutú ndaa ínima Juan xihin á já ná coo ndée dá caja da ñaha tátuhun nacaja Elías. Ta caja mé Juan ñ<sup>a</sup> ná ndique táhan mání ñayivi xihín jahyi na. Ta caja da ñ<sup>a</sup> ná coo joh<sup>o</sup> ñayivi sáá ini já ná caja na ñ<sup>a</sup> cúní Ndióxi. Quiahva já caja da cacu tiahva da ñayivi janda quiahva ná xinú quiví quixi da nasahan Ndióxi tuhun a chindahá a —nacachi táto Ndióxi cán xihin Zacarías.

<sup>18</sup> Anda já nandaca tuhún Zacarías cán táto Ndióxi já nacachi da já xihin á:

—Ndaja caja i candaa ini i á mé a ndaa táhyí coo tá iin cáchún coo jáchi sa nacayatá ndivaha i ta quiahva já nacayatá ri ñájíhí vi —nacachi Zacarías cán.

<sup>19</sup> Anda já nanducú ñehe táto Ndióxi cán tuhun nu dá já cáchí a já xihin dá:

—Yehe cúú Gabriel ta chuun Ndióxi xíca nuu i cája i. Mé a cán nachindahá yehe ña ná quixi i caxi tuhun i ña yóho xuhun. <sup>20</sup> Joo viti sahá ña coó nacandúsún ña nacachi i xuhun candoo nihun ña ná a cúu cahun janda quiahva ná xinu quivi cacu jahyún. Sa vaxi quivi coo tá ín nacachi i xuhun coo —nacachi táto Ndióxi cán xihin dá.

<sup>21</sup> Joo ndaja coo ñayivi ndíta ndáti yéhe ñuhu cán sa nacasáhá ndíhi ini na sahá ña sa nacannahá ta coó Zacarías cán quéta jata véhe. <sup>22</sup> Joo tá naqueta Zacarías veñuhu coo nacuu cahán da ni in túhún tuhun xihin ná. Xihín ña yóho nacandañ ini na ña naxini da in ñaha nacaja Ndióxi nu náa yii mé á cán. Jandá ndáha uun da cúu nuú na cán jáchi nacandoo nihí dá.

<sup>23</sup> Ta tá sa najáxinu Zacarías quivi cája chúun da veñuhu cán já naquee da cuanúhu dá vehe da. <sup>24</sup> Tá sa nayaha ña yóho já naquee jahyi Elisabet, ñájíhi Zacarías cán. Ta tíxi uhun yoo coo naquee ña caca nuu ña. Ta nacahán ña: <sup>25</sup> “Nacaja Ndióxi ña yóho xihín i viti já ná a cándehé ndaa nahá ga ñayivi yehe”, nacahán ña.

### *Cáxi tuhun táto Ndióxi xihin María ña cacu Jesús*

<sup>26</sup> Tá naxinu iñu yoo ñuhu jahyi Elisabet cán já nachindahá Ndióxi mé Gabriel, táto mé á in ñuu naní Nazaret ndacaan estado Galilea. <sup>27</sup> Nasahan táto Ndióxi yóho Nazaret naxito nihni a in ña tacú naní María, ña natiin tuhun in da naní José ña ná tandaha ña xihin dá. Mé José yóho naquixi da chichi David, da nasacomí cuénta sahá ñayivi Israel sanahá. <sup>28</sup> Nandihvi táto Ndióxi cán nu ín ña ta já nacachi a já xihin ña:

—Cahan Ndióxi yehe xuhun, María jáchi cúun in ña nañehe táhvi nu Ndióxi. Ín Ndióxi xuhun ta nacaja

cuaha chága ñamani xuhun a juú ga xihín java ga najihí —ñacachi tátō Ndióxi cán xihín ña.

<sup>29</sup> Joo tá ñaxini María tátō Ndióxi cán já ñacatóntó ña táa johō ñá ña cáhan mé a cán xihín ña. “Ta ndá cuéntá queá cáhan tátō Ndióxi yóho já xihín yo”, ñacahán ña.

<sup>30</sup> Anda já ñacachi tátō Ndióxi cán já xihín ña:

—A yíhví tohún, María jáchi cúun in ña ñañehe táhvi nu Ndióxi. <sup>31</sup> Ta viti quee jahyún ta tá sa ñacacu a já cacún quivi á ná cananí a Jesús. <sup>32</sup> Mé jahyún jan cacuu a ña cáhnu. Ta cachi ñayivi saha dá ña cacuu da in túhún jini já jahyi Ndióxi, mé á cáhnu nu ndíhi a. Ta mé Ndióxi, xitoho í caja ña ná cacomí jahyún cuéntá sahá ñayivi tá quiahva ñasacomí David, da cúú tásáhnu jícó da cuéntá sahá ñayivi. <sup>33</sup> Quixi da cacomí da cuéntá sahá ñayivi Israel ta anda ama cáa quivi cacomí da cuéntá saha ná —ñacachi tátō Ndióxi cán xihín María.

<sup>34</sup> Anda já ñandaca tuhún María tátō Ndióxi cán já cáchí ña já xihín á:

—Ndaja coo cacu jahyi i ta ni in túhún toho ña co ín xihín i —ñacachi ñá xihín á.

<sup>35</sup> Anda já ñanducú ñehe tátō Ndióxi cán tuhun nu ñá já cáchí a já:

—Ínima yii Ndióxi queá quixi jándicutú yohó. Ta ndée Ndióxi, mé á cáhnu nu ndíhi a cán cava nuu a yohó tátuhun caja in vico. Saha ña cán queá tá ná cacu jahyún jan cacuu da in da yii ñacaxi Ndióxi caja chúun nu mé á. Ta cachi ñayivi saha dá ña cúú dá in túhún jini já jahyi Ndióxi. <sup>36</sup> Ta cáxi tuhun i xuhun ña cacu jahyi Elisabet, ña cúú táhún cán vatí sa ñacayatá ña. Ta viti sa ñaxinu iñu yoo ñúhu jahyi ñá, mé ñá ñacachi ñayivi saha ña a cúú coo jahyi ñá. <sup>37</sup> Jáchi Ndióxi cuu caja tóco ndíhi ñaha —ñacachi tátō Ndióxi cán xihín María.

<sup>38</sup> Anda já ñacachi María já:

—Ndióxi cúu xitoho i ta ná caja mé á tá quiahva cúni a xihín i. Ná coo tá ín cáchi ndó coo.

Tá nandihí nacachi María cán ña yóho já naquee táto Ndióxi cán cuahan.

*Xíto nihni María Elisabet, ña cúu táhan ña*

<sup>39</sup> Ta mé tañu quivi já já xínu María nasahan ña in ñuu ndacaan chí yucu cuénta Judea cán. <sup>40</sup> Ta tá naquihvi ña vehe Zacarías, yí Elisabet cán já nacahan Ndióxi ña xihín Elisabet. <sup>41</sup> Ta tá naxini johó Elisabet nacahan Ndióxi María xihín ña chí nacandita ña loho ndacaan tixi Elisabet cán chí ivi laá nandicutú ndaa ña xihín ínima yii Ndióxi. <sup>42</sup> Anda já nacayuhú cóhó Elisabet já nacachi ña já xihín María:

—Ni in túhún toho najihí cóo nacaja máni Ndióxi xihín tá quiahva nacaja máni á yohó. Ta nacaja yii mé á jahyún. <sup>43</sup> Ta cóo saha toho yehe ná quisún yóho, ña cúu náná xitoho i coto nihnún yehe. <sup>44</sup> Jáchi tá naxini johó uun i ña nacahan Ndiósun xihín i ivi laá nacanda jahyi i ini tixi i jáchi nacajii íní a. <sup>45</sup> Tahví nacuún jáchi nacandúsún ña nacachi Ndióxi, xitoho í xuhun. Jáchi caja tá caja mé á ña nacachi a caja —nacachi Elisabet cán xihín María.

<sup>46</sup> Anda já nacachi María já:

Cája cáhnu i Ndióxi, xitoho í xihín ínima i.

<sup>47</sup> Ta cájii ndivaha ini i xihín ña cája Ndióxi, mé a jácacu yehe.

<sup>48</sup> Jáchi nandicuhun ini a sahá yehe, ña ndáhví, ña cúu in mozo mé á.

Ta cachi ñayivi ndúu viti xihín na vaxi quivi canduu ñuyivi yóho ña nacaja cuaha Ndióxi ñamaní xihín i.

<sup>49</sup> Jáchi mé Ndióxi, mé a cuu caja tóco ndihí ñaha nacaja cuahá ña náhnu xihín i.

Ta yii ndivaha quivi mé á.

50 Ta níi tiempo táhvi ini mé á saha tóco ndihi ñayivi, na cája cáhnu mé á.

51 A juú quiahva náhnu ñaha nacaja mé á.  
Nasahnu a nuú na ndíñehe jícó mé.

52 Ta nacandaa mé á chuun ndahá da náhnu ta najánuu ndáha mé á da.

Ta nandíñehe jícó mé á na najánuu ndáha mé ñuyívi yóho.

53 Ta najándicutú ndaa mé á ñaha nuú na nandimaní ñaha cuxu.

Ta nacandaa mé á ña nasacomí na cuicá já nataxí a na cán ná quee na cuhun na.

54 Nachindeé a na Israel, na cája chúun cuéntá mé á.

Ta coó nandindójó a tahvi ini a saha ná.

55 Jáchí quiahva já nasahan mé á tuhun a caja anda ama cáa quívi xihín Abraham ta xihín tásáhnu jícó yo, na naquixi chíchi mé dá, já nacachi María cája cáhnu ñá Ndióxi.

56 Ta nacandoo María nasahin ñá vehe Elisabet tixi uní yoo. Anda já naquee ñá cuanúhu ñá vehe ñá.

*Tá nacacu Juan, da jácandúta ñayivi*

57 Tá nandindaa quívi cacu jahyi Elisabet já nacacu in taa loho. 58 Ta tóco ndihi ñayivi ndúu yati xihín ñá xihín na cúu táhan ñá nasahan na xíto nihni na ña. Ta cájii íni na jáchi nacandaa ini na ña nacaja Ndióxi cuahá ñamaní xihín ña. 59 Ta tá naxinu ña loho cán una quívi já nasahan na nachicaan na marca yiquí cuñu a tátuhun ín costumbre na. Ta nacahan na cananí a Zacarías tá quiahva naní tátá a. 60 Joo já nacachi Elisabet já:

—A cananí toho da já. Juan va cananí da —nacachi ñá xihín na cán.

61 Anda já nacachi na cán já xihín ña:

—Ndá cuéntá quea cananí jahyún já ta ni in túhún toho na vehún coó naní já.

<sup>62</sup> Anda já nacuu ndáha ná nu Zacarías cán ña ndáca tuhún na da ndaja coo cananí ña loho cán. <sup>63</sup> Anda já naxíca Zacarías cán in tutu nu ná ta já nacahyí da já: “Juan cananí da.” Tá nacahvi na cán ña yóho já nacatóntó ndihi na. <sup>64</sup> Ta chí sa mé hora já nandicahan tucu Zacarías. Já nacasáhá da cája cáhnu da Ndióxi. <sup>65</sup> Xihin tóco ndihi ña nayaha yóho nacatóntó ndihi na nasanduu yati xihin Zacarías cán. Ta níí cúú ñuu válí ñúhu chí yúcu cuéntá Judea cán nandicuíta nuu tuhun saha tóco ndihi ña nayaha yóho. <sup>66</sup> Ta tóco ndihi na naxini johó ña yóho nacasáhá ndícani ini na sahá. Já nacasáhá ndáca tuhún táhan na já cáhí xihin táhan na já:

—Ndá ta cacuu ta loho yóho tá ná cuahnu da.

Nacachi na ña yóho jáchi naxini táhyí na ñamaní náhnu cája Ndióxi xihín ta loho cán.

### *Cája cáhnu Zacarías Ndióxi*

<sup>67</sup> Anda já nandicutú ínimá Zacarías, tátá Juan cán xihin ínimá yíí Ndióxi. Já nacasáhá da cáhan da tuhun sahan Ndióxi nu dá cáhan da. Já nacachi da já:

<sup>68</sup> Cáhnu ná cacuu Ndióxi, mé a cúú xitoho ñayivi naquixi chichi Israel.

Jáchi naquixi a jáca a mí, na cúú cuéntá mé á.

<sup>69</sup> Nachindahá Ndióxi mé a jáca a mí ná a cúnun yó indayá.

Ta íin ndée á caja tóco ndihi ña náhnu.

Ta naquixi a chichi David, da nacaja chúun cuéntá Ndióxi sanahá.

<sup>70</sup> Ta janda sanahá ndivaha nasahan Ndióxi tuhun a ña caja mé á ña yóho.

Ta já najáyaha na profeta cán tuhun nacahan Ndióxi nuú ñayivi.

<sup>71</sup> Ña nacachi mé á queá jáca a mí ndahá na ihvi yo xihin ndáha na co cúní mí.

72 Ta nacachi a tahvi ini a saha tasáhn̄u jícó yó, na nasanduu sanahá cán.

Ta a ndíndójó toho mé á sahá tuhun yíi nasahan̄ nu ná jachí ña yíi cuú tóco ndihi tuhun sahan̄ Ndióxī nuú ñayivi.

73 Ña yóho cuú tuhun nacachi Ndióxī jaxinū coo a nuu tá nasahan̄ mé á tuhun a nu Abraham, da nasacuu tasáhn̄u jícó yó cán.

74 Ta nacachi mé á xihin̄ dá ña jacacu a mí ndahá na co cúni mí ja ná a cayihvī yó caja chúun í cuéntá mé á.

75 Ta ja ná cacuú ñayivi ndaa, na nandiquiahva mé caja ña cúni mé á tóco ndihi quivī ndúú ñuyívi yóho, nacachi Zacarías nu ndíhi ñayivi cán.

76 Anda ja nacasáhá da cahan̄ da xihín ña loho jahyi da ja cachí da ja xihin̄ á:

Ta yóhó, jahyi a, cachi ñayivi sahun̄ ña cúun in profeta Ndióxī, mé a cúú cahn̄u nu ndíhi a.

Ta jihna ñuhú cuhún jacahún ñayivi ña ná cacu tiahva na ínima ná ndiquehe na mé a chindahá Ndióxī vaxi.

77 Ta xihín ña yóho cuu caxi tuhún xihín ñayivi ña caja cahn̄u ini Ndióxī sahá cua<sup>chi</sup> na.

Ja ná cuu cacu ndaa ínima ná ná a cúhun̄ na indayá.

78 Sahá ña quihvī ini Ndióxī mí ta sahá ña tahvī ini mé á saha yó sahá ña cán quea jandā indivi nu ín mé á nachindahá a in a cuu chindeé a mí ná ndihvī íchí sa cuéntá mé á.

79 Jachí vaxi a jandiyeh̄e a nuú ñayivi ndúu nuú naá ña ná caca na íchí nuú cuu coo vaha ini na xihin̄ Ndióxī, nacachi Zacarías xihín jahyi loho da.

80 Ja nacasáhá sahn̄u taa loho cán cuahan̄ da. Ta ndíndacú da xihín ñaha Ndióxī viti. Ta nasahin̄ da yucú íchí nuú co ndúu cuahá ñayivi jandā quiahva naxinū quivī nacasáhá jana<sup>ha</sup> da nuú na Israel.



## 2

*Tá nacacu Jesús ñuu Belén  
(Mt. 1:18-25)*

<sup>1</sup> Ta mé tiempo cán tá nasacomí Augusto cuéntá sahá ñayivi ndúu ñuyívi já nasahnda da chuun ña ná nditaca quívi ndaja táhan ñayivi cómi da cuéntá saha. <sup>2</sup> Ta mé tañu nu cuití tá nanditaca quívi ná já nasacuu Cireneo gobernador estado Siria. <sup>3</sup> Ta tóco ndihi ñayivi nanditahan nu ná cuhun na tá ñuu tá ñuu nuú nacacu tásáhnú jícó na ná quee quívi ná. <sup>4</sup> Sahá ña cán quea naquee José ñuu Nazaret cuéntá Galilea cán já nasahan da ñuu Belén ña ndacaan estado Judea nuú nacacu David jáchi naquixi da chíchi David. <sup>5</sup> Nasahan María xihin José ñuu Belén quee quívi ná. Mé María yóho cúu ñá naxica da cacuu ñájíhi da. Ta sa já ñúhu jahyi ñá cuahan ñá ñuu Belén. <sup>6</sup> Ta nani nasanduu na ñuu Belén cán naxinu quívi cacu jahyi María. <sup>7</sup> Ta nacacu jahyi nuú ña. Ta nachitiví ñá a ticoto já nachindúhu ñá a nu xixáhan quítí cán. Mé nu sánduu quítí cán nacacu jahyi María jáchi coo nañeñe ná vehe canduu na jáchi sa nacatáñu va vehe nuú canduu ñayivi xínu coo ñuu Belén cán.

*Cáxi tuhun táto Ndióxi xihín na ndáá ndicachi ña nacacu Jesús*

<sup>8</sup> Nasanduu java na ndáá ndicachi jana ná ñuú yati ñuu Belén cán. <sup>9</sup> Ta in náá cuití nanaha táto Ndióxi mé á nu ná. Ta chí nandiyihvi ndaa nu ndúu na cán nacaja Ndióxi ta nayihvi ndivaha na. <sup>10</sup> Joo nandicahan táto Ndióxi cán xihin ná já nacachi a já:

—A yíhvi toho ndó jáchi tuhun vaha quea ñeñe e vaxi i cahan i xihin ndo. Ta xihín ña yóho cajii ndivaha ini tóco ndihi ñayivi. <sup>11</sup> Jáchi mé quívi víti nacacu in a jácacu a ndohó nuú cuachi ndó ta mé á cán cúu Cristo, xitoho ndó, ña nachindahá Ndióxi cacomí a cuéntá saha ndo. Ta

naçacu a ñuu Belén nuú naçacu David sanahá. <sup>12</sup> Tá ná cuhun ndo cán já cuni ndó ña loho cán cátiví a ticoto cándúhu á nu xixáhan quíti. Tá ná cuni ndó ña yóho já candaa ini ndó ña cáhan i ña ndaa xihin ndo —naçachi táto Ndióxi xihín na ndáá ndicachi cán.

<sup>13</sup> Ta nani cáhan táto Ndióxi cán naxinu coo cuaha chága táto Ndióxi nu íin a cán. Mé táto Ndióxi yóho naquixi na indiví ta cája cáhnu na Ndióxi já cáhí na já:

<sup>14</sup> Cáhnu ná cacuu Ndióxi íin indiví.

Ta ná coo vaha ini tóco ndihi ñayivi ndúu ñuyíví, mé na cájii ini xihín ñamani cája Ndióxi xihín ná, naçachi táto Ndióxi cán.

<sup>15</sup> Ta tá sa nandico coo táto Ndióxi cán cuahan chí indiví já naçasáhá cáhí xihín táhan na ndáá ndicachi cán já:

—Cóho quí yó ñuu Belén candehé yó ña naçachi Ndióxi, xitoho í xohó ña naçuu ñuu Belén cán.

<sup>16</sup> Já xínu na nasahan na ta tá naxinu coo na cán já nandiñehé ná María xihín José xihín mé ña loho cándúhu nu xixáhan quíti cán. <sup>17</sup> Anda já naçasáhá nandicani na ndáá ndicachi cán nu ná ña naçachi táto Ndióxi xihín ná sahá ña loho cán. <sup>18</sup> Ta chí cátontó tóco ndihi ñayivi tá xini johó na ña ndícani na ndáá ndicachi cán nu ná. <sup>19</sup> Joo nandicuhun ini María tóco ndihi ña nayaha ta ndícani ini ñá sahá. <sup>20</sup> Tá nandihí já naquee na ndáá ndicachi cán cuahan na. Ta a juú quiahva cája cáhnu na Ndióxi cuahan na saha tóco ndihi ña naxini johó na xihín saha tóco ndihi ña naxini na jáchi nasahin tá íin naçachi táto Ndióxi cán xihín ná.

*Tá ñéhe na lée loho Jesús cuahan na ndiquiahva na cuéntá saha mé á veñuhu cáhnu ñuu Jerusalén*

<sup>21</sup> Tá nayaha una quivi naçacu lée jahyi María cán já nachicaan na marca yiquí cuñu a tá quiahva íin costumbre na. Ta nasacu na quivi á cananí a Jesús jáchi quiahva já

naçachi tátò Ndióxi cán xihin María ña ndítahan cananí a janda tá cámaní cañuhu jahyi ñá.

<sup>22</sup> Ta nu ley Moisés, ña naçahyí da sanahá cáchí a ña tá ná ndihi naçacu jahyi in ñáñáha, a cúu quihvi ñá veñuhu anda ná yaha sáhdá ley quivi. Ta tá sa nayaha quivi cán já naquehe María xihin José mé lee loho Jesús cán. Já ñéhe na ña cuahan na ndiquiahva na cuénta sahá nu Ndióxi veñuhu cáhnu ñuu Jerusalén cán. <sup>23</sup> Naçaja na ña yóho jáchí já cáchí ley nasahnda Ndióxi sanahá: “Tóco ndihi taa valí, na cúu jahyi nuú najihí, ndítahan ndiquiahva na ña nu Ndióxi.” <sup>24</sup> Ta jári najoco na ña sáhdá ley Moisés coo tá nandihí naçacu jahyi na. Ta ña yóho cúu ivi ndiyuu á ivi ndijata.

<sup>25</sup> Ta ndaja coo mé tiempo cán nasahiin in dataa naní Simeón ñuu Jerusalén cán. Ta nasacuu da in taa vaha ndivaha, da cája cáhnu Ndióxi. Ta ndáti da xinu coo quivi chindahá Ndióxi in da chindeé na Israel já ná a ndóho ga ini na. Ta nandicutú ndaa ínima dá xihin ínima yii Ndióxi.

<sup>26</sup> Ta mé a cán quea naçachi xihin dá ña a quiví toho da janda quiahva ná cuni táhyí da Cristo, mé a nasahan Ndióxi tuhun a chindahá a. <sup>27</sup> Ta mé ínima yii Ndióxi ndáca Simeón cuahan da veñuhu mé quivi naxinu María xihin José cán caja na xihin Jesús tá quiahva sáhdá ley Moisés caja na. <sup>28</sup> Tá nandique táhan da xihin ná já natiin da Jesús já nasañehe ndaa da a. Já naçasáhá da cája cáhnu da Ndióxi já cáchí da já:

<sup>29</sup> Tátá Ndióxi, sa cuu quiahva ndó ñamaní quivi yaa i viti, jáchí sa najáxinu coo ndó nuú tuhun ndó, ña nasahan ndó nuú yehe, da cúu mozo ndo.

<sup>30</sup> Jáchí naxini i xihín nuú i mé a nachindahá ndó jácacu ndehe.

<sup>31</sup> Nasacu ndó a ña ná jácacu a ndaja táhan ñayivi.

<sup>32</sup> Mé a yóho jándiyehé a nuú na coo naquixi chichi Israel.

Ta saha mé a yóho cahan vaha ñayivi sahá na Israel, na cúu cuénta mé ndo, nacachi Simeón.

<sup>33</sup> Chí nacatontó José xihin María taa joho na ña cahan Simeón saha Jesús. <sup>34</sup> Tá nandihí naxica tahví Simeón nu Ndióxi saha ná anda já nacasáhá cáchí da já xihin María, náná Jesús:

—Nacaxi Ndióxi taa loho yóho ña ná caja da ná cuhun cuahá na Israel ndoho ini na ta caja da ña ná cacu ínima cuahá na cán. Naquixi da nu Ndióxi joo candají cuahá ná da <sup>35</sup> já náha táhyí ña cáhvi ini in in na cán. Ta yóhó, María tahví ndivaha inún sahá ña yóho ta cacuu a tátuhun tuxú na machiti ínimun —nacachi Simeón xihin María.

<sup>36</sup> Ta mé cán nasahijn ri in ña naní Ana, ña jáyaha tuhun cahan Ndióxi nuú ñayivi. Ta nasacuu ña jahyi da naní Fanuel, da naquixi chichi Aser. Mé Ana yóho nacayatá ña. Tá yúta ña natandaha ña joo usa laá cuia nasahijn ña xihin yí ña já naxihi da. <sup>37</sup> Ta viti sa naxinu comi jícó comi cuia íin cuáan ña. Nuú ta ndiví íin tuun ña veñuhu cája cáhnu ña Ndióxi. Xijuhun ña ta xica tahví ña nu mé á. <sup>38</sup> Mé hora íin Simeón ndítuhún da xihin María já naxinu coo Ana cán. Ta tá nandihí nandiquiahva ña ndixahvi nu Ndióxi já nacasáhá cahan ña sahá ña loho Jesús cán nuú ñayivi, na ndáti quixi quiví chindahá Ndióxi da chindeé na ñuu Jerusalén. Ta cáchí ña ña jivi mé Jesús cán queá ndáti na quixi.

### *Tá nandicó coo na ñuu Nazaret*

<sup>39</sup> Tá nandihí nacaja José xihin María ña sáhdá ley Moisés cája na cán já cuanúhu na ñuu Nazaret, ña ndácaan estado Galilea cán. <sup>40</sup> Ta mé taa loho Jesús sáhnu da ta ndíndacú da. Ta joho ndíndichí ga ví jiní dá cuahan da. Ta cuahá ndivaha ñamaní cája Ndióxi xihin dá.

### *Ndácaan Jesús veñuhu cáhnu ñuu Jerusalén*

<sup>41</sup> Tá nū cuia sáhan náná tátá Jesús víco pascua ñuu Jerusalén. <sup>42</sup> Ta tá naxinu Jesús uxu ivi cuia já ndáca táhan mé á xihin ná tá cuahan na víco ñuu Jerusalén cán jáchi já nasahjin costumbre ñayivi cája na tañu víco cán. <sup>43</sup> Ta tá sa nayaha víco cán já nandicó coo José xihin María cuahan na. Joo coo naxini na ña nacandoo Jesús ñuu Jerusalén cán. <sup>44</sup> Tañu ñayivi cuaha cán catáhan da vaxi da, nacahan na. Ta tá sa naxinu ní in quivi xica na cuahan na já nacasáhá ndínducú na da tañu ñayivi cúu táhan na xihin tañu na xini táhan xihin ná. <sup>45</sup> Joo coo nandiñehe ná da. Anda já nandicó coo tucu na ñuu Jerusalén ndínducú na da.

<sup>46</sup> Janda quivi uni ví já nandiñehe ná Jesús ini veñuhu cáhnu cán. Caa fin coo da tañu na jánahá ley Moisés cán. Taa johó da nu cáhan na ta ndáca tuhún da na sahá java ga ñaha. <sup>47</sup> Ta chí catóntó tóco ndihi ñayivi tá xini johó na tuhun ndúcu ñehe da nuú na jánahá ley Moisés cán jáchi náha ña ndíchí jini dá. <sup>48</sup> Tá naxini María xihin José ña ndácaan Jesús tañu na jánahá ley Moisés cán já nacatóntó na. Anda já nacachi María já xihin Jesús:

—Jahyi maní i. Ndá cuéntá quea nacajún ña yóho xihin nde. Yehe xihin tátún a juú quiahva ndícani ini nde xica nuu nde ndínducú nde yohó —nacachi María xihin Jesús.

<sup>49</sup> Anda já nacachi Jesús já:

—Ndá cuéntá quea ndínducú ndó yehe. Á co xini toho ndó ña ndítahan ndihi ini i cája i chuun nasahnda tátá i, mé á fin indivi nuú i cája i, vaha —nacachi Jesús xihin ná.

<sup>50</sup> Joo ni María ni José coo nacandaa ini na ña nacachi Jesús cán xihin ná.

<sup>51</sup> Anda já nandicó coo Jesús cuahan xihin ná ñuu Nazaret. Ta nacaja da tóco ndihi ña cúni na. Ta nandicuhun ini María ña nacaja Jesús ini veñuhu cáhnu cán. <sup>52</sup> Ta sáhnu Jesús ta cátaqu ini da cuahan. Ta cájii ini

Ndióxi xihín ña cája Jesús. Ta quiahva já cájii ri ini ñayivi va xihín ña cája da.

### 3

*Cásahá Juan cáhan da tuhun Ndióxi xihín ñayivi yucú íchí cán*

*(Mt. 3:1-12; Mr. 1:1-8; Jn. 1:19-28)*

<sup>1</sup> Tá naxinu sahun cuia cómi Tiberio cuéntá sahá ñayivi ñuyiví já nasacuu Poncio Pilato gobernador nuú na ndúu estado Judea. Ta da naní Herodes nasacuu gobernador nuú na ndúu estado Galilea. Ta ñani Herodes, da naní Felipe cán nasacuu gobernador nuú na ndúu Iturea xihín nuú na ndúu Tracónite. Ta da naní Lisaniás nasacuu gobernador nuú na ndúu Abilinia. <sup>2</sup> Ta Anás xihín Caifás nasacuu da sacuahá nu ndíhi jutú. Mé tiempo cán nacañan Ndióxi xihín Juan, da cúu jahyi Zacarías, mé nu íin da yucú íchí cán. <sup>3</sup> Andá já nayaha Juan ndíjáá ñuu válí ñúhu yuhú yuta Jordán cán. Ta cáxi tuhun da nuú ñayivi ña ndítahan nu ná jándacoo na ña núu cája na já ná caja cáhnu ini Ndióxi sahá cuachi na ta já ná candúta ná. <sup>4</sup> Tóco ndihi ña yóho nayaha tá íin nacachi Isaías tá nacahyí da sanahá:

Vaxi quivi tá cañan cóhó in da tañu yucu íchí ta cachi da já:

“Caja tiahva ndó íchí nuú quixi xitoho í, ta cuná ndó in íchí ndacú nu mé á ña ná ndihvi a ínima ndo.

<sup>5</sup> Tóco ndihi ña cúu táhvi ná ndicutú ndihi a.

Tóco ndihi yucu xihín xiqui ná ndicava ndaa ndihi a.

Tóco ndihi íchí ndicava ná ndindacú ndihi a.

Ta íchí ña co íin ndaa nuu ndindaa ndihi nu á.

<sup>6</sup> Ta tóco ndihi ñayivi ndúu ñuyiví cuni na ndá quiahva jácacu Ndióxi ñayivi”, já cáhí tutu nacahyí Isaías sanahá ndivaha.

<sup>7</sup> Ta ñacasáhá ñayivi ndái cuu na nu ín Juan ña ná jácandúta da na joo ñacasáhá xójo ndivaha ini da xihín ná já cáchí da já:

—Mé ndó cúú ndó tátuhun coo jáchi cúú ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi. <sup>8</sup> Xíni ñúhú caja ndó ña vaha já ná cuni ñayivi ña mé a ndaa táhyí najándicoo ndó ña núu nasacaja ndó jihna. Ta a cáhán ndo ña jácacu Ndióxi ndohó sahá ña cúú ndó na ñaquixi chichi Abraham. Jáchi coo saha toho ña jan nu Ndióxi tá co jándacoo ndó cuachi ndó. Jáchi mé a ndaa ná cahan i xihín ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham. <sup>9</sup> Mé ndó cúú ndó tátuhun in yíto, dó sa ñatiin na hacha cuahan na cahnda na. Ta tóco ndihi yíto, dó co sahan cuíhi vaha nuu, tahnda do ta quee dó nu ñúhu cayi do. Quiahva já caja rí Ndióxi xihín ndóhó tá co cúní ndó ndicó coo ini ndó nu mé á —ñacachi Juan xihín ñayivi cán.

<sup>10</sup> Anda já ñacasáhá ñayivi cán ndaca tuhún na da já cáchí na já xihín dá:

—Ndía ndítahan nuú nde caja nde.

<sup>11</sup> Já cáchí Juan já xihín ná:

—Ndá na ndúu ivi cotó ná quiahva na in a nuú na coo ñaha nuu. Ta ndá na ín ña cuxu ná cahnda java táhan na ña xihín na coo a nuu —cáchí Juan xihín na cán.

<sup>12</sup> Tañu na ñandai cuu cán ñaxinu ri java da játaca jjuhún cuéntá impuesto ña candúta dá. Ta ñandaça tuhún da Juan já ñacachi da já:

—Maestro, ndía ndítahan nuú nde caja nde.

<sup>13</sup> Anda já ñacachi Juan já xihín dá:

—Quehe ndó jjuhún nuú ñayivi tá quiahva sáhdá ley cuití va quehe ndó —ñacachi Juan xihín da cán.

<sup>14</sup> Ta jári java da cúú soldado nandaca tuhún da Juan já nacachi da já:

—Ta ndehe ri ndíã ndítahan caja nde.

Já nacachi Juan já xihín dá:

—A cándaa ndó ñã cómí ñayivi. A jáyihví ndó na sahá ñã ná quiahva na ñaha nu ndo. Ta ni a jácojo ndó cuachi jata ná tá coó nacaja na ñã. Ta xíní ñúhú coo vaha ini ndó xihín yahvi quehe ndó sahá chuun cája ndó —nacachi Juan xihín da cán.

<sup>15</sup> Tóco ndihi ñayivi ndíhi ini na jáchi cúni na candaã ini na ñã á mé Juan cúú Cristo, da nanchindahá Ndióxi cacomí cuéntá sahá ñayivi. <sup>16</sup> Joo nandicahan Juan xihín tóco ndihi ñayivi já nacachi da já xihín ná:

—Mé a ndaa cája ndúta i ndohó xihín ticuúí. Joo vaxi inga da ta da cán cúú da jándicutú ínima ndo xihín ínima yíi Ndióxi ta ñã cán cacuu a tátuhun ñúhu cáyi. Ta da cán iin cuaha chága ndée dá a juú ga yehe. Ta chí coó sahá i ndica xítí i nu dá ñã ndaxí i correa ndusa dá. <sup>17</sup> Mé da vaxi cán caxi da ñayivi vaha tañu ñayivi quini. Cúú á tátuhun in dataa tá jáxixi da trigo xihín pala já ná quee xehe á já cacu vaha da ñã. Ta xehe nacana cán cuhun a cayi a xihín ñúhu ita ñã a ndáhva toho —nacachi Juan.

<sup>18</sup> Quiahva johu nacaahan Juan nuú ñayivi tá naxi tuhun da tuhun vaha nu ná. Ta cuahá java ga ñaha cáhan da xihín ná caja na. <sup>19</sup> Inga ñaha nacaja da queá najánani da Herodes, da cúú gobernador jáchi nasahiin Herodes xihín Herodías, ñã cúú ñájíhí ñani da, Felipe. Ta najánani Juan da sahá java ga ñã núu nacaja da. <sup>20</sup> Joo nacaja jóhó Herodes mé dá ta coó naxeen da coo johu da nu cáhan Juan xihín dá. Ñã nacaja da queá nacaja chága da ñã núu tá nachicaan da Juan vecaa.

*Tá nacandúta Jesús  
(Mt. 3:13-17; Mr. 1:9-11)*



<sup>21</sup> Tá cámaní ndácaan Juan vecaa, cája ndúta dá ñayivi ta já najácandúta ri da Jesús. Ta nani xíca tahví Jesús nu Ndióxi já nanuna indiví. <sup>22</sup> Ta nanuu ínima yii Ndióxi jata Jesús. Ta nasacaa ínima yii Ndióxi yóho tá quiahva cáa in ndijata. Tá nandihí já naxini joho na ña cáhan in a indiví já nacachi a já:

—Yóhó cúun jahyi maní i ta cájii ndivaha ini i xuhun —nacachi a.

*Ña yóho cúu quiví na nasacuu tásáhnu jicó Jesús  
(Mt. 1:1-17)*

<sup>23</sup> Nasandacaan Jesús tátuhun oco uxu cuia tá nacasáhá jánahá tuhun Ndióxi nuú ñayivi. Ta nacahán ñayivi ña nasacuu a jahyi José. Ta José cán nasacuu da jahyi Elí, <sup>24</sup> ta tátá Elí nasananí Matat. Ta tátá Matat nasananí Leví. Ta tátá Leví nasananí Melqui. Ta tátá Melqui nasananí Jana. Ta tátá Jana nasananí José. <sup>25</sup> Ta tátá José nasananí Matatías. Ta tátá Matatías nasananí Amós. Ta tátá Amós nasananí Nahum. Ta tátá Nahum nasananí Esli. Ta tátá Esli nasananí Nagai. <sup>26</sup> Ta tátá Nagai nasananí Maat. Ta tátá Maat nasananí Matatías. Ta tátá Matatías nasananí Semei. Ta tátá Semei nasananí José. Ta tátá José nasananí Judá. <sup>27</sup> Ta tátá Judá nasananí Joana. Ta tátá Joana nasananí Resa. Ta tátá Resa nasananí Zorababel. Ta tátá Zorababel nasananí Salatiel. Ta tátá Salatiel nasananí Neri. <sup>28</sup> Ta tátá Neri nasananí Melqui. Ta tátá Melqui nasananí Adi. Ta tátá Adi nasananí Cosam. Ta tátá Cosam nasananí Elmodam. Ta tátá Elmodam nasananí Er. <sup>29</sup> Ta tátá Er nasananí Josué. Ta tátá Josué nasananí Eliezer. Ta tátá Eliezer nasananí Jorim. Ta tátá Jorim nasananí Matat. <sup>30</sup> Ta tátá Matat nasananí Leví. Ta tátá Leví nasananí Simeón. Ta tátá Simeón nasananí Judá. Ta tátá Judá nasananí José. Ta tátá José nasananí Jonán. Ta tátá Jonán nasananí Eliaquim. <sup>31</sup> Ta tátá Eliaquim nasananí Melea. Ta tátá Melea nasananí Mainán. Ta tátá Mainán

32 Ta nasanani Matata. Ta tátá Matata nasanani Natán. <sup>32</sup> Ta tátá Natán nasanani David. Ta tátá David nasanani Isaí. Ta tátá Isaí nasanani Obed. Ta tátá Obed nasanani Booz. Ta tátá Booz nasanani Salmón. Ta tátá Salmón nasanani Naasón. <sup>33</sup> Ta tátá Naasón nasanani Aminadab. Ta tátá Aminadab nasanani Aram. Ta tátá Aram nasanani Esrom. Ta tátá Esrom nasanani Fares. Ta tátá Fares nasanani Judá. <sup>34</sup> Ta tátá Judá nasanani Jacob. Ta tátá Jacob nasanani Isaac. Ta tátá Isaac nasanani Abraham. Ta tátá Abraham nasanani Taré. Ta tátá Taré nasanani Nacor. <sup>35</sup> Ta tátá Nacor nasanani Serug. Ta tátá Serug nasanani Ragau. Ta tátá Ragau nasanani Peleg. Ta tátá Peleg nasanani Heber. Ta tátá Heber nasanani Sala. <sup>36</sup> Ta tátá Sala nasanani Cainán. Ta tátá Cainán nasanani Arfaxad. Ta tátá Arfaxad nasanani Sem. Ta tátá Sem nasanani Noé. Ta tátá Noé nasanani Lamec. <sup>37</sup> Ta tátá Lamec nasanani Matusalén. Ta tátá Matusalén nasanani Enoc. Ta tátá Enoc nasanani Jared. Ta tátá Jared nasanani Mahalaleel. Ta tátá Mahalaleel nasanani Cainán. <sup>38</sup> Ta tátá Cainán nasanani Enós. Ta tátá Enós nasanani Set. Ta tátá Set nasanani Adán. Ta Ndióxi nacavaḥa Adán.

## 4

### *Xíto ndojó tiñáhá sacuaḥa Jesús*

*(Mt. 4:1-11; Mr. 1:12-13)*

<sup>1</sup> Tá nandihi cán naquee Jesús yuta Jordán. Ta nandicutú ndaa ínima mé á xihin ínima yii Ndióxi ta mé a cán nasandaca Jesús nasahān yucú íchí nuú co ndúu ñayivi. <sup>2</sup> Ta cán nasahiin Jesús tixi ivi jico quiv*i* ta naxito ndojó tiñáhá sacuaḥa mé á. Ta tócó ndihi quiv*i* cán coó naxixi a ta tá nandihi já nacasáhá cuico a. <sup>3</sup> Anda já nacachi tiñáhá sacuaḥa cán já xihin á:

—Tá ta jivi ndusa jahyi Ndióxi cúún, cahnda chuun ña ná nduu yuu yóho pan.

<sup>4</sup> Anda já nanducú ñehe Jesús tuhun nu ri já nacachi a já:

—Já cáchí tuhun Ndióxi: “A juú pan cuití cuxu ñayivi já catacu na, vaḥa. Xíní ñúhú caja ri na ña sáhndá tuhun Ndióxi nu ná já queá ná cuu catacu na nu Ndióxi”, — nacachi Jesús xihín rí cán.

<sup>5</sup> Tá nandihí já ndáca tiñáhá sacuaḥa cán Jesús nasahan rí in jiní yucú jícó xihín á já nanaḥa rí tóco ndihí ñuu ndúu ñuyíví nu á in tóo loho joho. <sup>6</sup> Anda já nacachi rí já xihín á:

—Candehé ndaja náhnu cúú ñuu ndúu ñuyíví ta yeḥe sáhndá i chuun nuú ndaja táhan ña ta cuu jasá i ña nu yohó jáchi cuu jasá i ña yo nu cúní mí i jasá i ña. <sup>7</sup> Ta quiahva i ña nuun tá ná caxítún nuú i caja cáhnún yeḥe —nacachi rí xihín á.

<sup>8</sup> Joo nanducú ñehe Jesús tuhun nu ri já cáchí a já:

—Satanás, cuáhán caxoo jáchi já cáchí tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuu” —nacachi Jesús xihín tiñáhá sacuaḥa cán.

<sup>9</sup> Tá nandihí já ndáca tucu tiñáhá sacuaḥa cán Jesús nasahan rí ñuu Jerusalén xihín á. Ta najándaa rí a nu jícó jiní veñuhu cáhnu ndácaan cán já nacachi rí já xihín á:

—Tá ta jivi ndusa jahyi Ndióxi cúún jácana mún chí ninu. <sup>10</sup> Jáchi nuú tuhun Ndióxi ndáa in tuhun ña cáchí a já:

Cahnda Ndióxi chuun nu tátø mé á ña ná candaa na yohó.

<sup>11</sup> Ta ndiñehe ndáḥa ná yohó já queá ná a ndícueḥe saḥun tá ná cachihin saḥun xihín yuu, cáchí tuhun Ndióxi —nacachi rí xihín Jesús.

<sup>12</sup> Anda já nanducú ñehe Jesús tuhun nu ri já cáchí a já:

—Íin inga tucu nuú naçahyi tuhun Ndióxi ta cáchi a já: “A cóto ndojó tohún Ndióxi, xitohún” —naçachi Jesús xihin rí cán.

<sup>13</sup> Ña cán quéa naquee xóo tóo tiñáhá sacuaḥa nu Jesús ta naquee rí cuahan ri jáchi coo nañeḥe íni ri ndá quiahva coto ndojó chága rí a.

*Tá naçasáhá cáxi tuhun Jesús tuhun Ndióxi nuú na estado Galilea*

*(Mt. 4:12-17; Mr. 1:14-15)*

<sup>14</sup> Ta ndaja coo nandicó coo Jesús estado Galilea. Ta íin cuahá ndée a jáchi nandicutú ndaa ínimá mé á xihin ínimá yii Ndióxi. Ta ndijáá ñayivi ndúu cán naçasáhá na cáhan na saḥa mé á. <sup>15</sup> Ta naçasáhá a jánaḥa tuhun Ndióxi nuú ñayivi ini veñuhu in in ñuu na. Ta tóco ndihi na cáhan vaḥa na saḥá ña cája mé á.

*Tá naçahiin Jesús ñuu Nazaret*

*(Mt. 13:53-58; Mr. 6:1-6)*

<sup>16</sup> Tá nandihí já cuanúhu Jesús ñuu Nazaret nuú naçahnu a. Ta mé quivi ndíquehe ndée ná cán, naçahan mé á veñuhu. Ta naçaja tá quiahva sá caja mé á já nandaca ndichi a cahvi a tuhun Ndióxi nuú ñayivi. <sup>17</sup> Naçahan na libro naçahyí profeta Isaías nu á ña ná cahvi a ña nuú na ndúu veñuhu cán. Ta tá naçuná a libro cán já nandiñeḥe á nu ndaa ña cáchi a já:

<sup>18</sup> Chútú ndaa ínimá i xihin ínimá yii Ndióxi, jáchi naçaxi mé á yeḥe ña ná cuhun i çaxi tuhun i tuhun saá ña vaḥa nuú na ndahví.

Ta naçindahá mé á yeḥe ña ná ndaja vaḥa i na íin cuéḥa ini.

Ta naçindahá mé á yeḥe ña ná çaxi tuhun i nuú na ndúu ndahá tiñáhá sacuaḥa ndá quiahva caja na queta na ndáḥa ri.

Ta nachindahá mé á yehe ña ná cuná i nduchú núú na cuaá  
já ná cuu candehé na.

Ta nachindahá a yehe ña ná candaa i ña ndóho ini ñayivi.

<sup>19</sup> Ta nachindahá mé á yehe ña ná cahan i xihín ñayivi  
ña sa naxinu coo tiempo vaha ndivaha jáchi cúni  
Ndióxi caja cuahá ñamani xihín ñayivi, já cáhí ña  
nacahvi Jesús nuú na cán.

<sup>20</sup> Tá nandihi já nachicaji Jesús libro cán já  
nandiquiahva mé á ña nuú da cája chúun veñuhu cán  
ta nasaco a. Na ñuhu veñuhu cán sandehé na nu mé á.

<sup>21</sup> Sahá ña cán quea nacachi a já xihin ná:

—Mé quivi viti naxini ndó naxinu coo nuú tuhun  
nacahyí Isaías sanahá ndivaha —nacachi Jesús xihin na  
cán.

<sup>22</sup> Ta ndijáá ñayivi cán cahan vaha na saha Jesús ta  
cátóntó na sahá ña ndató ndivaha tuhun cahan xihin ná.  
Já nacasáhá ndáca tuhún táhan na já cáhí na já:

—Á a juú da yóho cúu jahyi José cán —cáhí na cahan  
xihin táhan na.

<sup>23</sup> Anda já nacachi Jesús xihin na cán já:

—Cája i cuéntá cúni ndó cachi ndó tuhun yóho xihin i:  
“Yohó, da cúu doctor ndaja vaha jihna mún.” Ta xihin ña  
yóho cúni ndó cachi ndó xihin i: “Ña náhnu naxini joho  
nde nacajún ñu Capernaum cán, caja ña mé ñu mún  
yóho ná cuni nde.”

<sup>24</sup> Anda já nacahan chága Jesús xihin ná já nacachi tucu  
a já:

—Mé a ndaa ná cahan i xihin ndo ña ni in tuhún toho  
ñayivi co ndíquehe vaha na profeta mé ñu da. <sup>25</sup> Mé  
a ndaa ná cahan i xihin ndo. Tá nasahiin profeta Elías  
sanahá já nasanduu cuahá ri na cuaan tañu ñayivi Israel ta  
nandoho ndivaha ini na jáchi naquixi in joco ndeé ndivaha  
sahá ña coo nacuun javi tixi uni cuia java. <sup>26</sup> Joo coo

nachindahá toho Ndióxi Elías ña ná cuhun da chindeé da na ndúu nación Israel cán. Ña nacaja Ndióxi quéa nachindahá a da nuú in ña cuáan nasahin ñuu Sarepta yati ñuu Sidón cán. <sup>27</sup> Ta quiahva já nasahin ri tiempo tá nasacuu Eliseo profeta. Mé tiempo cán nasanduu cuahá na nandoho cuehe táhyi nación Israel cán. Joo in túhún da nandaja vaha da cán, da naní Naamán, da naquixi ñuu tóho naní Siria —nacachi Jesús xihín na cán.

<sup>28</sup> Tá naxini johó na núhu veñuhu cán ña nacachi Jesús xihin ná já naxojo ndivaha ini na xihin á. <sup>29</sup> Já nandicuita na xihin á ta natavá na Jesús yuhú ñuu. Ta cán najánda na a jini yucú jícó nu cánúu ñuu cán. Já nacaán na chindahá nihni na a janda ninu. <sup>30</sup> Joo nayaha Jesús cuahan nu ná já naquee a cuahan va.

*In da nasandacaan ínimá quini ini*

*(Mr. 1:21-28)*

<sup>31</sup> Anda já naquee Jesús cuahan ñuu Capernaum, ña ndacaan estado Galilea. Ta cán nacasáhá jánaḥa tuhun Ndióxi nuú ñayivi mé quivi ndíquehe ndée ná. <sup>32</sup> Ta chí catóntó na tá quiahva jánaḥa Jesús nu ná jáchi cáhan mé á tátuhun in da ín saḥa cahnda chuun.

<sup>33</sup> Mé ini veñuhu nu ndacaan Jesús jánaḥa cán nasandacaan in dataa, da ndacaan in ínimá quini ini. Já nacayuhú ínimá quini cán nu Jesús já cáchi ri já:

<sup>34</sup> —Jándacoo táji ndeḥe, Jesús, da ñuu Nazaret. Ndá cuéntá quéa quihvi nuún xihín nde. A vásún jándihún saḥá nde. Sa xini vaha i yohó ta cándaá cáxi ini i ña cúun in da yii nachindahá Ndióxi —nacachi ínimá quini cán xihin Jesús.

<sup>35</sup> Anda já nacasáhá Jesús jánani a ínimá quini ndacaan ini dataa cán já nacachi a já xihin ri:

—Caji yúhun ta janí da yóho —nacachi Jesús xihin ri.

Tá nacachi a ja chi najándacava ri quini dataa nuú na can ja naqueta ri ini da can. Ta coo nacaja ri ni in ña nuú xihin da.<sup>36</sup> Tocó ndihi ñayivi nasanduu can nayihvi ndivaha na. Ta ja nacasáhá cachí xihin táhan na ja:

—Ín ndivaha sahá tuhun cahan Jesús yóho jachi xihin ña cahan da sáhndá da chuun xihin ndée da ta tává da ínima quini ta chí quee ri cuahan ri —nacachi xihin táhan na can.

<sup>37</sup> Ta ní cúú ñuu válí can nandicuita nuu tuhun saha Jesús.

*Ndája vaha Jesús ñá cúú xojo Simón Pedro*

*(Mt. 8:14-15; Mr. 1:29-31)*

<sup>38</sup> Anda ja naquee Jesús veñuhu can ja cuahan vehe in da naní Simón. Tá naxinu a can ja naquihvi a ini vehe da. Ta naxini a ña quíhvi ña cúú xojo Simón can, ña chícaan cahni ndée ña. Chí naxica táhvi na nu Jesús ña ná ndaja vaha mé á ña.<sup>39</sup> Anda ja nacayati Jesús nu ña ja nasahnda chuun nuú cuehe can ña ná quee a. Ja nandindaa ña chícaan cahni á ña chí ívi laá nandicoo ña ja nacasáhá caja ndíví ña ña cuxu na.

*Ndája vaha Jesús cuhá na quíhvi*

*(Mt. 8:16-17; Mr. 1:32-34)*

<sup>40</sup> Tá naqueta nuu candi mé quívi can ja ñéhe ñayivi na quíhvi ndúu nu ná naxinu na nu Jesús. Tá nuú cuehe nasandoho na can ta tá nachinuú Jesús ndaha á jiní in in na ja nandivaha na nacaja mé á.<sup>41</sup> Ta cuaha táhan na quíhvi can nacana ínima quini ini na nacaja mé á. Ta tá quéta ri quini can ja cayuhú cóhó ri nu Jesús ja cachí ri ja:

—Yóhó cúun in túhún jiní ja jahyi Ndióxi —cachí ri xihin Jesús.

Joo najánani Jesús ínima quini can ta co cúni a quiahva ñamani ña ná cahan ri jachi xíni vaha ri can ña cúú mé á Cristo, da nachindahá Ndióxi cacomí cuéntá sahá ñayivi.

*Jánaḥa Jesús tuhun Ndióxi nuú ñayivi ndúu estado Galilea  
(Mr. 1:35-39)*

<sup>42</sup> Tá naṭivi inga quiví itaḥan já naḥee Jesús ñuu cán ta cuḥan in nu cáa xóo. Joo naḥasáhá ñayivi ndínducú na mé á janda quiahva naḥinu na nu ín a jáchi cúní na caji na nuú á ná a jándacoo a na. <sup>43</sup> Anda já naḥachi Jesús já xihín ná:

—Ndítahan nuú i cuḥun i caxi tuhun i xihín ñayivi ndúu java ga ñuu ña vaxi quivi cacomí Ndióxi cuénta saḥa ná. Jáchi chuun yóho naḥindahá Ndióxi yehe vaxi i —naḥachi Jesús xihín na cán.

<sup>44</sup> Chí naḥica nuu Jesús jánaḥa tuhun Ndióxi nuú ñayivi ini veñuhu estado Galilea cán.

## 5

*Cája Jesús ña ná cuu tiin cuḥa ná tiyacá  
(Mt. 4:18-22; Mr. 1:16-20)*

<sup>1</sup> In tañu ín Jesús yuhú tañuhú naní Genesaret. Ta a juú quiahva nataca ñayivi chí naḥasáhá cándíhi na Jesús jáchi cúní na cuni joho na tuhun Ndióxi. <sup>2</sup> Ta naḥini Jesús ivi barco ndíta dó yati yuhú tañuhú cán. Coó da ñúhu ini dó jáchi sa naḥee da tává tiyacá ta yati jín va ndícata da ñunu dá. <sup>3</sup> Anda já naḥiḥvi Jesús ini in táhan barco cán, do cúú ñaḥa Simón. Ta naḥachi Jesús xihín Simón ña ná jácaxíca loho da do. Tá nandíhi já naḥacoo Jesús ini barco já naḥasáhá jánaḥa nuú ñayivi janda mé ini barco cán. <sup>4</sup> Ta tá sa nandíhi naḥahan xihín ñayivi cán já naḥachi a já xihín Simón:

—Cañehe barco yóho ná cuḥun dó xoo nu cúná chága ticuí ta jácanún ñunuḥ tavún tiyacá —naḥachi Jesús xihín dá.

<sup>5</sup> Anda já nanducú ñehe Simón tuhun nu Jesús já cáchi da já xihín á:



—Maestro, nini yaa ñuú ñacaja chúun nde ña ndúcú nde tavá nde tiyacá. Ta coó ñaha ñatavá nde. Joo tá sa cáchí mé ndó já caja i tá ín cáchí ndo cuhun i jácana i ñunu i ini tañuhú —ñacachi Simón xihin Jesús.

<sup>6</sup> Ta tá ñacaja da ña ñacachi Jesús xihin dá já a juú quiahva cuahá tiyacá ñatavá da chí janda ñunu dá cán ñacasáhá táhnda. <sup>7</sup> Anda já ñacuu ndáha dá nuú java ga da tává tiyacá ñuhu ini inga barco ña ná quixi da chindeé táhan da xihin dá. Anda já ñaquixi da cán chindeé táhan da xihin Simón. Já najácutú da ndíví barco cán xihin tiyacá chí janda ndúcú cacoo dó cán चाह tañuhú xihin ña cuahá tiyacá ñaquee ini dó. <sup>8</sup> Tá ñaxini Simón Pedro cán ña yóho já ñacaxítí da nu Jesús já cáchí da já xihin á:

—A cáyati ndó nuú i, xitoho i jáchi cúu u in ta cája cuachi.

<sup>9</sup> Já ñacachi Simón jáchi ñayihví da. Ta quiahva já ñayihví da ñachindeé táhan xihin dá cán sahá ña cuaha nahá tiyacá ñatavá da. <sup>10</sup> Quiahva já ñayihví ri Jacobo xihin Juan, da cúu jahyi Zebedeo. Ndíví da yóho chindeé táhan da xihin Simón cán. Ta já ñacachi Jesús já xihin Simón:

—A cáyihví tohún jáchi viti casáhún caca nuún tavún ñayivi tañu cuachi tá quiahva ñacajún tá ñatavún tiyacá ini tañuhú —ñacachi Jesús xihin dá.

<sup>11</sup> Ña cán quea tá ñatavá da cán barco da yuhú tañuhú cán já najándacoo ndihi da ñaha da ta ñandico da Jesús.

*Tá ñandaja vaha Jesús in da ndóho cuhe táhyi*

*(Mt. 8:1-4; Mr. 1:40-45)*

<sup>12</sup> Ta ndaja coo ín Jesús in ñuu ta já ñaxinu coo in da ndóho cuhe táhyi nu á. Ta tá ñaxini da Jesús já ñacaxítí da nu á janda quiahva ñacani ndaa nuú dá nu ñuhu. Já ñacasáhá xíca tahví da nu á já cáchí da já xihin á:

—Cuu ndaja vaha ndó yehe, xitoho i tá cúní ndo —  
nacachi da xihín Jesús.

<sup>13</sup> Anda já nacani ndaa ndáha Jesús da já nacachi a já:

—Cúní ña ná ndivahún ña cán quéa nandivahún viti —  
nacachi Jesús.

Tá nacachi Jesús já chí ivi laá nandindaa cuehe táhyi  
nandoho da cán. <sup>14</sup> Anda já nasahnda Jesús chuun nu dá  
ña ná a ndícani da nuú ñayivi sahá ña nacaja xihín dá. Ña  
nacachi a xihín dá quéa:

—Cuáhán ndacún jánahun mún nuú jutu. Ta ndítahan  
jocún ñaha nu Ndióxi tátuhun nasahnda ley Moisés sa-  
nahá caja na sa nandivaha. Já ná candaa ini ñayivi ña sa  
nandindaa va cuehe nasandohún —nacachi Jesús xihín da  
cán.

<sup>15</sup> Joo ví ga ví nacasáhá ndícuíta nuu tuhun sahá ña cája  
Jesús. Sahá ña cán quéa táca cuhá ndivaha ñayivi cuni  
joho na nu cáhan mé á xihín ná. Ta jári táca na jáchi cúní  
na ña ná ndaja vaha mé á na. <sup>16</sup> Joo tává xoo Jesús mé á  
xoo nuú coo ñayivi ta cán sá xica tahví a nu Ndióxi.

### *Ndája vaha Jesús in da naxihí tuchu saha*

*(Mt. 9:1-8; Mr. 2:1-12)*

<sup>17</sup> In tañu ndácaan Jesús ini in vehe jánahá nuú ñayivi.  
Tañu na cán nasanduú coo java na fariseo xihín java na  
jánaḥa ley Moisés. Tóco ndihi na cúú ná na naquixi ndijáá  
ñuu válí ñúhu estado Galilea cán xihín ñuu válí ñúhu  
estado Judea xihín ñuu Jerusalén viti. Ta náha Jesús ña  
ñéhe a ndée Ndióxi jáchi ndivaha ñayivi cája mé á. <sup>18</sup> Mé  
hora já naxinu coo java dataa ta ñéhe da in xito loho  
nu cándúhu in da quihvi, da naxihí tuchu saha. Ta cúní  
da jáquihvi da da cán ini vehe nu ndácaan Jesús cán já  
chindúhu dá da nu Jesús, nacahán da. <sup>19</sup> Joo coo nacuu  
caxa da quihvi da jáchi nanditútú ndivaha ñayivi ndúu na  
yéhe vehe cán. Sahá ña cán quéa nandaa da jiní véhe já

naṭavá da teja cándójó cán. Já najánuu da xito loho nu cándúhu mé da quíhvi cán tañu tóco ndihi ñayivi ñúhu ini vehe cán janda quiahva nañinu xito da quíhvi cán nu ín Jesús. <sup>20</sup> Tá nañini Jesús ña cándeé ini da ñéhe da quíhvi cán mé á já naçachi a já xihín da quíhvi cán já:

—Candehé. Sa naçaja cáhnu ini i sahá cuachún viti — naçachi Jesús xihín dá.

<sup>21</sup> Anda já naçasáhá na jánaha ley Moisés xihín na fariseo cán cáhán na: “Ndá da cúu da yóho ta ndá cuéntá queá ndája núu da Ndióxi xihín tuhun cáhan da. Jáchí ni in túhún toho ñayivi a cúu caja cáhnu ini sahá cuachi. In túhún jini Ndióxi queá cuu caja cáhnu ini sahá cuachi”, naçahán na cán.

<sup>22</sup> Joo Jesús sa naçandaa va ini a ña cáhvi ini na cán sahá ña cán queá naçachi a já xihín ná:

—Ndávaha cáhán ndo já. <sup>23</sup> Á cáhán ndo ña ihvi chága cachi i xihín da yóho: “Naçaja cáhnu ini i sahá cuachún viti.” Á tá coó tá cachi i xihín dá: “Ndicoo ta cuanúhu.” <sup>24</sup> Candehé vaha ndo ná naha i nu ndo ña ín sahá i, da naçindahá Ndióxi nduu u ñayivi, caja cáhnu ini i sahá cuachi ñayivi ñuyíví yóho —naçachi Jesús xihín na cán.

Anda já naçachi tucu a xihín da nañihí tuhú saha cán já:

—Ta viti cáhan i xuhun, cuándacoo ndiquehe xito lohún ta cuanúhu.

<sup>25</sup> Tá naçachi Jesús já chí ivi laá nandicoo da nu ndíhi ñayivi ndúu cán jáchí nandivaha saha dá. Ta nandiquehe da xito loho da nuú nasandúhu dá. Anda já caja cáhnu da Ndióxi naquee da cuanúhu dá vehe da. <sup>26</sup> Ta tóco ndihi ñayivi nasanduu cán naçatóntó na ta naçaja cáhnu na Ndióxi sahá ña naçaja Jesús. Ta a juú quiahva yíhvi na já naçachi na já:

—Ñá náhnu ndivaha va queá naxini quivi viti —nacachi na.

*Cána Jesús in da naní Leví, da cáhan na Mateo xihin, ña ná caca da xihin á*

*(Mt. 9:9-13; Mr. 2:13-17)*

<sup>27</sup> Tá nandihí já naquee Jesús xíca cuahan. Ta cán naxini a in da játaca jiuhún cuéntá impuesto. Mé da yóho naní da Leví ta íin coo da nu sácoo na játaca jiuhún cuéntá impuesto cán. Anda já nacachi Jesús já xihin dá:

—Naha quí candicun yehe —nacachi a xihin dá.

<sup>28</sup> Anda já nandaca ndichi Leví cán ta najandacoo da tóco ndihí ñaha cán ta já nacasáhá ndíco da Jesús xíca da.

<sup>29</sup> Tá nandihí já nacavaha Leví in víco cáhnu mé vehe da cán ña caja cáhnu da Jesús. Ta cán nataca cuaha táhan na játaca jiuhún cuéntá impuesto ndúu na vehe da. Ta cuahá ga ñayivi nataca ndúu coo nu mesa cán. <sup>30</sup> Joo na fariseo xihin na jánaha ley Moisés nacasáhá na cáhan núu na sahá na xíca tuun xihin Jesús já nacachi na já:

—Ndá cuéntá queá xíxi ndó xihin na játaca jiuhún cuéntá impuesto ta xihin java ga na caja cuachi —nacachi na cán xihin na xíca tuun xihin Jesús.

<sup>31</sup> Anda já nanducú ñehe Jesús tuhun nuú na cán já nacachi a já xihin ná:

—Ñayivi íin vaha co xíní ñúhú toho na da caja tátá ñahá joo na quíhvi, na cán cúu na xíní ñúhú da caja tátá ñahá.

<sup>32</sup> Ta yehe coo vaxi toho i cana i na sa íin vaha. Vaxi i cana i ñayivi, na caja cuachi ña ná jándacoo na cuachi caja na —nacachi Jesús xihin na cán.

*Ndáca tuhún na Jesús ndá cuéntá queá co xijuhun da xíca tuun xihin á*

*(Mt. 9:14-17; Mr. 2:18-22)*

<sup>33</sup> Anda já nacasáhá ndáca tuhún tucu na Jesús já cáhí na já xihin á:

—Xíni nde ña xíca tãhví ndivaha va na ñasaxica tuun xihin Juan ta jári xíjuhun ndivaha va na cán. Ta quiahva já cája na fariseo. Joo na xíca tuun xihin yóhó jan níi tiempo xíxi na pan ta xíhi na vino. Ndá cuéntá queá cája na já —ñacachi na cán xihin Jesús.

<sup>34</sup> Andá já nanducú ñehe Jesús tuhun nu ná já cáchí a já xihin ná:

—Cúú á tátuhun tá cája na víco tándaha ta íin va mé da tándaha cán xihin ná já queá co ndítahan nu ná cajuhun na. Quiahva já íin ri xihín yehe va. Coó saha cajuhun na xíca tuun xihín i jáchi íin vi xihin ná viti. <sup>35</sup> Joo vaxi quivi ndindaa i nuú na yóho. Andá já casáhá na yóho cajuhun na —ñacachi Jesús xihín na cán.

<sup>36</sup> Andá já ñasacu Jesús quiahva nu ná já ñacachi a já xihin ná:

—Ni in túhún toho ñayivi co sáhdá na in túhun jáhma saá já ndicahmá na in jáhma yatá. Jáchi tá ná caja na já játiví na jáhma saá cán. Ta ni co ndíque táhan vaha in jáhma yatá tá jándaha na ña xihín in túhun jahmá saá. <sup>37</sup> Ta ni in túhún toho ñayivi co táán na vino saá ini in níi yatá. Jáchi tá ná caja na já já queá jáchndi va vino saá níi yatá cán. Ta xihín ña yóho tivi níi cán ta tivi ri dó cúú vino cán va. <sup>38</sup> Ña ndítahan caja na queá taán na vino saá ini níi saá já ná cuu cañuhu vaha dó cán ta mé níi co cáhndi a. <sup>39</sup> Ta ni in túhún táhan na xíhi vino yatá co xíca na vino saá coho na jáchi cáchí na ña vaha chága xíhi dó yatá —ñacachi Jesús xihín quiahva sácú a nuú na cán.

## 6

*Tá na xíca tuun xihin Jesús tuhun na yucu jini trigo quivi ndíquehe ndé ñayivi*

*(Mt. 12:1-8; Mr. 2:23-28)*

<sup>1</sup> In quiv̄i ndíquehe ndée ñayivi nani xíca Jesús cuah̄an xih̄ín n̄a xíca tuun xih̄ín á já nayaha na tañu nuú naxutu na trigo. Já nacasáhá n̄a cán túhun na yucu jin̄i trigo cán já tává n̄a trigo já chíníhni ndáha ná a ta sáxí n̄a casah̄an n̄a. <sup>2</sup> Tá naxini java n̄a fariseo cán ña cája na já nacachi na já:

—Ndávaaha cája ndó chuun ña cō ndítahan caja ndó quiv̄i ndíquehe ndée yo —nacachi n̄a fariseo cán xih̄ín n̄a xíca tuun xih̄ín Jesús.

<sup>3</sup> Anda já nanducú ñehe Jesús tuhun nu ná já nacachi a:

—Á a ñáha cahvi ndó nuú tuhun Ndióxi nu cáhan sahá ña nacaja David sanahá tá nacuico da xih̄ín n̄a xíca xih̄ín dá. <sup>4</sup> Ña nacaja da cán quéa naquih̄vi da ini veñuhu Ndióxi ta nat̄iin da pan yii já naxixi da ña ta nasah̄an da ña nuú n̄a xíca xih̄ín dá ña ná cuxu na. Joo jut̄u cuití va cúu n̄a ndítahan nuú cuxu ña cán, nduu. <sup>5</sup> Ta yehe va, da nachindahá Ndióxi nduu ñayivi ín sahá i cahnda i chuun sahá quiv̄i ndíquehe ndée ñayivi —nacachi Jesús xih̄ín n̄a cán.

*Tá nandaja vaha Jesús in da nahich̄i ndáha*

*(Mt. 12:9-14; Mr. 3:1-6)*

<sup>6</sup> Inga tucu quiv̄i ndíquehe ndée ná já naquih̄vi Jesús ini in veñuhu ta nacasáhá jánah̄a nu ná. Ta ini mé veñuhu cán nasandacaan in dataa, da nahich̄i ndahá cuáha. <sup>7</sup> Ta ndaja coo n̄a jánah̄a ley Moisés xih̄ín n̄a fariseo nání n̄a Jesús sándehé n̄a ña á ndaja vaha mé á da cán quiv̄i ndíquehe ndée n̄a. Ta xih̄ín ña yóho cáhan n̄a cuu ñehe ín̄i ná jácojo na cuachi jatá. <sup>8</sup> Joo sa xín̄i va Jesús ña cáhvi ini n̄a cán. Sahá ña cán quéa nacachi a já xih̄ín da nahich̄i ndáha cán já:

—Cuándacō ta candichi mahñú yóho —nacachi Jesús xih̄ín dá.

Anda já nandaca ndichi da cán nuú Jesús.

<sup>9</sup> Anda já nacasáhá Jesús cáhan xihín java ga na ndúu cán já nacachi a já xihín ná:

—Cuni joho ndó ná ndaca tuhún i ndohó. Ndía cáchí ley ndítahan caja í mé quivi ndíquehe ndée ñayivi. Á chindeé yo ñayivi á caja í ña núu xihín ná. Á jácacú na á cahní yó na —nacachi Jesús xihín ná.

<sup>10</sup> Anda já nandicoto nihni Jesús nuú ndihi na nacava nuu ndúu xihín á cán. Ta nacachi a já xihín da nahichi ndáha:

—Jándacaa ndáhun.

Ta tá najándacaa da cán ndáha dá chí ivi laá nandivaha ndáha dá. <sup>11</sup> Joo tóco ndihi na java ndúu cán naxojo ndivaha ini na. Já nacasáhá ndítuhún xihín táhan na ña ndá quea cuu caja na já ná cuu jándihi na saha Jesús.

*Tá nacaxi Jesús uxu ivi da cacuu apóstol*

*(Mt. 10:1-4; Mr. 3:13-19)*

<sup>12</sup> Mé tañu já naquee Jesús nasahan in jini yucu caca tahví a nu Ndióxi. Ta ní cúu ñuu naxica tahví a nu Ndióxi. <sup>13</sup> Ta tá sa nativi já nacana mé á na xica xihín á. Ta tañu na cán nacaxi a uxu ivi da cacuu da in táhnda ta cananí apóstol, da chindahá a caca nuu cáhan tuhun Ndióxi. <sup>14</sup> Nacaxi a da naní Simón, da nasacu tucu a quivi cananí Pedro. Ta nacaxi a da cúu ñani Pedro, da naní Andrés. Ta nacaxi a Jacobo xihín Juan xihín Felipe xihín Bartolomé <sup>15</sup> xihín Mateo xihín Tomás xihín Jacobo, da cúu jahyi Alfeo. Ta nacaxi a Simón, da naxica cuénta na cananista. <sup>16</sup> Ta nacaxi ri a Judas, ñani Jacobo xihín Judas Iscariote, mé da najicó tuhún Jesús tá nu ndíhí.

*Jánaha Jesús nuú cuahá ñayivi*

*(Mt. 4:23-25)*

<sup>17</sup> Tá nandihí nanuu Jesús jini yucu xihín na xica tuun xihín á já naxinu a yojó ndaa nasahin a xihín ná. Ta

cán nasanduu ri cuahá ndivaha ñayivi táhan na naquixi ndijáá ñuu válí ndúu chí estado Judea xihín na ndúu ñuu Jerusalén xihín na ndúu ñuu Tiro xihín Sidón, ña ndúu yati yuhú tañuhú. Ta tóco ndihi ñayivi yóho naxinu na cuni johu na nu cáhan Jesús. Ta naxinu na jáchi cúní na ña ná ndaja vaha mé á na. <sup>18</sup> Ta tóco ndihi na nasañuhu ínimá quini ini nandaja vaha ri Jesús na jáchi natavá a ínimá quini nasañuhu ini na. <sup>19</sup> Ta tóco ndihi ñayivi cúní na caní ndaa ndáha ná Jesús jáchi xihín ndée mé á ndája vaha tóco ndihi na quíhvi.

*Jánaha Jesús ndá quiahva cajii chága iní já ná a cánduu cuéha yo*

*(Mt. 5:1-12)*

<sup>20</sup> Tá nandihí já nasandehé Jesús nuú na xíca tuun xihín á já nacasáhá cáchí a já xihín ná:

—Tahví nacuu ndó, na cándahví jáchi ndóhó cúu na cacomí Ndióxi cuéntá saha.

<sup>21</sup> Tahví nacuu ndó, na cuíco viti ñuhú jáchi ndóhó cacuu na chutú ndaa tá ná ndihi.

Tahví nacuu ndó, na sácu viti jáchi ndóhó cacuu na casáhá cuacu tá nu ndíhí.

<sup>22</sup> Tahví nacuu ndó tá cándají ñayivi ndóhó ta casáhá táxí na ndóhó á cánahá na xihín ndó. Ta tahví nacuu ndó tá quéhe núu na ndóhó sahá ña cáhán na ña cúu ndó na núu ndivaha. Tá ná caja na tóco ndihi ña yóho xihín ndo sahá ña cándeé ini ndó yehe, da nachindahá Ndióxi nduu ñayivi, tahví nacuu ndó. <sup>23</sup> Já quéa ndítahan cájii ndivaha ini ndó mé quivi já jáchi sa naxíca tahví Ndióxi in ña vaha ndivaha íin indiví quiahva nu ndo. Jáchi tá quiahva cája xíxi na jan xihín ndó viti quiahva já nacaja xíxi ri tásáhnú jícó na jan xihín na nasacuu profeta sanahá.

<sup>24</sup> Joo ndáhvi nacuu ndó, na cuicá viti jáchi sa nacajii ndivaha va ini ndó ñuyiví yóho.



<sup>25</sup> 'Ndáhví nācuu ndó, nā nāchutú ndaa viti jáchí ndóhó cúú nā quixi tama nuu.

'Ndáhví nācuu ndó, nā sácú viti jáchí ndóhó cúú nā cuacu xihín ña cacuéha ini ndó.

<sup>26</sup> 'Ndáhví nācuu ndó tá ná casáhá ñayivi cahan vaha na saha ndo jáchí quiahva já nācahan vaha tásáhnú jícó nā jan sahá nā profeta túhún nasanduu najándahvi ñayivi sanahá.

*Xíní ñúhú quíhví ini nā cō cúní mí*

*(Mt. 5:38-48; 7:12)*

<sup>27</sup> 'Tócó ndihi ndó, nā xíní joho nu cahan i yóho, ndítahan quíhví ini ndó nā cō cúní ndohó. Ta xíní ñúhú caja vaha ndó xihín ndá nā cándají ndohó. <sup>28</sup> Xíní ñúhú caca tahví ndó nu Ndióxi ña ná caja yíi á nā nāchicaan cháhan jata ndo. Ta caca tahví ndó nu Ndióxi sahá nā cánahá xihín ndo. <sup>29</sup> Ta ndá nā ná caní in xoo sajóho ndó, cata ñee ndó inga xoo sajóho ndó nu ná ña ná caní na. Ta tá ná candaa na jahmá ndeé ndo quiahva ndó ñamaní ña ná quehe ri na cotó ndo tá já cúní nā. <sup>30</sup> A cájíhnda ndó nuú nā xíca ñaha nu ndo. Ta ndá nā cándaa ña cúú ñaha ndó, a ndíndaca ndó ña nu ná. <sup>31</sup> Tá quiahva cúní ndó caja ñayivi xihín ndo quiahva já ndítahan caja ri ndóhó va xihín ná.

<sup>32</sup> 'Jáchí tá quíhví ini ndó ñayivi sahá ña quíhví ri ini nā cán ndohó va, ndía vaha cája ndó jáchí quiahva já cája ñayivi quini. <sup>33</sup> Ta tá cája vaha cuití ndo xihín nā cája vaha xihín mé ndó, ndía vaha cája ndó jáchí quiahva já cája ri ñayivi quini va. <sup>34</sup> Ta tá sahan tóo ndó ñaha ndó nuú ñayivi sahá ña cáhán ndo caja na ñamaní xihín mé ndó, ndía vaha cája ndó jáchí quiahva já cája ri ñayivi quini va. <sup>35</sup> Joo ndóhó, xíní ñúhú quíhví ini ndó nā cō cúní ndohó. Ta xíní ñúhú caja vaha ndó xihín ñayivi. Ta xíní ñúhú quiahva tóo ndó ñaha ndó ta a cándati ndó ña ná nducú

ñehe ña cán ña nu ndo. Tá ná caja ndó já já queá ñehe táhvi ndó ña vaha ndivaha caja Ndióxi ta nduu ndó jahyi Ndióxi, mé a cúu Ndióxi cáhnu ndivaha. Jáchi mé Ndióxi cándáhví ini a ndá ña co ndíquiahva ndixahvi nu mé á ta cándáhví ri ini a ñayivi quini va. <sup>36</sup> Xíní ñúhú táhnda ini ndó sahá ñayivi tá quiahva táhnda ini Ndióxi saha ná.

*Cō ndítahan candehé ndaa yó ñayivi*

*(Mt. 7:1-5)*

<sup>37</sup> A candehé ndaa ndó ñayivi já ná a cája Ndióxi já xihín ndo. A chícāan ndó cuachi jatá inga na já ná a quehe Ndióxi cuéntá sahá cuachi mé ndó. Caja cáhnu ini ndó saha ná já ná caja cáhnu ini Ndióxi saha mé ndó. <sup>38</sup> Jasá ndo ñaha nuú ñayivi já ná ñehe ndó ñaha nu Ndióxi. Cúu á tátuhun cája ñayivi tá jáchutú ña in ndoho xihín nuni ta quíji nihni na ndoho já ná ndituun a ta jácuyu chága ña nuni já táan ña ña ini a janda quiahva xita ña yuhú ndoho cán. Tá quiahva cája mé ndó xihín ñayivi quiahva já caja Ndióxi xihín ndo jáchi tá cuaha sahan ndó nuú ñayivi quiahva já cuaha quiahva ri Ndióxi nu ndóhó va — ñacachi Jesús xihín ña cán.

<sup>39</sup> Tá nandihí já ñasacu a quiahva nu ná já ñacachi a já:

—A cúu toho caja in ña cuaá candaca da inga ña cuaá cuhun ña jáchi ndíví já ña ndicava da yávi. <sup>40</sup> Ni in túhún toho ña xica jácuaha tiaha chága nu mé ña jáñaha ñahá cán. Joo tá ná xinu quívi já catiaha vaha da já candaa ini ña tóco ndihí ña xíní ña ñajánaha ñahá cán.

<sup>41</sup> Jáchi ndá cuéntá queá sándehe ndó ña núu cája ñani táhan ndó ta co sándehe ndo ndá quiahva náhnu chága ña núu cája mé ndó. Cúu á tátuhun ndácaan in xehe loho nduchú núu ñani táhan ndó nani ndácaan in yito ndúhu cáhnu ini nduchú núu ndo. <sup>42</sup> Ta tá a cúu cuni ndó yito cáhnu ndácaan ini nduchú núu mé ndó ndaja caja ndó

cachi ndó xihín ñani táhan ndó: “Ñani i, ná tavá loho i xehe ndácaan nduchú núún jan.” Jándahvi ndó mé ndó xihín ña cája ndó. Xíní ñúhú tavá ndo yító cáhnu ndácaan nduchú núú mé ndó já ná nuna nu ndó cuni vaha ndó já ná cuu tavá ndó xehe loho ndácaan nduchú núú ñani táhan ndó —ñacachi Jesús.

*Tá xíní yo cuihi in yító já cándaq iní ndá yító cúú dó*  
(Mt. 7:17-20; 12:34-35)

<sup>43</sup> Anda já ñacasáhá tucu a cáchí já:

—Coó toho yító vaha cúun cuihi quini nuu. Ta ni coó yító quini cuu cuun cuihi vaha nuu. <sup>44</sup> Jáchi xihín cuihi cúun nuú in in yító cándaq iní ndá yító cúú dó. A vája cúú tuhun sáhná ñayivi tití ñuhú nuú tohíñú. Ta ni a vája cúú tuhun sáhná na uva nuú tonáña yúcu. <sup>45</sup> In ta vaha cáhan da ndinuhu ña vaha jáchi ndinuhu ña vaha ñúhu ínima dá. Ta in ta quini cáhan da ndinuhu ña núu jáchi ña núu quéa ndácaan ínima dá. Jáchi yúhu ñayivi cána tóco ndihi ña ñandicutú ñúhu ínima ná —ñacachi Jesús.

*Sácú Jesús quiqhva sahá ivi da ñacavaha vehe*  
(Mt. 7:24-27)

<sup>46</sup> Cáhan tucu Jesús já cáchí a já:

—Ndá cuéntá quéa cáhan xitoho nahá ndó yehe ta co cája ndó ña sáhná i nu ndo. <sup>47</sup> Ná cahan i xihín ndó ndaja iin da vaxi nuú i cuni johó da tuhun cáhan i ta cája da ña cáchí i. <sup>48</sup> Cúú dá tátuhun in dataa ñacavaha vehe. Tá ñacasáhá da tává da sahá vehe da já ñasata cúná da já ná chinúu da vehe da jatá tóto. Ta tá ñasahnu cuahá yuta já ñacani ndaa ñihi ticuií cán jatá vehe da. Joo coó ñandicava vehe da ñacaja ticuií cán jáchi tóyíí cándichi vehe da jatá tóto cán. <sup>49</sup> Joo ndá da xíní johó nu cáhan i ta co cája da ña cáchí i, cúú dá tátuhun inga dataa, da ñacavaha vehe nu ñúhu uun. Ta coó ñasata da nuú ñanduxu sahá.

Ta tá nasahnu cuahá yuta já nacani ndaa nihi ticuií cán jatá vehe da. Ta xihín ña yóho nandicava vehe da ta chí nandihi saha chí uun —nacachi Jesús.

## 7

*Tá nandaja vaha Jesús in da cája chúun nuú in jefe soldado (Mt. 8:5-13)*

<sup>1</sup> Tá nandihi nacahan Jesús xihín ñayivi cán já naquee a cuahan chí Capernaum. <sup>2</sup> Mé ñuu Capernaum cán nasahjin in dataa, da sáhnda chuun nuú soldado naquixi ñuu Roma. Mé da yóho nasahjin in mozo da ta quihvi ndiva ha ini da mozo da. Joo ndaja coo mé mozo da yóho quihvi ndeé da ta janda ja chá quivi da. <sup>3</sup> Tá naxini joho da sáhnda chuun nuú soldado yóho sahá Jesús já nachindahá da java na sacuaha táhan na naquixi chíchi Israel já ná caca na ñamani nuú Jesús quixi a ndaja vaha mozo da cán. <sup>4</sup> Tá naxinu na cán nuú Jesús nacasáhá xíca tahvi ndiva ha na nu á já cáchí na já xihín á:

—Ín sahá da sáhnda chuun nuú soldado yóho ña ná chindeé ndó da. <sup>5</sup> Jáchí quihvi ini da tócó ndihi ñayivi ndúu nación Israel ta sa mé da jan cúu da nasahnda chuun ña ná cava ha na veñhu nde —nacachi na cán xihín Jesús.

<sup>6</sup> Anda já naquee Jesús cuahan xihín ná. Joo tá sa jalóho xinu coo na vehe da sáhnda chuun nuú soldado cán já nachindahá da java amigo da nuú Jesús ná cahan na yuhú nuu da já nacachi na já:

—A jandihi ndó mé ndó ndihvi ndó vehe e, xitoho i jachí coó saha toho i ña ná ndihvi ndó vehe e. <sup>7</sup> Sahá ña cán queá coó nasahan ndeé ini i cuhun i ndinducú u mé ndó. Joo janda nu ín ndó jan cahnda ndó chuun ña ná ndiva ha mozo i já ndiva ha da. <sup>8</sup> Jáchí ndúu java na náhnu chága sáhnda chuun nuú i. Ta ndúu ri soldado sáhnda ri yehe va chuun nuu. Ta tá chíndahá i in da ña ná cuhun da nu

cúni mí i cuhūn da ta cuahan da. Ta tá sáhndá i chuun nuú inga da ña ná quixi da nuú i ta vaxi da nuú i. Ta tá sáhndá i chuun nu mozo i ña ná caja da ña sáhndá i ta cája da ña —naxachi na.

<sup>9</sup> Tá naxini johō Jesús tóco ndihi ña naxahan amigo da sáhndá chuun nuú soldado cán xihin á já naxatóntó a xihin dataa cán. Anda já nasandehé a nu tóco ndihi ñayivi ndíco cuahan cán já naxachi a já xihin ná:

—Mé a ndaa ná cahan i xihin ndo ña a ñáha cuni i tañu na Israel in da cándeé cáhnu nahá ini Ndióxi tá quiahva cándeé cáhnu ini da yóho Ndióxi —naxachi Jesús xihin na ndíco jatá cán.

<sup>10</sup> Ta tá nandíco coo na cúu mozo da sáhndá chuun nuú soldado cán vehe da já naxini na ña sa nandivaha va da nasaquihvi cán.

### *Tá najánditacu Jesús jahyi in ña cuáan*

<sup>11</sup> Tá sa nayaha ña yóho já naquee Jesús cuahan chí in ñuu naní Naín xihín na xíca tuun xihín á. Ta a juú quiahva cuahá ñayivi ndíco cuahan. <sup>12</sup> Tá naxinu coo a yati yuhú ñuu cán já naxini a ñayivi ñéhe na in ndii cuahan na jánduxu na. Mé ndii cán nasacuu da in túhún já nu náná da, ña cúu ña cuáan. Ta a juú quiahva cuahá ñayivi ñuu cán ndáca táhan xihín ña cuahan na jánduxu na jahyi ña. <sup>13</sup> Tá naxini Jesús ña já natahvi ini a saha ña. Anda já naxachi a já xihín ña:

—A cuácu gaun.

<sup>14</sup> Anda já naxayati Jesús nuú sató ndii cán já naxani ndaa ndáha á do. Anda já nasacuíta na ndójo sató ndii cán. Ta naxahan Jesús xihín da cúu ndii cán já naxachi a já xihín dá:

—Yehe cahan i xuhun, da tacú, cuándacoo —naxachi Jesús xihín dá.

<sup>15</sup> Andá já nasacoo da nasacuu ndji cán ta nacasáhá da cáhan da. Já nandiquiahva Jesús da nu náná da. <sup>16</sup> Tá naxini tóco ndihi ñayivi cuahan cán ña nacija Jesús já yíhvi na. Ta nacasáhá na cája cáhnu na Ndióxi já cáchi na já:

—In profeta cáhnu ndivaha cúu da naxinu coo tañu mí yóho viti.

Ta nacachi tucu na:

—Ndióxi quea naxinu coo nu yo ña ná chindeé a ñayivi cuéntá mé á —nacachi na.

<sup>17</sup> Ta ní cúu ñayivi cuéntá estado Judea xihín na ndúu yati cán nacandaa ini na sahá ña nacija Jesús cán.

*Juan, da jácandúta ñayivi, nachindahá da java da xíca xihin dá nu Jesús*

*(Mt. 11:2-19)*

<sup>18</sup> Ta ndaja coo ñañehe Juan, da jácandúta ñayivi, tuhun saha tóco ndihi ña nacija Jesús yóho jáchi nandicani na xíca xihin Juan ña nu dá. Sahá ña cán quea nacana da ivi táhan da xíca xihin da <sup>19</sup> já nachindahá da na nu Jesús ña ná ndaca tuhún na mé á á jivi ndusa cúu á Cristo, mé a chindahá Ndióxi cacomí cuéntá sahá ñayivi, á ndítahan candati na inga ga quixi. <sup>20</sup> Tá naxinu na xíca xihin Juan nu iin Jesús já nacachi na já xihin á:

—Da naní Juan, da xíca jácandúta ñayivi, da cán cúu da nachindahá ndehe vaxi nde ndaca tuhún nde ndohó á cúu ndó Cristo, ña chindahá Ndióxi cacomí cuéntá sahá ñayivi, á ndítahan candati nde inga ga —nacachi na cán xihin Jesús.

<sup>21</sup> Mé hora naxinu coo na cán nu iin Jesús já naxini na nandaja vaha Jesús cuahá ñayivi quíhvi, na nasandoho tá nuú cuehe. Ta natavá a ínimá quini nasañuhu ínimá java na. Ta cuahá ndivaha na cuáá nandinuna nuu nacija

Jesús. <sup>22</sup> Sahá ña cán queá tá nanducú ñehe Jesús tūhun nuú na xíca xihin Juan cán já nacachi a já xihin ná:

—Cuáhán ndó ndicani ndó nu Juan saha tóco ndihi ña naxini ndó cája i xihin tóco ndihi ña naxini johó ndó cáhan i. Ta ndicani ndó nu dá ña ndínuna nuú na cuáá ta ndícaca na réncō cája i. Ta ndája vaha i na ndóho cuehe táhyi. Ta jándinuna i johó na jóho já ná cuni johó na. Ta jánditacu u ndji. Ta cáxi tūhun i tūhun Ndióxi nuú na ndahví já ná cuu cacu ndaa ínimā ná. <sup>23</sup> Tahví nacuu na cō jándacoo ña cándéé ini na yehē —nacachi Jesús xihin ná.

<sup>24</sup> Tá naquee na nachindahá Juan cán cuahan na já nacasáhá Jesús cáhan saha Juan nuú ñayivi cán já cáchi a já xihin ná:

—Ndía nacahán ndó cuni ndó tá naqueta ndó nasahan ndó sándehe ndo Juan yucú íchí cán. A juú da cán cúu taa láhá já quíji nuu da tátūhun quíji nuu in tíyoó cája tachí. <sup>25</sup> Ndía naqueta ndó candehé ndó. A juú da cán cúu taa ndíxi jahmá lándā ndivaha. Sa xínj vaha ndó ña cō ndúu toho da ndíxi jahmá lándā yucú íchí. Ndá da ndíxi jahmá lándā ta cája da ña cúnj yiquí cuñu da, mé da cán cúu da ndúu vehe rey cuití va. <sup>26</sup> Ndía nasahan ndó naxini ndó cán. Á coó nasahan ndó cuni johó ndó nu cáhan in da cúu profeta nu ndo. Mé a ndaa da cán cúu dá in profeta ta íin chága saha dá a juú ga inga profeta nasanduu sanahá. <sup>27</sup> Jáchí mé Juan cúu dá da cáhan tūhun Ndióxi saha tá cáchi a já:

Chindahá i in da canúu cūhun nu mún,

já ná caxa tiahva da íchí nuú quisún, já nacahyi a sanahá.

<sup>28</sup> Candehé ndo ná cahán i xihin ndo. Tañu tóco ndihi ñayivi coó ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuéntá saha ná, vatí cúu ná

na coó saha, na cán cúú na cáhnu chága a juú ga Juan — nacachi Jesús.

<sup>29</sup> Tá naxini johu tóco ndihi ñayivi ndúu cán ña yóho já nandicuni na ña cája ndaa Ndióxi tóco ndihi ñaha. Na nacahan já cúú na najácandúta Juan ta tañu na cán nasañuhu java ri na játaca jiuhún cuénta impuesto. <sup>30</sup> Joo na fariseo xihín na jánaha ley Moisés, na coó najácandúta Juan cán, na cán cúú na naquehe núu na tóco ndihi ñamaní cúní Ndióxi caja xihin ná. <sup>31</sup> Anda já nacachi Jesús já xihin ná:

—Ná cahan i xihin ndó ndaja iin ñayivi ndúu tiempo viti. <sup>32</sup> Cúú ná tátuhun na valí sácoo sájiquí nuú yahvi ta cáyuhú na nuú java ga na valí ndúu cán já cáchí na já: “Nativí nde tótíví nu ndo joo coó naxeen ndó cata sáhá ndo. Ta naxita cuéha ndivaha nde nu ndo ta ni coó nasacu ndó.” <sup>33</sup> Quiahva já iin ñayivi ndúu tiempo viti jáchi naquixi Juan, da jácandúta ñayivi ta naxijuhun da ta coó naxihi da vino joo nacachi ndó saha dá ña ndacaan ínima quini ini da. <sup>34</sup> Ta tá naxinu yehe, da nachindahá Ndióxi nduu ñayivi ta xíxi i pan ta xíhi i vino já nacasáhá cáchí ndo sahá i ña cúu u in taa ndehé ndivaha ta xíhi ndivaha i. Ta cáchí ndo ña cátóo ndivaha i cacuu u amigo na cája cuachi xihín na játaca jiuhún cuénta impuesto. <sup>35</sup> Joo na cúní cándaq ini ña ndaa, na cán cúú na cándaq ini ña cája Juan xihín yehe ña ndaa —nacachi Jesús xihín na cán.

### *Íin Jesús vehe Simón, da cúú fariseo*

<sup>36</sup> In táhan da fariseo nacana da Jesús ña ná cuxun a cuxu a vehe da. Anda já nasahan Jesús vehe da já nasacoo a nu mesa. <sup>37</sup> Joo ndaja coo in ñañaña, mé ña ñuu cán tá nañehe ña tuhun ña naxinu Jesús vehe Simón cán cuxu a já naxinu ña xihín in yúyú alabastro, ña nachutú ndaa xihin sítí támi sahan nacasaq ña nu Jesús. Mé ñañaña



yóho cúú ñá in ñá cája cuahá cuachi. <sup>38</sup> Ta sácu ñá ñacaxítí ñá saha Jesús ta xihín ticuú nū ñá najácuchu ñá sahá. Ta tá nandíhi já najáhichi ñá do xihín ijí jiní ña. Anda já natatí yúhu ñá sahá. Ta ñachojó ñá sítí támi sáhan cán jata saha á. <sup>39</sup> Tá ñaxini mé da fariseo, da ñacana Jesús vehe da cán ña yóho já ñacahán da já: “Tá profeta ndusa ná cacuu da yóho ta sa cándaá va ini da ndá ñá cúú ñá cáni ndaa ndáha saha dá jáchi cúú ñá ña cája cuahá cuachi”, ñacahán Simón cán.

<sup>40</sup> Anda já ñacachi Jesús já xihín da fariseo cán:

—Candehé Simón, cuni johó ná cahan i xuhun — ñacachi Jesús xihín dá.

Anda já ñacachi Simón cán já xihín Jesús:

—Cahan mé á xihín i, xitoho i — ñacachi da.

<sup>41</sup> Anda já ñasacu Jesús in quiahva nū dá já ñacachi a já xihín dá:

—Ñasanduu ivi dataa ta ñasayicá da jjuhún nū mé da sáhan tóo a cán. In da ñasayicá uhun ciento ta inga da ñasayicá ivi jico uxu. <sup>42</sup> Ta ni in da cán co ndéé da chahvi da ña yicá da sahá ña cán quéa ñacaja cáhnu ini da sáhan tóo jjuhún cán sahá ña yicá ndíví da cán. Ta viti cachún xihín i, Simón, ndá da cáhún tixi ndíví da yóho cacuu da da quihvi ini chága mé da, da ñacaja cáhnu ini saha cuéntá ña ñasayicá da cán — ñacachi Jesús xihín Simón.

<sup>43</sup> Anda já ñanducú ñehe Simón cán tuhun nū Jesús já ñacachi da já xihín á:

—Cája i cuéntá ña quihvi ini chága da ñasayicá cuahá jjuhún cán nū dá — ñacachi da.

Anda já ñacachi Jesús já xihín Simón:

—Mé a ndaa cáhún — ñacachi a.

<sup>44</sup> Anda já ñasandehé Jesús ñá ñachojó sítí sahá cán já ñacachi a já xihín Simón:

—Candehé vaha ñáñáha jan, Simón. Naquihvi i vehún joo coó nasahún ticuí ndoo sahá i. Joo ñáñáha yóho najácuchu ñá sahá i xihín ticuí nuu ña. Ta tá nandihi já najáhichi ñá sahá i xihin íj jini ña. <sup>45</sup> Ta yóhó, coó natatí yuhún sajóho yehe tá nasaa i vehún. Joo ñá yóho, janda nani naquihvi ñá vehún tátí yúhu ñá sahá i. Ta anda viti ñúhú cája ñá a. <sup>46</sup> Ta ni coó nachojó tohún sítí jini i tá naxinu i vehún. Joo ñá yóho nachojó ñá sítí támi sahan sahá i. <sup>47</sup> Ta cáhí i xuhun, Simón, ña xihín ña cája ñá yóho náha ña mé a ndaa quihvi ini ñá yehe jáchi nacaja cáhnu ini i sahá cuachi ñá vatí cuahá ndivaha cúu á. Joo ndá na cáhán ña chá cuití va cuachi cája cáhnu ini i saha, na cán cúu ri na chá cuití quihvi ini na yehe —nacachi Jesús xihin Simón.

<sup>48</sup> Anda já nacasáhá cáhí a já xihin ñáñáha cán:

—Sa nacaja cáhnu ini i sahá cuachún viti.

<sup>49</sup> Ta tóco ndihi java ga na nataca ndúu coo nu mesa vehe Simón cán nacasáhá cáhí xihin táhan na já:

—Ndá taa cúu da yóho jáchi janda cuachi cája ñayivi cája cáhnu ini da saha —nacachi xihin táhan na cán.

<sup>50</sup> Anda já nacachi Jesús já xihin ñáñáha cán:

—Nacacu ndaa ínimun jáchi nacandeé inún yehe. Cuanúhu ta a ndícani ga inún viti —nacachi Jesús xihin ña.

## 8

### *Tá java najihí chindeé na Jesús*

<sup>1</sup> Tá nandihi nayaha ña yóho já nacasáhá Jesús xica nuu a cuahá ñuu náhnu xihín ñuu válí ña caxi tuhun a xihin ná ña sa nacayati quiví cacomí Ndióxi cuéntá saha ná. Ta ndíco ndíhuxu ivi na apóstol cán mé á. <sup>2</sup> Ta nasandaca táhan java ri najihí xihin á, na natavá mé á ínimá quini ini xihín na nandaja vaha mé á nuú cuehe nasandoho na.

Taño najihí yóho nasandacaan ñá naní María, ñá cáhan na Magdalena xihin. Mé María yóho cúu ñá ñatavá Jesús usa ínima quini ini. <sup>3</sup> Ta cátahan ri in ñá naní Juana cuahan ñá xihín na cán. Mé Juana cúu ñá ñájihí da naní Chuza, da cómi cuénta sahá vehe Herodes. Ta jári in ñá naní Susana naxica nuu ñá xihin Jesús. Cuaha chága najihí naxica nuu na xihin á ta nachindeé ñahá na xihín ña cómi na.

*Sácú Jesús quiahva sahá in da sátá tata*

*(Mt. 13:1-17; Mr. 4:1-12)*

<sup>4</sup> Naqueta ñayivi cuahá ñuu jáchi cuni na cuni na Jesús. Ta tá sa ñataca cuahá ñayivi nu in Jesús, ñacasahá cáhan xihin ná. Ta nasacu a in quiahva nu ná já ñacachi a já xihin ná:

<sup>5</sup> —In da sátá tata ñaquee da cuahan da cata da ña. Ta tá sátá da ña cuahan da já ñacuyu java ña íchi. Ta tá ñayaha ñayivi já nachiníhni saha johu na a ta já ñaxinu laa nasaxí rí ña. <sup>6</sup> Ta java tata cán ñacuyu a taño yuu. Ta tá ñanduta mé tata cán, cama chá nahichi a jáchi íchi ndivaha taño yuu cán. <sup>7</sup> Ta java ga tata cán ñacuyu a taño tohínú ta tá ñanduta ña já ñanditaha ndihi a ñacaja tohínú, dó nasahnu xihin á cán. <sup>8</sup> Joo java tata ñacuyu a nu ñuhú vaha. Ta tá nasahnu a já najáquee na cuahá ñaha nu á. Janda in ciento tata ñacana jatá in in nuú tata cán —ñacachi Jesús xihin ná.

Ta tá ñandihí ñandicani Jesús ña yóho nu ná já ñacahan cóhó a nu ná já ñacachi a já xihin ná:

—Ndá ndó, na in johu, ná cuni johu ndó —ñacachi Jesús xihin na cán.

<sup>9</sup> Anda já ñacasahá na xica tuun xihin á cán ndaca tuhún na mé á ndía cuni cachi quiahva ñacachi a xihín ñayivi cán. <sup>10</sup> Ta ñanducú ñehe Jesús tuhun nu ná já ñacachi a já xihin ná:

—Ñã cõó ñacandaa ini ndó jihna, ñã cán cándaã ini ndó viti jáchĩ ñasuná Ndióxi xíní túnĩ ndó candaã ini ndó ndá quiahva cacomí mé á cuéntá sahá ñayivi. Joo sácú u quiahva nuú java ga ñayivi já queá vatí sándehe ná joo cúú ná tátuhun ñã cõ tívi nuu. Ta vatí xínĩ joho na, cúú ná tátuhun ñã joho jáchĩ cõ cándaã ini na ñã cáhan i xihĩn ná —ñacachi Jesús xihĩn ñã xíca tuun xihĩn á cán.

*Ndicani Jesús ñã cúnĩ cachi quiahva ñasacu a nuú ñã cán (Mt. 13:18-23; Mr. 4:13-20)*

<sup>11</sup> Ñã ñã já ñacachi Jesús já xihĩn ná:

—Ñã yóho cúnĩ cachi quiahva ñasacu u nuú ñayivi yóho: Mé tata cán cúú á yuhú nuú tuhun Ndióxi, ñã xíca java na cáhan ñã xihĩn ñayivi. <sup>12</sup> Mé tata ñã ñandicava íchĩ cán náha nu yõ ndá quiahva ín java ñayivi. Xínĩ joho na tuhun Ndióxi joo tá ñandihĩ já vaxi tiñhá sacuaã ta cája rí xihĩn ná ñã ndíndójõ ñã ñã já ná a cándúsa na tuhun Ndióxi ñã ná a cácu ndaa ínimã ná. <sup>13</sup> Ta tata ñã ñandicava tañu yuu cán náha nu yõ ñã ndúu java ñayivi ta xínĩ joho na tuhun Ndióxi ta cájii ínĩ ñã ndíquehe na ñã. Joo sahá ñã cõ ñéhe ínĩ yóho á cuhun cúná a sahá ñã cán queá chá tiempo cuití va cándúsa na tuhun Ndióxi. Jáchĩ tá cásáhá ndóho ini na sahá tuhun Ndióxi chí jándacoo va na ñã. <sup>14</sup> Ta tata ñã ñandicava tañu tohíñú cán náha nu yõ ñã ndúu java ñayivi ta xínĩ joho na tuhun Ndióxi joo cõ jándacoo na íchĩ ñaxíca na jihna. Ta cásáhá ndicani ini na sahá ñaha ñuyívĩ yóho ta cásáhá ñã cátóó ñã canduu cuahá ñaha cuícá nu ná ta cásáhá ndicají ini na caha na ñã núu. Sahá ñã cán queá cúú á tátuhun tata ñã cõ cána ñaha jáquee na nuu jáchĩ cõ ñasahnu na xihĩn tuhun Ndióxi. <sup>15</sup> Joo tata ñã ñandicava nu ñuhú vaha cán náha nu yõ ñã ndúu java ñayivi ta xínĩ joho na tuhun Ndióxi xihĩn ndinuhu ini na ta cája na ñã sáhndá a nu ná. Ta sahá ñã ndícõ cáhnu na Ndióxi ta cõ jándacoo na mé á sahá ñã cán queá cúú ná tátuhun tata

na<sub>s</sub>aha<sub>n</sub> cua<sub>h</sub>á ñ<sub>h</sub>a ñ<sub>a</sub> cuu já<sub>q</sub>uee na nuu já<sub>ch</sub>i sá<sub>h</sub>nu na xihín tuhun Ndióxi —na<sub>c</sub>achi Jesús ndícani a nuú na xíca tuun xihín á cán.

*Sácú Jesús in quiahva sahá in lámpara*

*(Mr. 4:21-25)*

<sup>16</sup> Ni in túhún toho ñ<sub>h</sub>ayivi co ndícahmi na in lámpara ta anda já chí<sub>j</sub>ahvi na jatá xihín in ñ<sub>h</sub>aha. Ta ni co chí<sub>c</sub>aan jehé na ñ<sub>a</sub> tixi xito. Ñ<sub>a</sub> cája na queá chínúu jí<sub>c</sub>ó na ñ<sub>a</sub> já ná yehe a nuú na quí<sub>h</sub>vi ini vehe cán. <sup>17</sup> Ni in túhún toho ñ<sub>h</sub>aha a cuú coo jehé nahá já<sub>ch</sub>i xinu quí<sub>v</sub>i já ndáca náha nu á. Ta ni in tuhun na<sub>c</sub>ahan jehé ñ<sub>h</sub>ayivi a cuú coo jehé nahá já<sub>ch</sub>i xinu quí<sub>v</sub>i já canda<sub>a</sub> ini tó<sub>c</sub>ó ndihi ñ<sub>h</sub>ayivi sahá tuhun na<sub>s</sub>ahíin jehé cán.

<sup>18</sup> Sahá ñ<sub>a</sub> cán queá ndítahan coo johó vaha ndó nu cáhan i xihín ndo. Já<sub>ch</sub>i da ín ñ<sub>h</sub>aha nuu, ñ<sub>e</sub>he tá<sub>h</sub>vi dá coo chága ñ<sub>h</sub>aha nu dá joo da coó ñ<sub>h</sub>aha nuu, janda ñ<sub>a</sub> loho ín nu dá ndindaa —na<sub>c</sub>achi Jesús.

*Tá naxinu coo náná Jesús xihín ñani a nu ín a*

*(Mt. 12:46-50; Mr. 3:31-35)*

<sup>19</sup> Anda já naxinu coo náná Jesús xihín ñani a mé nu ín a cán. Joo coó na<sub>c</sub>uu cayatí na nu á já<sub>ch</sub>i a juú quiahva nachutú ñ<sub>h</sub>ayivi ndúu na xihín á cán. <sup>20</sup> Anda já na<sub>s</sub>ahan in da caxi tuhun da xihín Jesús já cá<sub>ch</sub>í da já xihín á:

—Jatá véhe cáa ín nánún xihín ñanún ta cáhan na xuhun cúni na —na<sub>c</sub>achi da cán xihín Jesús.

<sup>21</sup> Anda já na<sub>c</sub>achi Jesús xihín tó<sub>c</sub>ó ndihi ñ<sub>h</sub>ayivi ndúu cán já:

—Ndá na xí<sub>n</sub>i johó tuhun Ndióxi ta cája na ñ<sub>a</sub> cá<sub>ch</sub>í a, na cán cúú ná tátuhun náná i xihín ñani i —na<sub>c</sub>achi Jesús xihín ná.

*Tá najacátáji Jesús tachí xihín tañuhú tá ndícojo do*

*(Mt. 8:23-27; Mr. 4:35-41)*

<sup>22</sup> In quiv̄i naquih̄vi Jesús ini in barco xih̄n̄ n̄ x̄ica tuun xih̄n̄ á. Ta já nac̄achi a já xih̄n̄ ná:

—Cóho inga xoo tañuh̄ yóho.

Anda já naquee na cuah̄an n̄. <sup>23</sup> Ta nani xójo cava na tañuh̄ cán cuah̄an n̄ já nanaá ini Jesús naquij̄i á. Ta in náá cuití nax̄inu in tach̄i quini ndivaha nuú tañuh̄ cán ta nacasáhá ndíndita dó ta jáchutú do ini barco cán. Ta chí iȳo ndivaha cáa jách̄i cuu cac̄o barco cah̄á ticuif̄. <sup>24</sup> Anda já nasah̄an n̄ ndíñehe na Jesús já nac̄achi na já xih̄n̄ á:

—Maestro, Maestro. Cáōo barco yo cah̄á ticuif̄ cuah̄an do —nac̄achi na xih̄n̄ á.

Anda já nandicōo Jesús já nacasáhá jánani a tach̄i xih̄n̄ ticuif̄ ndícojo cán. Tá nandihi já najáyaa mé á tach̄i xih̄n̄ ticuif̄ chí táji níi uun nacand̄o nuú tañuh̄ cán. <sup>25</sup> Anda já nac̄achi Jesús já xih̄n̄ n̄ x̄ica tuun xih̄n̄ á:

—Ndaja vaha co cándee ini ndó yehe —nac̄achi a.

Joo ná cán nayih̄vi n̄ ta nacatóntó n̄. Ta chí jandá ndáca tuh̄n̄ táhan na já cách̄i n̄ já:

—Ndá da cúu dat̄aa yóho ña anda tach̄i xih̄n̄ tañuh̄ cándusa nu cáhan da —nac̄achi xih̄n̄ táhan n̄ cán.

*Tá nat̄ava Jesús ínima quini nasañuhu ini in dat̄aa ñuu Gadara*

*(Mt. 8:28-34; Mr. 5:1-20)*

<sup>26</sup> Tá nandihi já cuah̄an n̄ ta nax̄inu coo na ñundáhyi cuéntá Gadara, ña cánd̄o inga xoo tañuh̄ ta ndícoto nihni táhan xih̄n̄ estado Galilea. <sup>27</sup> Tá nanuu Jesús barco cán já nacayati in dat̄aa, da ñuu Gadara cán nu á. Mé da yóho sa nacanahá ndivaha ñúhu ínima quini ini da. Ta já cáa vichí láhlá da x̄ica nuu da. Ta ni co íin da vehe. Tañu nu jánduxu n̄ ndij̄i cán va íin tuun da. <sup>28</sup> Tá nax̄ini da Jesús nandicava xítí da nu á ta já nacayuh̄ da já nac̄achi da já xih̄n̄ á:

—Ndá cuéntá queá vasún quihvi nuún xihín i. Yóhó cúún Jesús, da cúú in túhún jini já jahyi Ndióxi, ña cáhnu ndivaha. Xíca tahví i nuún ña ná a jándohún ini i.

<sup>29</sup> Nacachi da ña yóho xihín Jesús jáchi nacasáhá sáhndá mé á chuun nu ínima quini cán ña ná quee rí ínima da cán. Ta cuahá tañu nasatiin rí da. Ta vatí nacató na ndáha dá xihín saha dá xihín cadena joo nasahnda túhun dá ña nacaja rí quini cán. Ta já nacaja rí ña ná cunu da cuhun da chí yucú íchí nuú co ndúu ñayivi. <sup>30</sup> Nandaca túhún Jesús mé rí quini cán já nacachi a já xihín ri:

—Ndaja nanún.

Anda já nanducú ñehe da cán tuhun nu á já nacachi da já xihín á:

—Legión naní i.

Nacachi da cán ña naní da Legión jáchi cuahá ndivaha rí quini nandihvi rí ini da. <sup>31</sup> Ta mé rí quini ñúhu ini da cán naxíca tahví rí nu Jesús ña ná a chindahá a rí cuhun rí nu ndúu ínima ndii. <sup>32</sup> Ta yati in ndica yucú cán nasanduu cuahá ndivaha cóchí xixáhan rí. Saha ña cán queá naxíca rí quini cán ñamaní nu Jesús ña ná ndihvi rí ini cóchí ndúu cán. Anda já nasahan Jesús ñamaní nu ri. <sup>33</sup> Chí naquee rí quini dataa cán cuahan rí já nandihvi rí ini cóchí cán. Ta tóco ndihi cóchí yóho xínu rí cuahan rí nanuu rí nu ndáyi já najáqueta nuu rí mé rí ini tañuhú cán ta já nacandaa rí ticuí já naxihí ri.

<sup>34</sup> Tá naxini mé dataa ndáá cóchí cán ña yóho já naxinu da cuahan da caxi tuhun da ña nayaha yóho nuú ñayivi ñuu Gadara cán xihín nuú java ga na ndúu yati cán. <sup>35</sup> Anda já naqueta ñayivi sándehe na ña nacuú cán. Ta tá naxinu coo na nu ín Jesús cán já naxini na ín coo mé da nasañuhu rí quini ini cán saha Jesús. Ta sa nandaca ndixi da jáhma ta chí sa nandicaxí táhyi ini da. Tá naxini na ña yóho chí nayihví na. <sup>36</sup> Ta na naxini nuú natavá

Jesús rí quini ini dataa cán, na cán cúú na nandicani ña nuú na coó naxini cán. <sup>37</sup> Tá naxini joho na ñuu Gadara cán ndaja nasahin ja naxica tahví ndihi na nu Jesús ña na quee a cuhun a jáchi yíhvi ndivaha na. Sahá ña cán quéa nandihvi tucu Jesús ini barco cán ña na quee a cuhun a. <sup>38</sup> Joo tá camaní quee a cuhun a ja nacasahá da naqueta rí quini ini cán xica tahví da nu Jesús ña na quiahva mé á ñamaní cuhun da xihin á. Joo nasahnda Jesús chuun nu dá ña na candoo da. Já nacachi a ja xihin dá:

<sup>39</sup> —Cuanúhu vehún. Ta ja ndicanún nuú na vehún ndaja náhn ña ha nacaja Ndióxi xuhun —nacachi Jesús xihin da cán.

Anda ja naquee da cán cuahan da. Já nandicani da nu tóco ndihi na Gadara cán ndaja cáa ña nacaja Jesús xihin dá.

*Tá nandaja vaha Jesús jahyi jíhí Jairo xihin in ña nacani ndaa ndáha jáhma á*

*(Mt. 9:18-26; Mr. 5:21-43)*

<sup>40</sup> Tá nandicó coo Jesús inga xoo tañuhú cán, a juú quiahva cavatá ñayivi naxinu na ndiquehe na mé á jáchi mé cán nasanduu na ndáti na mé á. <sup>41</sup> Anda ja nacasaa in dataa nani Jairo, da sáhdá chuun veñuhu. Mé Jairo yóho naxinu da nacaxítí da saha Jesús ja naxica tahví da nu á ña na cuhun a vehe da. <sup>42</sup> Jáchi xíhi ña loho cúú jahyi jíhí da ta in ja cúú ña nu dá ta ndácaan ña tátuhun uxu ivi cuia. Chí naquee Jesús cuahan ta nani xica cuahan vehe Jairo cán a juú quiahva cuahá ñayivi ndíco na jatá cuahan na ta chí janda cándíhi na mé á cuahan na.

<sup>43</sup> Ta tañu ñayivi cuahan cán ndácaan in ñáñaha ta ndítahví nii ña tixi uxu ivi cuia. Ta najándihi ndihi ña jiuhún ña nuú na cája tátá ñayivi joo ni in na coo nacuu caja tátá ñahá. <sup>44</sup> Joo nacayati ña chí jata Jesús ta nañiin ña yúhu jáhma á. Chí ivi laá nasacuiin nii ña cán.



<sup>45</sup> Anda já ñacasáhá Jesús ndáca tuhún a tóco ndihi ñayivi já ñacachi a já xihín ná:

—Ndá ndó ñacani ndaa ndáha yehe —ñacachi a xihín ná.

Joo ni in na coó ñasahan tuhun nu á. Sahá ña cán quéa ñacachi Pedro xihín java ga da xíca tuun xihín mé á cán já xihín á:

—Maestro, a juú quiahva cándíhi ñayivi mé ndó ta chindahá nihni johó na mé ndó vaxi na ta cáa ga mé ndó ndáca tuhún ndo ndá na ñacani ndaa ndáha ndohó —ñacachi da cán xihín á.

<sup>46</sup> Anda já ñacachi Jesús já:

—Ín in na ñacani ndaa ndáha yehe jáchi ñacandaa ini i ña ñandivaha in na xihín ndée mí i —ñacachi Jesús.

<sup>47</sup> Joo ndaja coo mé ña ñandivaha cán tá ñaxini ña ña ñacandaa ini Jesús sahá ña ñacaja ña já ñandiquiji ñinu ña xihín ña yíhvi ña ta já ñaxinu coo ña ñacaxítí ña nu Jesús. Ta nu ndíhi ñayivi ndúu cán ñacasáhá ña ndícani ña nu á ndá cuéntá quéa ñacani ndaa ndáha ña mé á chí ivi laá ñandivaha ña. <sup>48</sup> Anda já ñacachi Jesús já xihín ña:

—Jahyi a, ñandivahún jáchi ñacandúsún yehe. Cuanúhu. Ta a ndícani ga inún —ñacachi Jesús xihín ña.

<sup>49</sup> Ta nani cáhan Jesús xihín ña cán já ñaxinu in da ñaquixi chí vehe Jairo, da sáhdá chuun veñuhu cán. Já ñacachi da cán já xihín dá:

—Sa ñaxihí va jahyi ndó. A jáquihvi ga ndó da xíca jánaha ñayivi jan.

<sup>50</sup> Joo tá ñaxini johó Jesús ña ñacachi da cán já ñacachi a já xihín Jairo:

—A cáyhvi tohún. Candúsa cuití vún yehe chí ndivaha va jahyún —ñacachi Jesús xihín dá.

<sup>51</sup> Tá naxinu coo Jesús vehe Jairo cán coó naxeen a quiahva ñamani ña ná quihvi ñayivi ini vehe cán xihin á. Na naquihvi xihin á nasacuu Pedro xihin Jacobo xihin Juan xihin tátá mé ña loho cán xihin náná ña. <sup>52</sup> Jandá joho ndíváá ñayivi sácu ndivaha na ndúu na saha ña loho cán. Anda já nandicahan Jesús xihin ná já nacachi a já:

—A cuácu ndó. Coó naxihí toho ña loho yóho. Quíji cuití va ña —nacachi a xihin ná.

<sup>53</sup> Joo nacasáhá na cán sácu ndaa na Jesús jáchí xíní na ña sa naxihí ña loho cán ta sa cúu ña ndíi. <sup>54</sup> Anda já natiin Jesús ndáha ña naxihí cán já nacahan cóhó a xihin ña já nacachi a já:

—Ñá loho, cuándacoo.

<sup>55</sup> Chí ívi laá nanditacu ña loho cán já nandicoo ña. Ta nasahnda Jesús chuun ña ná quiahva na ña cuxu ña. <sup>56</sup> Chí a juú quiahva nacatóntó tátá náná ña loho cán sahá ña nacaja Jesús. Joo nasahnda Jesús chuun nu ná ña ná a ndícani na nuú ni in ñayivi sahá ña nayaha.

## 9

*Tá natchindahá Jesús ndíhuxu ívi na xíca tuun xihin á ña ná cūhun na caxi tūhun na tūhun Ndióxi nuú ñayivi*

*(Mt. 10:5-15; Mr. 6:7-13)*

<sup>1</sup> Najánditaca Jesús ndíhuxu ívi na xíca tuun xihin á já nasahan ndée nu ná ña ná cuu tavá na tá nuú ínima quini núhu ini ñayivi ta nasahan ndée mé á nu ná ña ná cuu ndaja vaha na tá nuú cuehe ndóho ñayivi. <sup>2</sup> Nasahnda Jesús chuun nu ná ña ná caxi tūhun na xihin ñayivi ña sa nacayati quíví cacomí Ndióxi cuéntá saha ná. Ta nasahnda chuun nu ná ña ná ndaja vaha na na quíhvi. <sup>3</sup> Ta nacachi a já xihin ná:

—A cánehe ndó ñaha cūhun ndó íchi. Ni garróté ni yátí ni pan ni jiuhún a cánehe ndó cūhun ndo. In túhún cotó

cañehe ndó cūhūn xih̄in ndo. <sup>4</sup> Tá ná xīnū cōo ndó in vehe, canduu ndó vehe jan jānda quiahva ná ndindaa quiví quee ndó cūhūn ndo. <sup>5</sup> Ta ndá ñuu nuú cō cūni nā ndiquehe vaha na ndohó, cuáhán quee ndó ñuu jan ta catí ndó ña yácá saha ndo já ná naha ña cuahan cuachi nā cán jata mé va na —nacachi Jesús xih̄in ná.

<sup>6</sup> Anda já naquee nā cán cuahan nā ta nasahan nā naxica nuu na ndijáá ñuu válí. Xíca na cáxi tuhun na nuú ñayivi tuhun vaha cáhan saha Jesús, mé a cuu jácacu ñahá. Ta ndája vaha na nā quíhvi.

*Tá naxihi Juan, da nacaja ndúta ñayivi*

*(Mt. 14:1-12; Mr. 6:14-29)*

<sup>7</sup> Ta ndaja coo Herodes, da cúú gobernador cán nacanda ini da saha tóco ndihi ña cája Jesús. Ta chí cō xīni da ndía cahán da jáchi java na cáchi nā xih̄in dá ña cúú Jesús mé Juan, da najácandúta ñayivi ta viti nanditacu tucu da cáchi java na xih̄in dá. <sup>8</sup> Ta java ri na cáchi nā ña cúú Jesús profeta Elías, mé da naxica nuu sanahá ta viti naxinu tucu da nu ná. Ta java na cáchi nā ña cúú á in táhan nā profeta nasanduu sanahá joo túní quea nanditacu tucu a xíca nuu a, cáchi nā. <sup>9</sup> Anda já nacachi Herodes já xih̄in ná:

—Mí yehe cúú da nasahnda chuun ña ná chitúhūn ná jico da naní Juan cán. Ta cō xīni ndá da cúú da naní Jesús yóho. Jáchi mé a ndaa xīni johō i ña cája cuahá ndivaha da ña náhnu —nacachi Herodes cán.

Ta chí cūni Herodes cuni da Jesús.

*Sáhan Jesús ña cuxu uhun mil taa*

*(Mt. 14:13-21; Mr. 6:30-44; Jn. 6:1-14)*

<sup>10</sup> Tá nandicó cōo nā nachindahá Jesús caca nuu cahan tuhun Ndióxi xih̄in ñayivi cán nuú ín mé á já nandicani na nuú á saha tóco ndihi ña nacaja na nuú nasahan nā. Anda já ñehe Jesús nā nasahan nā in nuú cáa xóo yati chí ñuu

Betsaida cán. <sup>11</sup>Joo tá n̄acandaa ini ñayivi ndá xoo cuahan Jesús já ndíco n̄a cuahan n̄a. Ta n̄andiquehe vaha Jesús na ta n̄andicani a nu ná ña s̄a n̄acayati quiví cacomí Ndióxi cuéntá sahá ná. Ta n̄andaja vaha mé á n̄a quíhvi.

<sup>12</sup>Ta tá s̄a cáhini cuahan já n̄acayati ndíhuxu ivi n̄a apóstol cán nu Jesús já n̄acachi na já xihín á:

—Cahan ndó xihín ñayivi ná quee na cūhun n̄a ndiquehe ndée ná ta ná nducú n̄a ña cuxu na ñuu válí xihín nuú yati chá yóho nu ndúu ñayivi jáchi coó ñaha mé va nu ndúu yóho —n̄acachi n̄a cán xihín Jesús.

<sup>13</sup>Anda já n̄acachi Jesús já xihín ná:

—Mé ndó quiahva ndó ná cuxu na —n̄acachi a xihín ná.

Anda já n̄acachi n̄a cán já xihín á:

—Uhun víxí pan xihín ivi laá tiyacá cuití va ín nuú nde. Ta ama ná cūhun ri ndehe cueen nde ñaha cuxu tóco ndihi ñayivi ndúu yóho —n̄acachi n̄a cán.

<sup>14</sup>Jáchi ñayivi cán cúu ná tátuhun uhun mil taa. Anda já n̄acachi tucu Jesús já xihín n̄a xíca tuun xihín á:

—Cacu coo ndó n̄a tá táhnda ivi jico uxu, ivi jico uxu n̄a.

<sup>15</sup>Chí nasacu coo ndíhuxu ivi n̄a apóstol cán n̄a. <sup>16</sup>Anda já n̄atiin Jesús ndíhuhun pan xihín ndíví tiyacá cán já nasandehé a chí indiví já n̄andiquiahva ndixahvi nu Ndióxi sahá ña cán. Tá n̄andihi já nasahnda java táhví a ña já nasahan ña nuú n̄a xíca tuun xihín á cán já n̄anditahnda ña cuxu ñayivi ndúu cán. <sup>17</sup>Ta tóco ndihi na nañehé n̄axixi janda quiahva n̄achutú tixi na. Tá n̄andihi já n̄ajachutú n̄a uxu ivi toyicá xihín ña n̄acandoo n̄axixi ndihi n̄a cán.

*Tá náhma Pedro ña cúu Jesús mé a n̄achindahá Ndióxi cacomí cuéntá sahá ñayivi*

*(Mt. 16:13-28; Mr. 8:27-9:1)*

<sup>18</sup> In tañu tá ñacana xóo Jesús xihín ña xíca tuun xihín á ña caca táhvi a nu Ndióxi já nandaca tuhún mé á ña já ñacachi a já xihín ná:

—Ndá ña cáchi ñayivi cúu yehe —ñacachi a xihín ná.

<sup>19</sup> Anda já nanducú ñehe ña cán tuhun nu á já ñacachi na já xihín á:

—Java ñayivi cáchi ña ña cúu ndó Juan, ña najácandúta ñayivi. Ta java na cáchi ña ña cúu ndó profeta Elías. Ta cáchi java ga ví ña ña cúu ndó in táhan profeta ñasanduu sanahá, ña nanditacu tucu xíca nuu viti —ñacachi ña xíca tuun xihín Jesús cán.

<sup>20</sup> Anda já nandaca tuhún Jesús ña já ñacachi a já xihín ná:

—Ta ndóhó ri ndá ña cáchi ndo cúu u —ñacachi a xihín ná.

Anda já ñacachi Pedro já xihín á:

—Mé ndó cúu Cristo, ña ñachindahá Ndióxi cacomí cuéntá sahá ñayivi —ñacachi ña xihín á.

<sup>21</sup> Joo ñacachi Jesús xihín ña xíca tuun xihín a ña coto a ndícani na ña yóho nuú ni in tuhún ñayivi. <sup>22</sup> Anda já ñacachi a já xihín ña cán:

—Yehe cúu u ña ñachindahá Ndióxi nduu ñayivi ta ndítahan nuú i ndoho ndivaha ini i. Ta ña sacuahá veñuhu xihín ña sacuahá nuú jutú xihín ña jánaha ley Moisés candají ña yehe ta anda já cahní ña yehe. Joo tá ná xinu uní quivi já nditacu tucu u —ñacachi a xihín ná.

<sup>23</sup> Tá nandihi já ñacachi tucu a já xihín ndihi ña xíca tuun xihín á cán já:

—Ndá ña cúní candico yehe ndítahan nu ná ndíhi chága ini na sahá yehe a juú ga sahá mé ná. Ta ndijáá ní quivi ndítahan coo tiaha na ndoho ini na sahá yehe ta coo caja toho a ná quivi na sahá i. <sup>24</sup> Jáchi ndá ña cátóo coo chága ñuyiví yóho ndihi sahá ná. Joo ndá ña sáhan ndeé ini quivi sahá i ñehe táhvi ná catacu na anda ama cáa quivi.

<sup>25</sup> Vatí ná quee vaha in na ñuyiví yóho ta cómi nā tóco ndihi ñaha ñuyiví joo ndá chuun queá tá nu ndíhi ndihi saha ná indayá. <sup>26</sup> Ndá nā cácahan nuu sahá i xihín sahá tuhun vaha cáhan i quiahva já cacahan ri nuú yehe, da nachindahá Ndióxi nduu ñayivi sahá nā cán tá ná quixi i cacomí i cuéntá sahá ñayivi. Mé tiempo cán nahá ndaja cáhnu cúu yehe jáchi quixi i xihin ndée Ndióxi ta xihin ndée tátō mé á viti. <sup>27</sup> Mé a ndaa ná cahan i xihin ndo ña ndúu java nā ndíta yóho ta ni a quiví toho na janda quiahva ná xinu quiví cuni na cacomí Ndióxi cuéntá sahá ñayivi —nacachi Jesús xihín nā cán.

*Tá nandijama Jesús quiahva cáa*

*(Mt. 17:1-8; Mr. 9:2-8)*

<sup>28</sup> Ta tá nayaha tátuhun unā quivi nacachi Jesús ña yóho xihin ná já nandaa jiní in yúcu ña caa tahví a nu Ndióxi. Ta ndáca táhan Pedro xihin Jacobo xihin Juan cuahan nā xihin á. <sup>29</sup> Ta nani xíca tahví Jesús nu Ndióxi já nandijama quiahva cáa nuu á. Ta janda jáhma ndíxi a cán nandiyaa cachi ña ta chí a juú quiahva yehe ña. <sup>30</sup> Anda já naxini na ivi taa ndúu da ndítuhún da xihin Jesús. In da cán cúu Moisés ta inga da cán cúu Elías. <sup>31</sup> A juú quiahva ndató ndíyehe ndaa nu ndúu na cáhan nā xihin Jesús ta ndítuhún nā sahá ña jándoho na ini a ñuu Jerusalén ta já quivi a. <sup>32</sup> Ta vatí cuni cuju Pedro xihin java ga nā catáhan xihin dá cán nasandita na. Ta naxini na ndá quiahva cáhnu cúu Jesús xihin da ivi táhan ndúu xihin á cán. <sup>33</sup> Ta tá nacasáhá cáxíca Moisés xihin Elías cán nu Jesús cuahan nā já nacachi Pedro já xihin Jesús:

—Maestro, ndaja vaha cúu á ndúu nde yóho jáchi já cuu cavaha nde uni vehe tayahvá válí. In a coo mé ndó ta inga coo Moisés ta inga coo Elías —nacachi da.

Joo chí co xini mé va Pedro ndía cáa cáhan da. <sup>34</sup> Ta nani cáhan da ndíta na já nanuu in vico jata ná ta najajahví a

na. Ta chí nacasáhá yíhví na xíca tuun xihin Jesús cán tá naxini na nacava nuu vico cán na. <sup>35</sup> Anda já naxini joho na cáhan in a tañu vico cán já nacachi a já:

—Da yóho cúu jahyi maní i. Cuni joho ndó nu cáhan da.

<sup>36</sup> Tá nandihi naxini joho na ña cáhí a cán já naxini na ña íin in túhún jini mé va Jesús. Ta mé na xíca tuun xihin á cán nasahíin táji yúhu ná sahá ña naxini na ta coo nandicani na sahá nuú ni in túhún ñayivi.

*Tá nandaja vaha Jesús in taa loho nadácaan ínima quini ini (Mt. 17:14-21; Mr. 9:14-29)*

<sup>37</sup> Ta inga quiví itaan tá nanuu Jesús xihin na xíca tuun xihin á jini yúcu cán já naqueta cuahá ndivaha ñayivi cuahan na ndique táhan na xihin Jesús. <sup>38</sup> Anda já nandicahan cóhó ndivaha in dataa tañu tóco ndihi ñayivi cán já nacachi da já xihin Jesús:

—Maestro, caja ndó ñamani candehé loho ndó jahyí i jachí in túhún jini já cúu dá nuú i. <sup>39</sup> Ta nadácaan in ínima quini ini da ta tíin rí dá ta caja rí xihin dá ña ná nahyi cóhó da. Ta caja rí ña ná quivi yíhí da ta já cana cuyu chiquiñu yúhu dá. A juú quiahva caja xíxi rí quini cán xihin dá ta chí co cúni rí janí rí da. <sup>40</sup> Sa naxica tahví i nuú na xíca tuun xihin ndo ña ná tavá na mé rí quini cán joo coo nacuu caja na ña —nacachi da cán xihin Jesús.

<sup>41</sup> Anda já nacachi Jesús já:

—Ndáhví nahá nacuu ndó jachí sa cuahá ndivaha quivi íin i xihin ndo ta a ñaha candee ini ndó yehe. Cúu ndó ñayivi quini ndivaha chí co ndee ga ini i xihin ña caja ndó. Taxi ndó taa loho jan chóho —nacachi Jesús xihin ná.

<sup>42</sup> Ta tá cayati taa loho cán cuahan da nu Jesús já nacaja rí quini cán ña ná ndicava da nu ñúhu ta cán nacaja rí ña ná quivi yíhí tucu da. Anda já najánani Jesús rí quini cán já nandivaha taa loho cán ta nandiquiahva mé á da nu tátá

da. <sup>43</sup> Ta tóco ndihi ñayivi ñasanduu cán ñacatóntó ña tá ñaxini na ña náhnu cája Ndióxi.

Ta nani cátóntó ña ndúu na sahá ña náhnu cája Jesús cán já ñacasáhá cáhan mé á xihín ña xíca tuun xihín á. Já ñacachi a já xihín ná:

<sup>44</sup> —Cuni johó vaha ndó ña yóho ta coto a ndíndójó ndó ña. Tiin na yehe, da ñachindahá Ndióxi nduu ñayivi ta já ndiquiahva na yehe ndahá java ñataa —ñacachi Jesús xihín ná.

<sup>45</sup> Joo ni in táhan ña xíca tuun xihín á cán coó ñacandaá ini na ndíá cúní cachi Jesús. Jáchi coó ñanuna xíní túní ná ña ná candaá ini na ña. Ta yíhvi ña ndaca tuhún ña mé á ña ná ndicani a ña nu ná.

*Ndicani Jesús ndá ña cúú ña ín chága saha*

*(Mt. 18:1-5; Mr. 9:33-37)*

<sup>46</sup> Tá nandihí já ñacasáhá ña xíca tuun xihín Jesús cán ndítuhún xihín táhan na saha ndá da cúú da cáhnu chága tañu mé ná. <sup>47</sup> Anda já ñaxini Jesús ña cáhvi ini ña cán já ñatiin a in ñaa loho já ñasacu ndichi a da jíin á. <sup>48</sup> Já ñacachi a já xihín ná:

—Ndá ña ná ndiquehe vaha ñaa loho yóho sahá ña quíhvi ini ña yehe, ndiquehe ri na yehe viti. Ta ndá ña ndiquehe yehe, ndiquehe ri na tátá i, mé a ñachindahá yehe. Ndá ña coó saha mé tañu tóco ndihí ndó, ña cán cúú ña ín chága saha nu Ndióxi —ñacachi Jesús xihín ña cán.

*Tá ndúu java ña ndiquehe saha yo já queá cuahan ña xoo í*

*(Mr. 9:38-40)*

<sup>49</sup> Anda já ñacachi Juan já xihín Jesús:

—Maestro, ñaxini nde in ñataa ta cáhan da quívi mé ndó já tává da ínima quini núhu ini ñayivi. Joo coó xíca nuu da xihín yo sahá ña cán queá ñasaji nuu nde nu dá caja da ña —ñacachi da cán.



<sup>50</sup> Andá já ñacachi Jesús já xihin dá:

—A cájí nuu ndó nu dá sahá ña cája da ña. Jáchi ndá da co ndíndita caja xíxi xohó, mé da cán cuahan da xoo mí —ñacachi Jesús.

### *Jánani Jesús Jacobo xihin Juan*

<sup>51</sup> Tá ñacayati quiví ndindita Jesús cuhun a indivi coó ñayihví a quehe a íchi cuahan chí ñuu Jerusalén. <sup>52</sup> Náchindahá Jesús java na xíca xihin á ña ná cuhun cuéé na in ñuu loho ndácaan estado Samaria cán já ná nducú na nuú canduu tóo na chí ñaquee na cuahan na. <sup>53</sup> Joo coó ñaxeen toho na Samaria cán ndiquehe na Jesús jáchi ñaxini na ña cuahan chí ñuu Jerusalén. <sup>54</sup> Tá ñaxini Jacobo xihin Juan cán ña yóho já ñacachi da já xihin Jesús:

—Á co cúni ndó, xitoho i ña ná cahnda nde chuun ña ná cuyu ñúhu cáyi indivi já ná jánaa nde sahá ñayivi yóho tá quiahva ñacaja profeta Elías sanahá —ñacachi na xihin á.

<sup>55</sup> Andá já ñandicoto nihni Jesús nu ná já ñacasahá jánani a ña já ñacachi a já xihin ná:

—Co xíni ndó ña a váha toho cáhvi ini ndó já. <sup>56</sup> Jáchi coó ñaquixi toho yehe, da ñachindahá Ndióxi nduu ñayivi, ña ná jánaa i sahá ñayivi. Ñaquixi i ñuyiví yóho jáchi cúni ña ná cacu ndaa ínima ná —ñacachi Jesús xihín na cán.

Andá já ñaquee na cuahan na inga ñuu loho.

### *Na cúni candico Jesús*

*(Mt. 8:19-22)*

<sup>57</sup> Ta nani xíca na cuahan na já ñacachi in dataa já xihin Jesús:

—Cúni candico i ndohó ndá ñacuu nuú cuhun ndo —ñacachi da.

<sup>58</sup> Andá já ñanducú ñehe Jesús tuhun nu dá já cáhí a já xihin dá:

—Ndicuii cúu rí ta vat̃i ín cáva ñúhu rí. Laa cúu rí ta vat̃i ín táca ñúhu rí. Joo yehe, da ñachindahá Ndióxi nduu ñayivi chí ni nuú cuju mí i coó va —ñacachi a xih̃in dá.

<sup>59</sup> Tá nandihí já ñacachi Jesús já xih̃in inga da:

—Naha quí candico yehe.

Joo ñanducú ñehe da cán tuhun nu Jesús já cáchí da já xih̃in á:

—Quiáhva jihna ndó ñamaní nuú i ña ná cuhun i jánduxu tátá i já quixi i candico i ndohó —ñacachi da xih̃in Jesús.

<sup>60</sup> Anda já ñacachi Jesús já xih̃in dá:

—Ná cuhun mé ñayivi, na a ñáha cacu ndaa ínima jánduxu na ndii jan. Joo yóhó, cuáhán caxi tuhun nuú ñayivi ña sa ñandindaa quiví cacomí Ndióxi cuéntá saha ná —ñacachi Jesús xih̃in dá.

<sup>61</sup> Anda já ñacativi inga dataa nu Jesús já ñacachi da já xih̃in á:

—Jesús, candico i ndohó cúni. Joo quiáhva ndó ñamaní nuú i ná cuhun loho i ndindayí jihna ñúhu i na vehe e já quixi i candico i ndohó —ñacachi da xih̃in Jesús.

<sup>62</sup> Anda já ñacachi Jesús já xih̃in dá:

—Ndá da cásahá ndíco yehe ta já ndicó coo tucu da cuahan da chí jata, cúu dá da coó chuun toho cacomí Ndióxi cuéntá saha. Jáchi da cán cúu dá tátuhun da tíin yata ta cásahá da xútu da cuahan da joo tá nandihí ndicoto nihni tucu da chí jata ta chí coó saha dá cacomí Ndióxi cuéntá saha dá —ñacachi Jesús.

## 10

*Chindahá Jesús uní jico uxu taa cuhun da cahan da tuhun Ndióxi xih̃in ñayivi*

<sup>1</sup> Tá nandihí já ñacaxi Jesús inga uní jico uxu chága dataa. Ta tá ivi tá ivi da ñachindahá a da cuahan da já ná

cuhun cuéé da cahān da tuhun Ndióxi xihín ñayivi ndúu tóco ndihi ñuu nuú nasacu ini Jesús cuhun a coto nihni a ñayivi. <sup>2</sup> Anda já nacachi a já xihín ná:

—Mé a ndaa ndúu cuahá ndivaha ñayivi, na cuni cuni johu tuhun Ndióxi joo coó cuahá na cuni cuhun cahān ña xihín ná. Cúu á tátuhun vaha ndivaha nacana ní nuú utu joo ndímaní na jáquee ña. Ña cán queá xíní ñúhú caca tahví ndo nuú da xihín ñaha utu cán ña ná chindahá chága da na jáquee nuú utu da. Quiahva já ndítahan caca tahví ndo nu Ndióxi ña ná chindahá chága mé á na caca nuu cahān tuhun Ndióxi xihín ñayivi já ná ndiquehe vaha na ña. <sup>3</sup> Mé ndó cúu ndó na chindahá i cuhun caca nuu cahān tuhun Ndióxi. Mé a ndaa iyo ndivaha cáa nuú cuhun ndo jáchi cacuu ndó tátuhun ndicachi válí tañu cuahá ndivahyí. <sup>4</sup> Tá naquee ndó cuahān ndo coto a cánehe ndó yátí cuhun ndo ni jihún ni inga ndusa ndó a cánehe ndó cuhun ndo. Ta a cácuíta ndó cahān Ndióxi ndó xihín ñayivi ndique táhan xihín ndó íchi. <sup>5</sup> Ta tá ná xinu coo ndó in vehe, jihna ñúhú cahān Ndióxi ndó xihín na ndúu vehe cán já cachi ndó já xihín ná: “Ná coo vaha ini ndó, na ndúu vehe yóho”, cachi ndó xihín ná. <sup>6</sup> Ta tá mé a ndaa ín vaha ini ñayivi ndúu vehe cán já a cándo nuu toho tuhun nacachi ndó xihín na cán. Joo tá co ín vaha ini na cán já a quehe ndó cuéntá sahá ña nacachi ndó ña ná coo vaha ini na jan jáchi a juu na coo vaha ini cúu toho na jan. <sup>7</sup> Tá ná xinu coo ndó in vehe nu ndiquehe vaha na ndohó, canduu ndó mé vehe jan. Ta a cáca nuu ndó tá vehe tá vehe nducú ndo nuú coo ndó. Ta ndá ñaha ín nu ná sáhan na nu ndo cuxu ndó á coho ndó, tiin ndó a ndáha ná. Jáchi ndítahan nuú in dataa ndiquehe da ña catacu da sahá chuun cája da. <sup>8</sup> Ta tá ná xinu coo ndó in ñuu nu ndiquehe vaha na ndohó, cuxu ndó ndía cúu mé a sáhan na nu ndo. <sup>9</sup> Ta ndaja vaha ndó ndá na quíhvi ndúu cán. Ta cachi ndó já xihín ná:

“Sa n̄acayati quiví cacomí Ndióxi cuéntá sahá ndo”, cachi ndó xihín ná. <sup>10</sup> Joo tá ná xinū cōo ndó in ñuu nuú cō cúní n̄a ndiquehe vaha na ndohó, cuáhán ndó cáyé ñuu cán já cachi ndó já xihín ná: <sup>11</sup> “Janda ña yácá ñatiin ndaa sahá nde ñuu ndó yóho quíji nihni nde ta xihín ña yóho náha nde ña cuahan cuachi ndó jata mé va ndó. Jáchí sa n̄acaxi tuhun va nde xihín ndo ña sa n̄acayati quiví cacomí Ndióxi cuéntá sahá ñayivi”, cachi ndó xihín ná —n̄acachi Jesús xihín n̄a cán.

<sup>12</sup> Anda já n̄acachi tucu a já xihín ná:

—Tá ná xinū cōo quiví caja víí Ndióxi sahá ñayivi já jándoho chága mé á ini ñayivi ñuu jan a juú ga tá quiahva najándoho a ini n̄a ñuu Sodoma sanahá —n̄acachi Jesús xihín ná.

*Cáhan Jesús sahá ñuu nu ndúu ñayivi, n̄a cō cúní jándacoo cuachi*

*(Mt. 11:20-24)*

<sup>13</sup> Anda já n̄acachi tucu Jesús xihín ná já:

—Ndáhví nahá n̄acuu ndó, n̄a ñuu Corazín. Ta ndáhví nahá n̄acuu ndó n̄a ñuu Betsaida. Cuahá ndivaha ña náhnu n̄acaja i nu ndo joo cōo n̄axeen ndó ndicó cōo ini ndó jándacoo ndó cuachi ndó. Sanahá najándihi Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caja i ña náhnu nuú n̄a cán tá quiahva n̄acaja i nu mé ndó, sa najándacoo va n̄a cán cuachi na, nduu. Ta chí ivi laá ndaca ndixi na jahmá ndíí ta jácuyu na yaa yíquí jíní n̄a, nduu. Jáchí xihín ña yóho jánaha n̄a ña n̄andicó cōo ini na sahá cuachi na. <sup>14</sup> Joo tá ná xinū quiví caja víí Ndióxi sahá ñayivi já ndoho chága ini mé ndó, n̄a ñuu jan a juú ga tá quiahva n̄andoho ini ñayivi nasanduu ñuu Tiro xihín ñuu Sidón sanahá. <sup>15</sup> Ta viti cáhan i xihín ndó, n̄a ndúu ñuu Capernaum. Janda indiví cúní ndó cūhun

ndó joo sahá ña sáa ini ndó cuhun ndó janda indayá, caja Ndióxi —ñacachi Jesús.

<sup>16</sup> Anda já ñacachi a xihin na xica tuun xihin á já:

—Ndá na xini johu nu cahan ndo ta cája na ña cáchi ndo já queá cúú á tátuhun cája na ña cáchi yehe xihin ná caja na. Ta ndá na cándají ndohó cúú á tátuhun cándají ri na yehe va. Ta ndá na cándají yehe, cándají ri na Ndióxi, mé a nachindahá a yehe quixi i ñuyívi yóho —ñacachi Jesús xihin na chindahá mé á cuhun cahan tuhun Ndióxi xihin ñayivi cán.

Anda já ñaquee na cuahan na.

*Tá nandicó cõo ndihuni jico uxu na nachindahá Jesús caca nuu cahan tuhun Ndióxi*

<sup>17</sup> A juú quiahva cájii íni na uni jico uxu na nachindahá Jesús cahan tuhun Ndióxi cán tá nandicó cõo na. Já ñacachi na já xihin Jesús:

—Tá cahan nde quivi ndó sáhdá nde chuun nu ínima quini ta chí xini johu rí ta cája rí ña sáhdá nde nu ri —ñacachi na cán xihin Jesús.

<sup>18</sup> Anda já ñacachi Jesús já xihin ná:

—Mé a ndaa queá cahan ndó jan. Jáchi naxini i xihin nuu mí i ndá quiahva ñaquee Satanás, rí cúú tiñáhá sacuahá indivi ta nandicava rí nu ñúhu tátuhun in tasa.

<sup>19</sup> Chí ñasahan i ndée nu ndóhó ña ná cuu cahnda ndó chuun nuú tiñáhá sacuahá. Já cuu cuani nihni ndó jatá cõo xihin jata líhma ta a ndóho ndó ni in ñaha. Ta ñasahan i ndée nu ndo ña ná cuu quee vaha ndó nuú ndihi ña núu cúni tiñáhá sacuahá caja rí xihin ndo. <sup>20</sup> Vatí cájii ini ndó sahá ña cándusa rí quini nu sáhdá ndó chuun nu ri joo ndítahan cajii chága ini ndó sahá ña sa ñaquee va quivi ndó ña cuhun ndó indivi —ñacachi Jesús xihin ná.

*Tá ñacajii ndivaha ini Jesús*  
(Mt. 11:25-27; 13:16-17)

<sup>21</sup> Ta chí mé hora já nacaja ínimã yii Ndióxi ñã ná cajií ndivaha ini Jesús. Já nacasáhá cáchí a já:

—Cája cáhnu i ndohó, tátá Ndióxi, ñã cúu xitoho tóco ndihi ñaha ndúu indiví xihín ñuyívi. Jáchi najánahá ndó ñã ndíchí ndivaha nuú ñayivi, na coó cuahá saha nuú java ga na. Ta nacaja ndó ñã ná a cúu candaa ini na ndíchí xihín na tácu ini ñaha mé ndó. Já nacaja ndó jáchi já nasacu ini ndó cajú ndó —nacachi Jesús.

<sup>22</sup> Anda já nacachi a já xihín na ndúu cán:

—Nandiquiahva tátá i tóco ndihi ñaha ndahá i ñã ná cacomí i cuéntá sahá. Ta ni in túhún toho ñayivi co xini vaha na yehe, da cúu in túhún jini já jahyi Ndióxi. Mé Ndióxi, tátá i cuití va xini vaha yehe. Ta ni in túhún toho na co xini vaha yo cúu tátá i. In túhún yehe, da cúu jahyi a xini vaha i yo cúu mé á. Ta yehe cúu da caxi ndá ñayivi jánahá i nuu sahá Ndióxi, tátá i já ná candaa vaha ini na yo cúu mé á —nacachi Jesús.

<sup>23</sup> Anda já nasandehé a nuú na xíca tuun xihín á cán. Já nacasáhá cáchí a já xihín mé cuití na:

—Tahví nacuu ñayivi tá ná cuu candehé na tóco ndihi ñã xini mé ndó viti. <sup>24</sup> Mé a ndaa ná cahan i xihín ndo ñã cuaha táhan na profeta nasanduu sanahá ta cuaha táhan na nasacomí cuéntá sahá ñayivi sanahá cuni na cuni na tóco ndihi ñã xini ndo cája i. Joo coó naxini na ñã. Ta cuni na cuni joho na ñã xini joho ndó cahan i xihín ndo. Joo coó naxini joho na ñã.

*Sácu Jesús quiahva sahá in da Samaria, da nacaja vaha*

<sup>25</sup> Ta ndaja coo in da jánahá ley Moisés nandaça ndichi da cahan da xihín Jesús jáchi cuni da coto ndojó ñahá da. Ta nacachi da já xihín á:

—Maestro, ndíã ndítahan cajú i já ná cuu catacu u indiví anda ama cáa quívi —nacachi da xihín á.

<sup>26</sup> Anda já nanducú ñehe Jesús tuhun nu dá já nacachi a já xihin dá:

—Ndaja cáchí ley Moisés. Ndaja cáchí ley tá cáhvún ña —nacachi Jesús xihin dá.

<sup>27</sup> Anda já nanducú ñehe da jánaḥa ley Moisés cán tuhun nu Jesús já nacachi da já:

—“Quihvi inún Ndióxi, xitohún xihin tóco ndihi inimun ta xihin ndinuhu inún. Ta quihvi inún a xihin tóco ndihi ndéun ta xihin tóco ndihi xini túnun. Ta quihvi inún ñani táhún tá quiahva quihvi inún mún” —nacachi da cán nanducú ñehe da tuhun nu Jesús.

<sup>28</sup> Anda já nacachi Jesús já xihin dá:

—Mé a ndaa vaha va nacahun. Cuáhán caja tóco ndihi ña yóho já ñehe táhvun catacún indivi anda ama cáa quivi —nacachi Jesús xihin dá.

<sup>29</sup> Joo da jánaḥa ley Moisés cán cuni da candoo vaha da nuú ñayivi nduu cán sahá ña cán quea cáchí da já xihin Jesús:

—Yo já cúu ñani táhan i.

<sup>30</sup> Anda já nandicani Jesús nu dá já cáchí a já xihin dá:

—In tañu naquee in dataa ñuu Jerusalén cuahan da íchi ña nanuu cuahan chí ñuu Jericó. Ta ndaja coo cán naqueta java ta cuihná nu dá. Ta natiin na da ta nacaja cuihná ndihi na ñaha da janda jáhma dá viti naquee na. Tá nandihí já nacani quini ndivaha na da janda quiahva nasahní too na da. Já naquee na cuahan na. <sup>31</sup> Ta ña vaha quea nayaha in jutú mé íchi cán. Joo tá naxini ñahá da já nayaha saa da cuahan va da. <sup>32</sup> Ta sa mé íchi cán nayaha ri in da naquixi chichi Leví ta tá naxini da da nandicuehe cándúhu íchi cán já nayaha saa da cuahan da. <sup>33</sup> Jári in da Samaria xíca cuahan mé íchi cán. Joo tá naxini da da nandicuehe cándúhu íchi cán chí natahvi ini da saha dá.

<sup>34</sup> Anda já nacayati da nu cándúhu dá. Já nacaja tátá da

nuú nandicuehe da quíhvi cán xihín sítí xihín vino viti. Ta já nacató da nuú nandicuehe cán xihín ticoto. Tá nandihi najánda da da jata búrrō jana dá já ñéhe ñahá da cuahan da. Já nanducú da vehe coo tóo da quíhvi cán ña ná candaa na da. <sup>35</sup> Ta inga quíví itaan tá nasacu ini da Samaria cán quehe da íchi cuhun da já natavá da ivi jjuhún caa nasahan da nuú da xihín ñaha vehe cán. Já nacachi da já xihín dá: “Cajún ñamaní candaa vahún da quíhvi yóho. Ta tá ná chicaan chágun jjuhún xihín dá, a ndícani toho inún jáchi chahvi mí vi ña nuun tá ná ndicó coo í”, cáchí da Samaria cán —nacachi Jesús.

<sup>36</sup> Anda já nandaca tuhún Jesús da jánaha ley Moisés cán já nacachi a já xihín dá:

—Ta viti cachún xihín i tixi ndíhuni da nayaha íchi nuú nasanduhú da nandicuehe nacaja taa cuihná yóho, ndá da cúú da nanaha ña mé a ndaa táhyí quíhvi ini da ñani táhan da —nacachi Jesús.

<sup>37</sup> Anda já nacachi da jánaha ley Moisés já:

—Da natahvi ini sahá da nandicuehe jan, da jan cúú da cája i cuéntá nanaha da ña mé a ndaa quíhvi ini da ñani táhan da —nacachi da cán.

Anda já nacachi Jesús já xihín dá:

—Ta viti cuáhán ri yóhó va, quíhvi inún ñani táhún tá quiahva nacaja da Samaria yóho —nacachi a xihín dá.

*Tá nasahan Jesús vehe Marta xihín María*

<sup>38</sup> Naquehe Jesús íchi xíca cuahan janda quiahva naxinu coo a in ñuu loho. Ta cán nandiquehe vaha in ñá naní Marta mé á vehe ñá. <sup>39</sup> Ta nasahin in quíhvi Marta yóho, ñá naní María. Ta naxinu coo María nasacoo ñá yati saha Jesús jáchi cúní ñá cuni joho ñá nu cáhan mé á. <sup>40</sup> Joo ndaja coo a juú quiahva ndíhi ini mé Marta cája ndíví ñá ñaha cuxu na ndácaan ña. Anda já nacayati ñá nu Jesús já nacachi ñá já xihín á:



—Candehé ndo, xitoho i. Á co sándeheé toho ndó ña in túhún mí i cája ndíví i ñaha ta ñá cúu quihví i jan co chindeé loho ñá yehe. Cahān loho ndó xihīn ña ná chindeé ñá yehe —ñacachi Marta cán xihīn Jesús.

<sup>41</sup> Andā já nanducú ñehe Jesús tūhun nu ña já cáchí a já xihīn ña:

—Marta loho, a juú quiahva ndícani inún ta ndíhi inún jáchī ín ndivaha chuun nuun. <sup>42</sup> Joo ín in túhún ñaha ña ín chága saha ta cúu á ña ndítahan cajún. Ta María, ñá cúu quihvun yóho nacaxi ñá ña vaha chága. Ta ni in na a cúu caji nuu nu ñá cuni johō ñá tūhun cáhan i —ñacachi Jesús xihīn ña.

## 11

*Jánaḥa Jesús na xíca tuun xihīn á ndaja caja na caça tahví na nu Ndióxi*

(Mt. 6:9-15; 7:7-11)

<sup>1</sup> In tañu xíca tahví Jesús nu Ndióxi ndácaan. Ta tá nandihī naxíca tahví a já ñacachi in táhan da xíca tuun xihīn á cán já xihīn á:

—Jánaḥa ndó ndeḥe, xitoho nde caça tahví nde nu Ndióxi, tátá yo tá quiahva nacaja Juan, da nacaja ndúta ñayivi. Jáchī najánaḥa da nuú na nasaxíca xihīn dá ndá quiahva caja na caça tahví na nu Ndióxi —ñacachi da cán xihīn Jesús.

<sup>2</sup> Andā já ñacachi Jesús já xihīn na cán:

—Tá ná caça tahví ndo nu Ndióxi já cachi ndó já:

Tátá Ndióxi, ña ín indiví,  
cáhnū ná cacuu quiví ndo.

Ná tandaa quí quiví cacomí ndó cuéntá sahá nde.

Ta ná coo tá ín cúní mé ndó coo ñuyíví yóho tá quiahva ín indiví cája ndó.

<sup>3</sup> Quiáhva ndó nuú nde ña ndímaní nuú nde cuxu nde in in quívi.

<sup>4</sup> Caja cáhnu ini ndó sahá cuachi nde tá quiahva cája cáhnu ini nde saha tóco ndihi ña núu cája ñayivi xihín nde.

Ta a quiáhva ndó ñamaní ña ná coto ndojó tiñáhá sacuaḥa ndeḥe já ná a cája nde cuachi nu ndo, já cachi ndó caça tahví ndo —ñacachi Jesús.

<sup>5</sup> Andá já nasacu Jesús in quiahva nu ná já ñacachi a já xihín ná:

—Cúú á tátuhun tá ná cuhun ndó vehe in amigo ndo java ñuú táji ta já cachi ndó já xihín dá: “Amigo, á a quiáhva tóun uní pan nuú i <sup>6</sup> jáchi ñacasaá in da xíní táhan xihín i vehe e ta cúú dá da nasahan xícá ta coo ñaha nuú i quiahva i cuxu da”, cachi ndó xihín amigo ndo. <sup>7</sup> Ta viti ná caja í cuéntá nducú ñeḥe da ndácaan ini vehe cán tuhun nu ndo já cachi da já: “A jáquihvún yeḥe jáchi ndájí tuun yéhe. Ta ndúu jahyi válí i quíji na xihín i nuú xito ta a cuú caja i ndacoo i quiahva i ndá ñaha nuun”, cachi da cán xihín ndo ná caja í cuéntá. <sup>8</sup> Mé a ndaa ná cahan i xihín ndo ña vatí co cúni da jan ndacoo da quiahva da ñaha nu ndo sahá ña xíní táhan ndó xihín dá joo ndacoo tá ndacoo da quiahva da ñaha nu ndo sahá ña jáquihvi ndó da. Sahá ña cán queá ndacoo da quiahva da tóco ndihi ña xíní ñúhú ndo nu ndo. <sup>9</sup> Ña cán queá cahan i ña yóho xihín ndo: Ndá ñaha ndímaní nu ndo xíní ñúhú caça ndó ña nu Ndióxi ta já quiahva mé á ña nu ndo. Ndinducú ndo ña cúni ndo ta ñeḥe ndó ña caja Ndióxi. Cúú á tátuhun catí ndáḥa ndo yéhe ta já nuna yéhe nu ndo. <sup>10</sup> Jáchi na xícá, na cán cúú na ñeḥe va. Ta na nducú ñaha, na cán cúú na ndíneḥe va. Ta na catí ndáḥa yéhe, na cán cúú na ndínuna yéhe nuu.

<sup>11</sup> Ta ndá ndó, na ndúu jahyi ta tá xícá jahyi ndó pan cuxu a nu ndo, ama cuéhe ri ndó quiahva ndó yuu nu á ña

ná caxí a. Ta ama ná quiahva ndó cōo caxí a tá xíca cuñu tiyacá caxí a. <sup>12</sup> Ta ama cuéhé ri ndó quiahva ndó líhma caxí jahyi ndó tá xíca ndiví nu ndo. <sup>13</sup> Vatí cúú ndó ñayivi cája cuachi joo xíní vaha ndó quiahva ndó ña vaha nuú jahyi ndó. Ta ndaja ga ví cája Ndióxi, tátá ndo, mé a ín indiví xihín ndo. Quiahva mé á ínima yíi á nu ndá na ná caca ña nu á —nacachi Jesús.

*Chícaan na cuachi Jesús ña ñéhe a ndée tiñáhá sacuaḡa*  
(Mt. 12:22-30; Mr. 3:20-27)

<sup>14</sup> In tañu tává Jesús ínima quini ini in dataa, da nanduu níhi, nacaja rí quini. Ta tá sa nacana mé rí quini ini da cán nacaja Jesús anda já nandicahan tucu da. Ta chí nacatóntó cuahá ñayivi ndúu cán tá naxini na ña yóho. <sup>15</sup> Joo java na nacasáhá cáhí na já saha Jesús:

—Taa yóho cúú tává da rí quini ñúhu ini ñayivi jáchi mé Beelzebú, rí cúú tiñáhá sacuaḡa nu rí quini cán, sahan rí ndée rí nu dá cája da ña —nacachi na.

<sup>16</sup> Ta java ga na cúní na coto ndojó na Jesús sahá ña cán quea naxica na nu á ña ná caja mé á ñaha xitúhún quixi indiví já ná cuni na. <sup>17</sup> Joo xíní vaha va Jesús ña cáhvi ini na cán sahá ña cán quea nacachi a já xihín ná:

—Tá sáhdá java táhan ñayivi ndúu in ñuu ta ndúu na cuahá táhdá já casáhá cáni táhan ndaja táhan mé va na já cama chá ndihi sahá ñuu nu ndúu na cán. Ta quiahva já yáha xihín na ndúu in vehe tá casáhá sáhdá java táhan na ta cáni táhan na já cama chá ndihi sahá vehe na. <sup>18</sup> Ta quiahva já yáha xihín Satanás, rí cúú tiñáhá sacuaḡa va. Tá ná cani táhan ndaja táhan mé rí já quea ndihi saha ndée ña cómí rí. Cáhan í ña yóho xihín ndo jáchi cáhí ndo ña tává í rí quini ini ñayivi xihín ndée Beelzebú, rí cúú tiñáhá sacuaḡa. <sup>19</sup> Joo tá mé a ndaa cúú ndusa ña cáhí ndó sahá í jan, ndáchí quehe na cúú cuéntá mé ndó jan ndée tává na rí quini ini ñayivi. Ama ná cachi ndó ña tává ndó

rí quini xihín ndée tiñáhá sacuaḥa. Ña yóho náha ña co cáhvi ndaa ini ndó. <sup>20</sup> Joo yehe xihín in túhún ndée Ndióxi tává i ínimá quini ini ñayivi. Ta xihín ña yóho náha cáxi a ña sa naxinu coo quiví cacomí Ndióxi cuéntá saha ndo —cáchi Jesús.

<sup>21</sup> Ta sácú Jesús quiahva nu ná ta xihín ña yóho jánaha ña quee vaha mé á xihín tiñáhá sacuaḥa. Já cáchi a já:

—Íin in dataa ta tóyíí cáa da ta ñehe da ndá chúun chindeé da mé dá. Ta nani ndáá da vehe da mé a ndaa coo toho ñaha ndoho ñaha da jáchi ndáá vaha da ña. <sup>22</sup> Joo tá ná quixi inga ta, da ndacú chága a juú ga mé da cán ta quee vaha da xihín dá já candaa ndihi da ndá chúun ña ñacandee ini da mé dá. Ta já caja tá cúni mé da ndacú chága cán xihín ñaha da inga cán.

<sup>23</sup> 'Ndá na coo cuahan xoo i, cúu ná na co cúni yehe. Jáchi ndá na co chindeé yehe xihín ña cája i, cúu ná na sáji nuu nuú i.

*Jánaha Jesús ña cuahá tañu ndicó coo tucu rí quini ini ñayivi vatí sa naquee rí*

*(Mt. 12:43-45)*

<sup>24</sup> Tá quéta in rí quini ini in dataa já quee rí cuahan rí xíca nuu rí ndijáá yucú íchí ndínducú rí nuú candoo rí. Ta tá co ndíñehe rí ña já casáhá cáhvi ini rí já: “Cóho ndicó coo tucú ini da nuú nasandacaan í cán jáchi cúu á tátuhun vehé”, cáhán rí. <sup>25</sup> Ta tá xinu coo rí ini da cán já sándehe rí ña íin víi va ini da cán tá quiahva víi ini vehe tá natihvi á ta ñandaca ndójó vaha tóco ndihi ñaha ini a. <sup>26</sup> Anda já quee tucu mé rí quini cán cuahan rí quehe rí usa ga rí quini chága a juú ga mé rí já xínu ndihi rí ndihvi rí ini da cán. Ta mé da cán ndiquini chága da a juú tá nasandacaan in táláá rí ini da —ñacachi Jesús.

*Ndá na cúu na tǎhví chága ñacuu*

<sup>27</sup> Ta nani cáhan Jesús tuhun yóho nuú ñayivi já nacayuhú cóhó in ñáñáha tañu ñayivi cuaha cán já nacachi ñá já:

—Tahví nacuu ñá najácacu yohó, mé ñá najácuáhnu yohó —nacachi ñá xihin Jesús.

<sup>28</sup> Anda já nacachi Jesús já:

—Tahví chága nacuu ñayivi tá xini johó na tuhun Ndióxi ta cája na ña cáchi a —nacachi Jesús.

*Xíca ñayivi quini ña ná caja Jesús ña xitúhún cuni na*

<sup>29</sup> Tá ndítaca cuaha ñayivi nu íin Jesús já nacasáhá mé á cáhan xihin ná já nacachi a já:

—Quini ndivaha va ñayivi ndúu tiempo viti. Xíca na ña ná caja i ñaha xitúhún nu ná. Joo coó toho ña cán coo. Ña cuni ndusa na quea ndoho i tá quiahva nandoho Jonás, da nasacuu profeta sanahá. <sup>30</sup> Jáchí mé ñayivi nasanduu sanahá ñuu Nínive cán nacandaa ini na ña nachindahá Ndióxi Jonás nu ná. Ta quiahva já candaa ri ini na ndúu viti ña nachindahá ri Ndióxi yehe va, da nanduu ñayivi.

<sup>31</sup> Tá ná xinu quiví caja víí Ndióxi sahá cuachi ñayivi ndúu tiempo viti anda já ndicuita in ña nasacomí cuéntá sahá ñayivi ndúu chí sur sanahá ta chicaan ña cuachi jatá ñayivi ndúu tiempo viti. Jáchí mé ña cán vatí nasahin xíca ndivaha ña nu rey Salomón sanahá nasahan ña cuni johó ña tuhun ndichí cáhan da. Ta yehe íin chága sahá i a juú ga Salomón joo co cándusa ndó yehe. <sup>32</sup> Ta jári ñayivi nasanduu Nínive sanahá cán ndicuita na chicaan na cuachi jatá ndo tá ná xinu quiví caja víí Ndióxi sahá cuachi ñayivi ndúu viti. Jáchí mé na nasanduu ñuu Nínive cán najándacoo na cuachi cája na tá nacahan Jonás xihin ná ña nacachi Ndióxi coo. Ta yehe íin chága sahá i a juú ga Jonás joo co cándusa ndó yehe.

*Nduchú núú yò cúú á tátuhun in lámpara*

*(Mt. 5:15; 6:22-23)*

<sup>33</sup> Ni in túhún toho ñayivi cò chícaan ñúhu ná in lámpara ta já quehe na ña sácú na in nuú jehé. Ni cò chícaan na ña tixi sato. Ña cája na quea chinúu jícó na ña já ná yehe nuú na quíhvi ini vehe cán. <sup>34</sup> Nduchú núú yò cúú á tátuhun in lámpara jándiyehé a nu yò já xíní yò nu xíca í. Ta tá tívi vaha nduchú núú yò já cuu candehé vaha í nu xíca í. Joo tá cò tívi nduchú núú yò já quea xíca í nu naá ndivaha. <sup>35</sup> Cuéntá coo ndó a juú cahán ndo ña cúú ndó na xíca nu yéhe ta cáa ví ndó cája ndó cuachi tátuhun na xíca nu naá. <sup>36</sup> Tá ná quiahva ndó ñamaní jándiyehé Ndióxi ínima ndo já a cája ga ndó cuachi jáchi a cánehe ga ndó ínima quini. Tá cája ndó ña cúní Ndióxi já cúú á tátuhun in lámpara jándiyehé ínima ndo —nacachi Jesús.

*Chícaan Jesús cuachi jatá na fariseo xihín jatá na jánaha ley Moisés*

*(Mt. 23:1-36; Mr. 12:38-40; Lc. 20:45-47)*

<sup>37</sup> Tá nandihí nacahan Jesús já nacana in da fariseo Jesús ña ná cuhun a cuxu a vehe da. Tá nandihí já nasahan Jesús vehe da já naquihvi a nasacoo a nu mesa xihín java na cán. <sup>38</sup> Joo ndaja coo da fariseo cán chí nacatontó da jáchi naxini da ña coó nandahá Jesús cacoo a cuxu a tá quiahva ín costumbre mé na fariseo cán. <sup>39</sup> Anda já nacachi Jesús já xihín da fariseo cán:

—Ndóhó, na fariseo, ndíhi ini ndó cája ndó costumbre ña ndícata ndó jatá vaso xihín jatá cohó viti joo cò ndíhi ini ndó ndícata ndó ini a. Quiahva já cája mé va ndó jáchi ndíhi ini ndó ndahá ndo tátuhun costumbre ndo joo cò ndíhi ini ndó ndaja víí ndo ínima ndo nuú nachutú ndaa xihín ñaha quini cáhvi ini ndó. <sup>40</sup> Ndaja tóntó jini ndo. Á cò xini toho ndó ña tá nacavaha Ndióxi ñayivi já nacavaha mé á yiquí cuñu na ta nacavaha mé á ínima ná. <sup>41</sup> Caja ndó

ñamañi xihín na ndahví xihín ndinuhu ini ndó já ná coo víí ndó nu Ndióxi.

<sup>42</sup> 'Ndáhví nacuu ndó, na fariseo. Mé ndó tá cáchí ndo sáhan ndó ñaha nu Ndióxi já cávaha ndó uxu táhnda ñaha ndó cán. Ta in a sáhan ndó nu Ndióxi ta quéhe ndihi ndó ña java cán. Quiahva já cája ndó xihín minu estila xihín yucu lotá ta quiahva já cája ndó xihín tá nuú ñaha cána nu ñúhu ndo. Joo co cája ndó ña ndaa xihín ñayivi. Ta ni co quihvi ini ndó Ndióxi. Joo ña cúní Ndióxi caja ndó quéa ná caja ndaa ndó ta ná quihvi ini ndó a. Ta a ndíndójó ndó quiahva ndó ñaha nu Ndióxi.

<sup>43</sup> 'Ndáhví nacuu ndó, na fariseo. Jáchi tá sáhan ndó veñuhu cátoó ndo cacoo ndó nu sácoo na náhnu. Ta cúní ndó ña ná cahan Ndióxi toní ñúhu ndivaha ñayivi xihín ndo tá ndique táhan na xihín ndo íchi.

<sup>44</sup> 'Ndáhví nacuu ndó, na jánaha ley Moisés. Ta ndáhví nacuu ndó, na fariseo. Jáchi co cúu ndó tá quiahva ndaa ndó. Mé ndó cúu ndó tátuhun yávi nu táan na ndii jáchi núu cája ndó. Vatí xójō cava ñayivi yáha na nuú nanduxu ndii cán joo co xíní na ña cúu á in yávi nu ñúhu ndii jáchi coó yuu ñáñí a —nacachi Jesús.

<sup>45</sup> Anda já nanducú ñehe in da jánaha ley Moisés cán tuhun nu Jesús já nacachi da já xihín á:

—Maestro, xihín tuhun cahan jan jándihivi ri a ndehe va.

<sup>46</sup> Anda já nacachi Jesús já xihín dá:

—Ndáhví nacuu ri ndóhó va, na jánaha ley Moisés. Jáchi cája ndó ña ná coo ihvi ndivaha ley já ná a cúu caja ñayivi ña. Joo mé ndó cája ndúsa ndó xihín ná ña ná caja na ña vatí ni mé ndó a cuú caja ndó ña.

<sup>47</sup> 'Ndáhví nacuu ndó jáchi cúu á tátuhun cávaha ndó ñáñí nu jánduxu ndó na profeta, na nasahní tásáhnu jícó ndo sanahá. <sup>48</sup> Ta xihín ña yóho náha ndó ña cájii ini ndó

xihín ña ñacaja tásáhnú jícó ndo sanahá tá ñasahní na ña profeta. Ta viti cúú á tátuhun chindeé táhan ndó xihín ña cán jáchi mé ná ñasahní na ña profeta ta mé ndó ñacavaha ndó nuú nanduxu na.

<sup>49</sup> Xíni vaha Ndióxi ñayivi ta ndaa ñacahan mé á tá ñacachi a já: “Chindahá i java profeta xihín java apóstol nu ndo. Joo mé ndó cahni ndo java na ta java na ndicuita ñee ndó na”, ñacachi Ndióxi sanahá. <sup>50</sup> Joo viti caça Ndióxi cuéntá nuú ñayivi ndúu tiempo viti saha tóco ndihi na profeta, na ñaxihi ndijáa tiempo janda nani ñacava sáhá saha ñuyivi. <sup>51</sup> Caça Ndióxi cuéntá nuú ñayivi ndúu tiempo viti sahá na profeta ndii ñaxihi sanahá. Caça mé á cuéntá sahá Abel, da ñaxihi ñacaja Caín cán. Ta caça mé á cuéntá sahá ndijáa na profeta ñaxihi tiempo ñaquixi cán janda quiahva ñaxinu coo a nuú caça cuéntá sahá ndii Zacarías. Mé da yóho ñasahní na da ini veñuhu sanahá tañu nu náa xihín nuú yii ndivaha. Ña cán quea cahan i xihin ndó ña caça Ndióxi cuéntá saha tóco ndihi ndii jan nuú ñayivi ndúu tiempo viti.

<sup>52</sup> Ndáhví ñacuu ndó, na jánaha ley Moisés. Jáchi cája ndó ña ná a cúu candaa ini ñayivi ña cáchi tuhun Ndióxi. Ta xihín ña yóho cúú ndó na sáji nuu cuiti va jáchi ni co sáhan ndó ñamaní nu ná ña ná candúsa na ña ndaa. Ta mé ndó vatí xini ndó cúú á ña ndaa joo co cája ndó ña cáchi a —ñacachi Jesús xihín na jánaha ley Moisés cán.

<sup>53</sup> Tá ñacachi Jesús ña yóho já ñaxojo ndivaha ini na jánaha ley Moisés cán xihín na fariseo cán xihin á. Ta já ñacasáhá na ndáca tühún cuaha chága na mé á sahá ña cúní na jáquihvi cuití ñahá na. <sup>54</sup> Ta ñasacu cuaha ná tühun ihvi nu á jáchi ndúcú na ndá quiahva chicaan na cuachi jatá xihín in tühun ña ná yaha yúhu á cahan.



## 12

*Jánaḥa Jesús sahá na cō cúú ná tá quiahva ndáa na*

<sup>1</sup> Ta nani cáhan Jesús cán naçasáhá táca cuahá ndivaha ñayivi. Cuahá mil na naçasáhá ndái cuu na cán. Janda quiahva cándíhi táhan ndaja táhan mé ná xihín á cuahan ná. Nu cuítí naçahan Jesús xihín na xíca tuun xihín á já cáchí a já:

—Cuéntá coo ndó xihín na fariseo jáchi cúú ná tátuhun yúsa naxaa quée xihín harina ña cávaha na pan. Cō cúú ná tá quiahva ndáa na. <sup>2</sup> Ta ni in túhún toho ñaha a cúu coo jehé nahá jáchi cana tá cana tuhun sahá. <sup>3</sup> Tóco ndihi tuhun naçahan jehé ndó ñuú já vaxi quivi cuni johō ñayivi ña ndiví táhyí. Tóco ndihi ña naçahan jehé ndo tá ndájí yéhé já vaxi quivi candaa ini tóco ndihi ñayivi ñuu sahá —naçachi Jesús xihín na xíca tuun xihín á.

*Yo já ndítahan cayihví yo*

*(Mt. 10:26-31)*

<sup>4</sup> Anda já naçasáhá cáhan Jesús xihín ndihi na cán já cáchí a já:

—Candehé ndo, na cúú amigo i. Cúni çahan i xihín ndo ña a cáyihví toho ndó ñayivi, na cuu cahní yiquí cuñu ndó. Jáchi ña jan cúú ndihi va ña cája na ta a cuú caja na ni in ñaha xihín ínima ndó. <sup>5</sup> Ta viti ná çahan i xihín ndó yo já ndítahan ndusa nu ndó cayihví ndo: Ndítahan cayihví ndó Ndióxi jáchi mé a cán quée cuu caja ña ná quivi ndó ta tá nandíhi cuu chicaan ínima ndo ini indayá. Mé a cán quée ndítahan ndusa cayihví ndo.

<sup>6</sup> Sa xini vaha ndó ña uhun laa válí yahvi rí ivi jjuhún. Vatí núu ndivaha sahan ñayivi rí joo cō ndíndójó toho Ndióxi saha ri jáchi ndáa mé á ri. <sup>7</sup> Quiahva já iin ri saha mé ndó nu Ndióxi. Jáchi janda ijí jini ndó jan ndáhvi tá in

tá in a nu Ndióxi. A cáyihví toho ndó jáchi ndiyahvi chága ndóhó nu Ndióxi a juú ga cuahá laa válí.

*Tá cahan cáxi ñayivi ña cúu ná cuéntá Jesús  
(Mt. 10:32-33; 12:32; 10:19-20)*

<sup>8</sup> Mé a ndaa ná cahan i xihin ndó ña ndá na cáxi tuhun nuú ñayivi ña cuahan na cuéntá mí i já quea cachi mí i, da nachindahá Ndióxi nduu ñayivi saha ná ña mé a ndaa cúu ndusa na cán cuéntá mí i. Já cachi i xihin táto Ndióxi. <sup>9</sup> Joo ndá na ná cachi xihin ñayivi ña co xini toho na yehe já quea ni yehe a ndícuni toho i na ña cúu ná cuéntá mí i nu táto Ndióxi.

<sup>10</sup> Ta ndá na ná cahan núu sahá yehe, da nachindahá Ndióxi nduu ñayivi, caja cáhnu ini i saha ná. Joo ndá na ná cahan núu saha ínimá yí Ndióxi, na cán cúu na a caja cáhnu ini toho Ndióxi saha.

<sup>11</sup> Tá ná tiin na ndohó ña cañehe na ndohó cuhun ndó nahma ndó nuú na sacuahá veñuhu á nuú na jutixia sahá i, a ndícuni toho ini ndó ña ndá tuhun quea cahan ndó nuú na cán. <sup>12</sup> Jáchi tá ná xinu coo hora cahan ndó nuú na cán, jánahá ínimá yí Ndióxi nu ndo ndá tuhun nducú ñehe ndó nuú na cán —nacachi Jesús xihin ná.

*In da cuicá, da nacaja quihví*

<sup>13</sup> In táhan da ndácaan tañu ñayivi cuaha cán nacahan da xihin Jesús já nacachi da já xihin á:

—Maestro, cahan loho ndó xihin ñani i ña ná cahnda java da ñaha ña najandacoo tátá nde nuú nde tá naxihi na —nacachi da xihin Jesús.

<sup>14</sup> Anda já nanducú ñehe Jesús tuhun nu dá já nacachi a já xihin dá:

—A juú juéxe cúu yehe já coo i cahnda java i ñaha ndó, vaha.

<sup>15</sup> Anda já nacachi tucu a já xihin na ndúu cán:

—Cuni j<sub>o</sub>ho v<sub>a</sub>ha ndó. Cuéntá coo ndó ñ<sub>a</sub> ná a ndiáva nahá ini ndó canduu cuahá ñaha cuicá nu ndó. Jách<sub>i</sub> a juú saha ña ndúu cuahá ñaha cuicá nu ndó chí cuu catacu nahá chága ndó, vaha —nacachi Jesús.

<sup>16</sup> Anda já nasacu a in quiahva nu ná já nacachi a já xih<sub>i</sub>n ná:

—Nasah<sub>i</sub>in in da cuicá ta a juú quiahva nasahnu vaha ñaha nu ñúhu dá. <sup>17</sup> Anda já nacahá mé da cuicá cán ndicani ini da já nacahán da já: “Ndáchí taán toho í cuahá nahá ñaha nacana nu yo yóho jách<sub>i</sub> coó ga nuú cañuhu a”, nacahán da. <sup>18</sup> Anda já nacahán tucu da já: “Ña caja í queá ndicani ndihi í yáca ní ñaha í já cavaha í ña náhnu chága. Ta cán taán yo ndihi ña nacana nu yo ta cán taán yo tóco ndihi java ga ña cómi yo. <sup>19</sup> Anda já cachi í já xih<sub>i</sub>n mí i: Sa cuahá ndivaha va ñaha nasacu vahún viti. Ta queta ña cusún tixi cuahá ndivaha cuia. Ta viti jandá ndiquehe ndée cuití vún. Cuxu cuití vún. Coho cuití vún. Ta jandá caj<sub>i</sub> cuití ini vún, já va cachi í xih<sub>i</sub>n mí i”, nacahán da. <sup>20</sup> Joo nacahan Ndióxi já nacachi a já xih<sub>i</sub>n dá: “Taa quíhví, sa mé ñuu viti quivi vún. Ta tóco ndihi ña nasacu vahún jan a juú ña cusún cúú á. Ndá na cúú mé va na cuxu ña jan”, nacachi Ndióxi xih<sub>i</sub>n dá. <sup>21</sup> Quíhví ndivaha cája ñayivi tá ndája tútú na ñaha ñuyívi yóho joo co ñúhu ini na saha Ndióxi ña ná caja na ña cúni mé á. Saha ña cán queá cúú ná na ndahví ndivaha nu mé á —nacachi Jesús xih<sub>i</sub>n ná.

*Ndáá Ndióxi na cúú ndusa jahyi mé á*

*(Mt. 6:25-34)*

<sup>22</sup> Tá nandih<sub>i</sub> já nacahan Jesús xih<sub>i</sub>n na xíca tuun xih<sub>i</sub>n á cán já nacachi a já xih<sub>i</sub>n ná:

—A ndicani toho ini ndó sahá ña cuxu ndó catacu ndó ta ni saha jáhma candixi ndó. <sup>23</sup> Jách<sub>i</sub> cáhnu chága mé ndó a juú ga ña xíxi ndó xih<sub>i</sub>n ña ndíxi ndó. <sup>24</sup> Candehé ndó rí

nani ticacá jan. Co xútu rí ta ni co jáquee rí. Ta ni coó yáca nu táan rí ñaha rí. Joo sáhan va Ndióxi ñaha cuxu rí ña ná catacu rí vatí laa va cúu rí. Ta mé ndó ndiyahvi chága ndó a juú ga laa jan. <sup>25</sup> A ndícani toho ini ndó jáchi coó toho a ñehe ndó ndícani ini ndó. Ni in túhún toho ndó a cúu ndaja jícó ndo mé ndó java metro chága sahá ña ndícani ini ndó. <sup>26</sup> Tá ta ni loho ña yóho a cuú caja ndó, ndía ndóho ndó ndícani nahá ini ndó caja ndó java ga ñaha, dá já.

<sup>27</sup> Candehé ndo ndá quiahva ndató sáhnú ita. Co cája chúun a ta ni co cávaha jáhma á. Joo mé a ndaa ná cahan i xihín ndo ña ñúchí chága ita yóho nacaja Ndióxi a juú ga jáhma vaha ndivaha nasandixi rey Salomón sanahá, da nasahijn cuahá ñaha cuíca. <sup>28</sup> Candehé ndó ndaja ndáa vaha Ndióxi yucu ita vatí ín tóo a viti ta itaan cáyi a jándihi sahá. Ta ndiyahvi chága mé ndó a juú ga yucu ita. Joo co cándúsa ndó ña candaa mé á ndohó. Ña cán quea xíni ñúhú candee ini ndó Ndióxi ña quiahva tá quiahva mé á jáhma candixi ndó. <sup>29</sup> Ta a ndícani ini ndó ndaja caja ndó ñehe ndó ña cuxu ndó xihín ña coho ndó. <sup>30</sup> Jáchi ñayivi, na co xíni íchi cuénta Ndióxi, na cán cúu na ndícani cuahá ini saha tóco ndihi ña yóho. Joo cúu ndó cuénta Ndióxi, mé a cúu tátá ndo ta xíni vaha mé a ña ndímaní nu ndó catacu ndó. <sup>31</sup> Joo ndítahan nu ndó ndiquiahva ndó mé ndó ndáha Ndióxi ña ná cacomí a cuénta saha ndo já quiahva mé á nu ndo ña ndímaní nu ndo catacu ndó.

*Indiví cúu nu ndítahan ndaja tútu ñayivi ña vaha*

*(Mt. 6:19-21)*

<sup>32</sup> A cáyihví toho ndó jáchi mé ndó cúu ndó tátuhun ndicachi válí janá i. Mé a ndaa chá va cúu ndó joo cájii ini Ndióxi ña cómí a cuénta saha ndo. <sup>33</sup> Jícó ndó ña cómí ndo ta jasá ndó ñaha nuú na ndímaní ñaha nuú. Jáchi quiahva já ndaja tútu ndó ñaha vaha indiví nuú cuhun ndo. Jáchi mé cán a ndíhi sahá ña vaha cómí ndo. Ta ni na cuihná

a cuú quihvi na caja cuíhná ñaha ndó cán. Ta ni tiquijí a cuú jándihi rí sahá ñaha ndó cán. <sup>34</sup> Jáchí nuú ñandaja tútú ndo ña ndáyahvi nu ndo, cán coo ri ínima ndo.

*Náha Jesús ña xíní ñúhú canduu tiahva ñayivi cuhun na xihín mé á*

<sup>35</sup> Xíní ñúhú canduu tiahva ndó candati ndó ndá hora ndicó coo tucu u quixi i ndiquehe e ndohó. <sup>36</sup> Xíní ñúhú cacuu ndó tátuhun mozo tá ndáti tiahva da ndicó coo xitoho da, da cuahan víco tándaha. Ndáti tiahva da cuná da yéhe nu dá tá ná xinu coo da cani ndáha dá yéhe. <sup>37</sup> Tahví ñacuu mozo tá co quiji da ndúu da tá ná xinu coo xitoho da. Mé a ndaa ná cahan i xihín ndo ña janda mé da cúu xitoho da cán ndiquehe ñahá da ta já cacoo da da nu mesa da ta já chicao da cohó cuxu mozo da. <sup>38</sup> Coó caja toho a ña ná xinu coo xitoho da java ñuu táji á tá sa yati tivi, tahví ñacuu mozo cán tá ndíta da ndúu da tá ñaxinu xitoho da nu dá. <sup>39</sup> Candehé ndo jáchi xíní ñúhú candaa ini ndó ña yóho. Tá xini in dataa ndá hora cúni na cuíhná quihvi na vehe da já quéa a cúju da jáchi ndáa vaha da vehe da já ná a quihvi na caja cuíhná na ñaha vehe da. <sup>40</sup> Quiahva já xínú ñúhú canduu tiahva ri ndóhó va jáchi quixi tucu yehe, da ñachindahá Ndióxi ndúu ñayivi mé quivi co cáhan ndo quixi i —ñacachi Jesús xihín ná.

*In mozo vaha xihín in mozo a vaha  
(Mt. 24:45-51)*

<sup>41</sup> Anda já ñandaca tuhún Pedro Jesús já ñacachi da já xihín á:

—Á nuú ndehe cuití ñasacu ndó quiahva yóho á ñasacu ndó ña nuú ndaja táhan ñayivi ndúu yóho.

<sup>42</sup> Anda já ñacachi Jesús já xihín dá:

—Ña cáhan i yóho cáhan i ña xihín da tácu ini, da cája vaha ndusa. Cúu á tátuhun in mozo tá jándacoo xitoho

da chuun ndáha dá ña ná quiahva da cuxu na java ga cúu mozo xihin dá cán. Anda já naquee mé xitoho da cuahan da. <sup>43</sup> Tahví nacuu mé mozo cán tá xínu coo xitoho da ta ndíñehē dá da cája da chuun ña nacandoo nu dá caja da. <sup>44</sup> Mé a ndaa ná cahan i xihin ndo ña quiahva xitoho da cán chuun nu dá ña ná cacomí da cuénta saha tóco ndihi ñaha cómí xitoho da. <sup>45</sup> Joo da cúu mozo yóho tá ná casáhá da cahán da ña cayáncá ndivaha xitoho da ndicó coo da ta sahá ña cán quea casáhá da cája xíxi da xihín java ga na cúu mozo xihin dá cán. Ta já cáa ga da casáhá xíxi da ta xíhi da ta já xíni da. <sup>46</sup> Ta ndaja coo xínu coo xitoho mozo cán mé quiví co cahán da. Anda jáví jándoho quini xitoho da cán ini da jáchi coo nacaja da ña ndítahan caja da. Ta ndoho da yóho tá quiahva ndóho tóco ndihi na sáá ini, mé na co cája ña sáhdá xitoho na nu ná caja na.

<sup>47</sup> Tá ná candaá ini mozo ña cúní xitoho da caja da joo co ín tiáha da caja da ña ta ni co cúní da caja da ña sáhdá xitoho da nu dá, da cán cúu da ndoho ndivaha ini. <sup>48</sup> Joo tá ín in mozo ta co candaá vaha ini da ndá quea cúní xitoho da caja da ta ndaja coo cája da in ñaha ña co táhán ini xitoho da xihin já quea chá cuití va ndoho ini da. Tá ná caja Ndióxi cuahá ñamani xihín in ñayivi já quea ndítahan caja chúun cuaha ná nu mé á. Ta tá sa cándéé ini ñayivi inga na já quea ndinuhu ñamani náhnu chága caça na cán ña ná caja na xihin ná.

*Cája Jesús ña sáhdá java táhan ñayivi*

*(Mt. 10:34-36)*

<sup>49</sup> Yehe naquixi i ñuyiví yóho cahnda java táhan i ñayivi já ná naha na cúní cuhun xoo mí i xihín na co cúní cuhun xoo i. Ta ña yóho cúu á tátuhun naquixi i chícaan ñúhu i ñuyiví yóho. Ta cúní ña ná ndihi quí chuun naquixi caja i yóho. <sup>50</sup> Vaxi quiví ndoho ndivaha ini i ta a juú quiahva ndíhi ini i ndátí xínu coo mé quiví jan. <sup>51</sup> A cahán toho ndó

ñā naxinu i ñuyívi yóho caja i ñā ná coo vaha ini ñayivi. Ñā vaxi yehe caja i quéa ná cahnda java táhan na. <sup>52</sup> Jáchí viti xihín chí nuu cacuu a tátuhun canduu uhun ñayivi in vehe joo a cúní táhan na sahá yehe jáchí ivi na cacuu cuéntá mí i ta uni na candají yehe. Á tá coó ta uni na quihvi ini yehe ta ivi na candají ri yehe. <sup>53</sup> Ta jári da cúú tátá cani táhan da xihín jahyi da sahá yehe. Ta jári ndicuíta daṭaa cani táhan da xihín tátá da sahá yehe. Ta jári najihí cani táhan na xihín jahyi jíhí na sahá yehe. Ta jári najihí cani táhan na xihín náná na sahá yehe. Ta jári ndicuíta najihí cani táhan na xihín sanu na sahá yehe. Ta jári ndicuíta najihí cani táhan na xihín xojo na sahá yehe —nacachi Jesús.

*Cọ cúní ñayivi candaa ini na yo cúú Jesús*

*(Mt. 16:1-4; Mr. 8:11-13)*

<sup>54</sup> Anda já nacachi tucu Jesús já xihín ñayivi:

—Mé ndó tá xíní ndo ndicuíta vico vaxi a ñuu ndó chí xoo nu quéta candii já cáhí ndó ñā cuun javi ta chí cúun ndusa dó. <sup>55</sup> Ta tá xíní ndo vaxi tachí chí xoo sur já cáhí ndo ñā ihní ndivaha coo ta chí ihní ndusa sáhiin. <sup>56</sup> Cọ cúú ndó tá quiahva ndáa ndó. Cándaa vaha ini ndó ñā cúú ñuyívi ta cándaa ini ndó cahan ndó ndá quéa coo tá sándehe ndó indiví. Joo cọ cúní ndó candaa ini ndó ñā jánaha i nu ndo.

*Ndítahan caja vaha ndó xihín na cọ cúní ndohó*

*(Mt. 5:25-26)*

<sup>57</sup> Ndávaha cọ tává vaha ndó cuéntá ndía quéa vaha ta ndía quéa a váha. <sup>58</sup> Tá sácú ini na saha ndó cuhun ndó vecaa ta ndáca táhan ndó xihín na cán cuahan ndó nuu na jutixia, xíní ñúhú nducú ndó ndá quiahva ndique táhan mání tucu ndó xihín ná nani xíca ndó íchi cuahan ndo. Já quéa ná a cáñehe na cán ndohó cuhun ndó nu juéxe jáchí da cúú juéxe cán ndiquiahva da ndohó ndáha policia

ta policia cán chicao da ndohó vecaa. <sup>59</sup> Mé a ndaa ná cahan i xihin ndo ña tá ndacaan ndó vecaa jan chí a cána ndó janda quiahva ná चाहvi ndihi ndó ña yíca ndo nuú da cán já janí da ndohó —nacachi Jesús xihin ná.

## 13

### *Cáhan Jesús ña ndítahan jándacoo ñayivi cuachi cája na*

<sup>1</sup> Mé tiempo já naxinu coo java na ndican na nu Jesús sahá ña nasahní Pilato java dataa estado Galilea nani jóco da nu Ndióxi. Ña cán quea cáchi na ña nacatáhan nií da naxihi xihín nií quíti, rí jóco da. <sup>2</sup> Anda já nacachi Jesús já xihin ná:

—Á cáhan ndo ña naxihi da Galilea yóho sahá ña ín chága cuachi da a juú ga java ga na Galilea. <sup>3</sup> A juú a já jáchi quiahva já ndihi ri saha ndóhó va tá ná a jándacoo ndó cuachi cája ndó. <sup>4</sup> Sanahá ndivaha já naxihi sahun uni ta jáchi nandicava in torre nani Siloé jata ná. Á cáhan ndo ña nandicava torre cán jata na yóho jáchi nasahin chága cuachi na a juú ga na ñuu Jerusalén. Joo co cúu á quiahva já. <sup>5</sup> Mé a ndaa ná cahan i xihin ndo ña quiahva já ndihi ri saha ndóhó va tá ná a jándacoo ndó cuachi cája ndó —nacachi Jesús xihin ná.

### *Sácú Jesús quiahva sahá in titó ñuhú, dó co cána cuíhi nuu*

<sup>6</sup> Anda já nasacu Jesús in quiahva nu ná já nacachi a já xihin ná:

—In dataa najánde da in titó ñuhú nu ñuhu dá. Ta tá nayaha tiempo já nasahan da sándehe da do ña á cána titó ñuhú nu do. Joo co mé rí nandiñehe dá. <sup>7</sup> Anda já nacachi da já xihín da ndáa ñuhu dá cán: “Cándehe, sa naxinu uni cuia já cuití quixi i ndúcú u titó ñuhú nu yito yóho. Ta coo ñaha cána nu do. Vaha chága ná cahndún do jáchi ndá chuun quea candichi uun dó cája tánu dó nu



ñúhu i”, ñacachi da xihín da ndáá ñúhu dá cán. <sup>8</sup> Andá já ñacachi da ndáá ñúhu dá cán já xihín dá: “Quiñva ndó ñamaní, xitoho i ña ná coo too ga dó cuiá víti ná játayi i ñúhu saha do ta ná chicaan loho i tata saha do. <sup>9</sup> Ta xihín ña yóho jonáá cana cuihi nu do. Ta tá coó ñaha cana nu do já cahnda ndó do tá cúní ndó”, ñacachi mozo cán xihín xitoho da —ñacachi Jesús.

*Mé quivi ndiquehe ndée ñayivi ndája vaha Jesús in ña xica tojo*

<sup>10</sup> Ta ndaja coo in quivi ndiquehe ndée ná já ñasandacaan Jesús veñuhu jánaha tuhun Ndióxi nuú ñayivi. <sup>11</sup> Ta mé ini veñuhu cán ñasandacaan in ñáñáha, ña quíhvi sahun uní cuiá. In ínimá quini cúu rí ñaquíhvi ini ñá ta ñacaja rí ña ná nditojo ñá ta chí ni loho a cuú jándicaa ñá mé ñá. <sup>12</sup> Tá ñaxini Jesús ña já ñacana mé á ña já ñacachi a já xihín ña:

—Ndaja vaha i yohó viti —ñacachi Jesús xihín ña.

<sup>13</sup> Andá já ñachojó a ndáha á jata ña chí mé hora já ñandicaa yiquí cuñu ñá ta ñacasáha ña cája cáhnu ñá Ndióxi. <sup>14</sup> Joo mé da cúu sacuaḥa veñuhu cán ñacasáha ndícuehe da jáchi ñandaja vaha Jesús ñáñáha cán mé quivi ndiquehe ndée ná. Já ñacasáha cáchí da cán já xihín ñayivi ndúu ini veñuhu cán já:

—Íin iñu quivi núná nu yó cája chúun í ta tañu quivi já cuu quixi ndó catátá ndo tá cúní ndo. Joo a quixi ndó catátá ndo quivi ndiquehe ndée yó —ñacachi da xihín ná.

<sup>15</sup> Andá já ñacachi Jesús já xihín da sacuaḥa veñuhu:

—Co cúu ndó tá quiñva ndáa ndó. Cája mé ndó chuun quivi ndiquehe ndée yo tá ndáxí ndo tindiquí á búrrro jana ndó sahan ndó jácoho ndó ri ticuí. <sup>16</sup> Ta viti candehé ndo ñáñáha yóho. Cúu ñá ña ñaquixi chíchi Abraham ta sa íin sahun uní cuiá ñaquehe cuehe ña ñacaja Satanás, mé tiñáha sacuaḥa. Ta mé ndó cáhán ndo ña a váha toho

naçaja i ña najaní i ñañaáha yóho ndáha cuehe ña nandoho ña tixi cuahá cuia. Joo mé a ndaa nanditahan nuú i janí i ña ndahá cuehe yóho coó caja toho a cúu á quiúvi ndíquehe ndée yo —naçachi Jesús.

<sup>17</sup> Tá naçachi Jesús ña yóho chí a juú quiahva naçacahan nuú na co cúní Jesús cán. Joo tóco ndihi java ga ñayivi cán cájji ndivaha ini na jáchi naxini na ña cája Jesús ña náhnu ndivaha.

*Sácú Jesús quiahva sahá in ndíqui mostaza*

*(Mt. 13:31-32; Mr. 4:30-32)*

<sup>18</sup> Tá nandihí já naçachi tucu Jesús já:

—Ná ndicani i nu ndó ndaja ín nu ndíquiahva ñayivi mé ná ndáha Ndióxi ña ná cacomí a cuéntá saha ná. <sup>19</sup> Cúu á tátuhun in ndíquí mostaza ña chíhin in dataa nu ñúhu dá. Ta mé ndíquí loho yóho sáhnu a janda quiahva ndúu a tátuhun in yitó cáhnu nu xínu coo laa chójó ri táca ri nu ndáha do —naçachi Jesús.

*Sácú Jesús quiahva saha ndaja cája yusá naxiaa tá quee a xihín harina*

*(Mt. 13:33)*

<sup>20</sup> Anda já naçachi tucu Jesús já:

—Ná ndicani i nu ndo ndaja ín nu ndíquiahva ñayivi mé ná ndáha Ndióxi ña ná cacomí a cuéntá saha ná. <sup>21</sup> Cúu á tátuhun tá cávaha na pan ta quee yusá naxaa xihín harina. Cúu á tátuhun tá cáva táhan in ñañaáha loho yusá naxaa xihín uní táhnda náhnu harina ña ná jánañu a tóco ndihi mé yúsá cán —naçachi Jesús.

*Táhan ndivaha yéhe nuú quihvi ñayivi cuhun na indiví*

*(Mt. 7:13-14, 21-23)*

<sup>22</sup> Nandiquehe Jesús íchi cuahan chí ñuu Jerusalén ta ndijáá ñuu náhnu xihín ñuu válí nu yáha jánañu mé á

tuhun Ndióxi cuahān. <sup>23</sup> Ta ndaja coo nandaca tuhún in da Jesús já nacachi da já xihin á:

—Xitoho í, á chá cuití va ñayivi cacuu na cacu ndaa ínimā cuhun chí indiví —nacachi da xihin Jesús.

Anda já nanducú ñehe Jesús tuhun já cáchí a já xihin dá:

<sup>24</sup> —Cúú á tátuhun íin in yéhé táhán loho nuú ndihvi ñayivi indiví. Ñā cán queá xíní ñúhú ndó ndihí ini ndó ndihvi ndó chí yéhé loho cán jáchí cuahá ndivaha ñayivi ndítihvi na ñā quihvi na joo a cúu quihvi na. <sup>25</sup> Jáchí tá quiahva íin in xitoho vehe quiahva já íin Ndióxi. Jáchí tá ná ndicoo da cúú xitoho vehe cán chícaji tuun da vití yéhé vehe da já xinu coo ndó cándichi ndó jata véhe cáni ndáha ndó yéhé já cachi ndó já: “Á ndúyu ndó, xitoho i. Á a cája ndó ñamaní cuná loho ndó yéhé ná quihvi nde”, cachi ndó xihin dá. Ta já nducú ñehe da cán tuhun nu ndó cachi da já xihin ndo: “Cuáhán ndo jáchí co xíní toho i ndohó.” <sup>26</sup> Ta já casáhá mé ndó cachi ndó já xihin dá: “Cuahá tañu sa naxixi nde ta naxihi nde xihin ndo. Ta níí cáyé ñuu nde naxica nuu ndó najánaḥa ndó ñayivi.” <sup>27</sup> Anda já nducú ñehe da cán tuhun nu ndo já cachi da já xihin ndo: “Sa nacahān vi xihin ndo ñā co xíní toho i ndá na cúú ndohó. Caxoo ndihi ndó nuú i jáchí cúú ndó ñayivi cája ndinuhu ñā núu.” <sup>28</sup> Ta cán ndusa queá cuacu cóhó ndo ta casáhá cahña nuhu ndó xihín ñā cojo ini ndó. Jáchí cán cuni ndó Abraham xihin Isaac xihin Jacob xihin tóco ndihi na profeta. Cuni ndó ñā ndúu na indiví cán ta cómí Ndióxi cuéntá saḥa ná. Ta a juú quiahva taḥnda ini ndó jáchí tavá xóo Ndióxi ndohó ñā ná a ndíhvi ndó nu ndúu na cán. <sup>29</sup> Jáchí xinu ñayivi ndúu ndijáá ñuyíví nu Ndióxi ta ndaca nduu na nuú cacomí Ndióxi cuéntá saḥa ñayivi. <sup>30</sup> Ta mé quivi cán já cuni ndó java ñayivi, na coo saḥa mé nuú ñayivi ta nduu na na íin chága saḥa nu Ndióxi. Ta cán

cuni ndó java na ndíñehe jícó mé viti ta a cóo toho saha ná nu Ndióxi —nācachi Jesús.

*Táhnda ini Jesús ta sácu a sahá ñayivi ndúu ñuu Jerusalén (Mt. 23:37-39)*

<sup>31</sup> Mé quiví já naxinu coo java na fariseo nu Jesús já nācachi na já xihin á:

—Cuáhán inga ñuu cóun jáchi sácú ini Herodes cahní da yohó —nācachi na xihin á.

<sup>32</sup> Anda já nācachi Jesús já xihin ná:

—Cuáhán ndó cahan ndó xihin da cátóó jándahvi ñayivi jan ta cachi ndó xihin dá ña tává i ínima quini ñúhu ini ñayivi ta ndája vaha i na quihvi ta caja tá caja i ña yóho janda quiahva ná xinu coo quiví jándihi i chuun yóho.

<sup>33</sup> Joo sa mé Jerusalén jan quivi vi jáchi jan cúu nu sáhní na profeta. Ta viti ndítahan caca nuu yíi vi íchi xíca i cuahan i yóho —nācachi Jesús.

<sup>34</sup> Anda já nācachi tucu Jesús já:

—Ndáhví nahá nacuu ndó, na ndúu ñuu Jerusalén. Jáchi sáhní ndó na profeta. Ta ndícuíta ndó cáni ndó na nāchindahá Ndióxi nu ndó xihin yuu. Cuahá ndivaha tañu cúní jánditaca ndihi i ndohó joo cóo naxeen ndó. Cúu á tá quiahva cája nduxú tá játaca rí jahyi válí ri tixi ndixi ri.

<sup>35</sup> Ta viti cuni johó ndó ña cahan i xihin ndó. Vaxi quiví janí ndáha mé vehe ndó candoo a. Ta mé a ndaa ná cahan i xihin ndó ña a cúní ga ndó yehe janda quiahva ná xinu coo quiví cachi ndó: “Cáhnú nahá ná cacuu da vaxi cuéntá Ndióxi, xitoho í” —nācachi Jesús.

## 14

*Tá nandaja vaha Jesús in da naquihvi cuiñu*

<sup>1</sup> Ta ndaja coo in quiví ndíquehe ndée ná já nasahan Jesús naxixi a vehe in da cúu sacuha nuú na fariseo. Ta java ga na fariseo cán nacasáhá nání na Jesús ndúu na. <sup>2</sup> Ta

mé yati nu Jesús cán nasahjin in dataa, da naquihvi cuiñu yiquí cuñu. <sup>3</sup> Andá já nandaca tuhún Jesús na jánaha ley Moisés xihín na fariseo já nacachi a já xihín ná:

—Á núná nu yó ndaja vaha í in da quihvi mé quivi ndíquehe ndée yo, á co núná toho nu yó cája í ña —nacachi Jesús xihín ná.

<sup>4</sup> Joo táji nasahjin yuhú na cán. Andá já nandaja vaha Jesús da quihvi cán já nacachi a xihín dá ña ná quee da cuhun da. <sup>5</sup> Ta já nacachi a já xihín na fariseo cán:

—Mé ndó tá ndicava búrró á tindiquí jana ndo ini in táhvi chí ivi laá tavá ndó ri. Ta coo caja toho a á cúu á quivi ndíquehe ndée yo —nacachi Jesús.

<sup>6</sup> Joo coo nacuu nducú ñehe na tuhun nu Jesús.

<sup>7</sup> Andá já naxini Jesús ña jandá joho ndácaxi na nataca cán nuú vaha cacoo na já najánaha nu ná ndía vaha chága ndítahan caja na. Já nacachi a já:

<sup>8</sup> —Tá ná cana in na yohó cuhun in víco tándaaha, a nducú tohún cacoun nu sácoo na náhnu. Jáchí cuu xinu coo in da íin chága saha a juú ga yohó. <sup>9</sup> Ta da nacana yohó víco cán cuu cachi da já xuhun: “Quiahva nu íin coún jan ná cacoo da yoho”, cachi da xuhun. Andá já cacahan nuun já queún cuhun cacoun janda nu ndíhí. <sup>10</sup> Ña ndítahan cajún queá cacoun janda nu ndíhí. Já queá tá ná xinu da nacana yohó nu íun já cachi da já xuhun: “Amigo, cuáhán yaha nu ndúu na náhnu coún.” Xihín ña yoho ndindita jícun nuú na ndúu coo nu mesa xíxi xuhun cán. <sup>11</sup> Jáchí ndá na cája cáhnu mé, na cán cacuu na nanuu ndáha joho. Ta na co ndíñehe jícó mé, na cán cúu na ndicáhnu —nacachi Jesús.

<sup>12</sup> Andá já nacahan Jesús xihín mé da nacana ñahá cán já nacachi a já xihín dá:

—Tá ná cavaha cuahún ña cajáhñu na á ña cajini na, a cána tohún na cúu amigún jan ni na cúu ñanún jan ta ni

a cána tohún n̄a cúu táhún ta ni a cánún n̄a cuicá ndúu yati xuhun jan. Jách̄i tá ná caja na víco cana ri n̄a jan va yohó ta xihín ñ̄a jan táhnda cuéntá sahá ñ̄aman̄i nacajún xihín n̄a cán. <sup>13</sup> Ñ̄a ndítahan cajún tá ná cavañún in víco queá canún n̄a ndahví ta canún n̄a rénc̄o ta canún n̄a cuaá. <sup>14</sup> Ta já cajii ínún jách̄i n̄a cán a cúu toho caja na chahvi na ñ̄aman̄i nacajún xihín ná ñ̄uyívi yóho. Joo vaxi quívi tá ná nditacu ñ̄ayivi nasañehe ínim̄a vaha ñ̄uyívi yóho já chahvi Ndióxi ñ̄aman̄i nacajún jan —nacachi Jesús xihín ná.

*Sácú Jesús quiahva sahá in dataa, da nacana cuaha chá ñ̄ayivi ñ̄a ná cuhun n̄a víco vehe da*

*(Mt. 22:1-10)*

<sup>15</sup> Tá naxini joh̄o in táhan da ín̄ coo n̄u mesa xihín Jesús cán ñ̄a yóho já nacachi da já xihín á:

—Tahví nacuu n̄a ná ñ̄eñe táhvi cuhun indiví ñ̄a ná cacomí Ndióxi cuéntá sahá ná —nacachi da xihín Jesús.

<sup>16</sup> Anda já nasacu Jesús in quiahva n̄u dá já nacachi a já xihín dá:

—In dataa nacavaña da in víco cáhnu ta nacana cuahá ndivaha da ñ̄ayivi. <sup>17</sup> Ta tá sa naxin̄u coo hora cajini na já nasahnda da chuun n̄u mozo da ñ̄a ná cuhun da cana da n̄a ñ̄a quixi na ndaca nduu na n̄u mesa. Já nacachi da já xihín ná: “Naha quíi ndo jách̄i sa nacandívi ndihi ñ̄aha”, nacachi mozo xihín n̄a cán. <sup>18</sup> Joo tóco ndihi n̄a cán nacasáhá n̄a cáhan n̄a ñ̄a a cúu toho cuhun n̄a. Ta in táhan da cán nacasáhá cáhí da já xihín mé mozo cán já: “Jacá naxeen uun i in ñ̄úhu ta xíní ñ̄úhú cuhun i candehe e n̄u á. Cáhnu coo ínún”, nacachi da xihín mozo cán. <sup>19</sup> Ta inga da nacachi da xihín mé mozo cán já: “Jacá naxeen e uhun yúntá t̄indiqui ta viti cúni cuhun i coto ndojó i ri. Cáhnu coo ínún”, nacachi da xihín mozo cán. <sup>20</sup> Ta inga tucu da nacasáhá cáhí da já: “Jacá natandaha vi sahá ñ̄a cán queá a cúu toho cuhun i”, nacachi da xihín

mozo cán. <sup>21</sup> Tá nandicó cōo mozo cán nuú xitoho da já nandicani ndihi da nuú xitoho da ña ñacachi na cán xihin dá. Anda já ñacasáhá nandicuehe xitoho da cán já ñacachi tucu da já xihin mozo da: “Ta viti cuáhán camún ndijáá cáyé ñuu játacún na ndahví xihín na réncō xihín na cuaá. Cañehún na quisún yóho ná cuxu na”, ñacachi xitoho da cán xihin dá. <sup>22</sup> Tá nandihí já ñasahan mozo cán já ñacaja da ña ñacachi xitoho da xihin dá. Ta tá nandicó cōo da já ñacachi da já xihín xitoho da: “Sa ñacaja i tá ín ñasahnda ndó nuú i. Joo yójó tá yójó nuú cuu canduu chága na”, ñacachi da xihín xitoho da. <sup>23</sup> Anda já ñacachi xitoho da já xihin dá: “Cuáhán ndijáá cáyé xihin ndijáá íchí ta xihín ña ndúsá játacún na ña ná quixi na já ná chutú vehe e. <sup>24</sup> Jáchí ni in túhún toho táhan na ñacana i quixi vehe e nu cuítí cán, a quíxi ga na cajíni na ña ñacatáhan vehe e”, ñacachi da xihin mozo da —ñacachi Jesús.

*Ndítahan jándacoo í ndá ña ndáyahvi nu yo tá ta mé a ndaa cúní yó candico yó Jesús*

*(Mt. 10:37-38)*

<sup>25</sup> Cuahá ñayivi ndíco na jata Jesús cuahan na. Anda já nandicó cōo játá nuu Jesús já ñacachi a já xihin ná:

<sup>26</sup> —Ndá na cúní jácuaha xihín i xíní ñúhú quihvi ini chága na yehe a juú ga tátá na xihin náná na. Ta xíní ñúhú quihvi ini chága na yehe a juú ga ñájíhí na á jahyi na á ñani na á quiahva na. Ta xíní ñúhú quihvi ini chága na yehe a juú ga mé ná. <sup>27</sup> Ta ndá na cōo ndíco yehe sahá ña yíhví na quivi na, mé a ndaa cōo saha toho na cacuu na cuéntá yehe. <sup>28</sup> Tá cúní ndó cavaaha ndó in vehe jícó ña cája ndó queá tavá vaha ndó cuéntá ña á queta jjuhún ndo á a quéta já ná jáxinu ndó ña. <sup>29</sup> Jáchí tá ná a tává jihna ndó cuéntá ta casáhá ndó cavaaha ndó vehe ndó joo tá nandihí cōo quéta ga jjuhún ndó ña ná jáxinu cōo ndó ña já queá cacahan nuu ndo jáchí casáhá ñayivi cuacu ndaa

na ndohó. <sup>30</sup> Já cachi na já xihín ndo: “Taa jan nacasáhá da cávaha da vehe da joo coó nacuu jáxinu dá ña”, já cachi na cuacu ndaa na ndohó —nacachi Jesús.

<sup>31</sup> Anda já nacachi tucu Jesús já:

—Tá ná cani táhan in rey, da cómi uxu mil soldado xihín inga rey, da cómi oco mil soldado já quea xini ñuhú ndicani vaha ini da ña á cuu quee vaha da xihín da inga rey cán tá ná quihvi táhan da xihín dá. <sup>32</sup> Ta tá natavá vaha da cuénta ña a cuú quee vaha da xihín rey, da cómi oco mil soldado cán janda xica va in da já chindahá da java nataa ña ná cuhun da caça da ñamani nuú inga rey cán ña ná ndico va tondohó. <sup>33</sup> Quiahva já in ri xihín ndohó va. Ndá ndohó, na co cuni jandacoo tóco ndihi ña cómi ndo sahá yehe já quea coo saha toho ndó cacuu ndó cuénta yehe —nacachi Jesús.

*Cáhan Jesús ña tá jandacoo ñayivi ichi cuénta mé á cuú ná tátuhun ñii, ña co ohva ga*

*(Mt. 5:13; Mr. 9:50)*

<sup>34</sup> Anda já nacachi tucu Jesús já:

—Ña vaha ndivaha cuú ñii yivi na joo coó chuun toho a tá co ohva ña. <sup>35</sup> Mé ñii, ña co ohva ga jan ni co váha ña jácana í nu ñuhú yo jáchi co ndáhá toho ñuhú yo cája ña. Ña cája na xihín ñii jan quea sátá va na ña. Na in johó, ná cuni johó na —nacachi Jesús.

## 15

*Sácú Jesús quiahva sahá in ndicachi, ri nandiñuhú*

*(Mt. 18:10-14)*

<sup>1</sup> Cuahá na játaca jihún cuénta impuesto xihín cuahá na cája cuachi nacasáhá na cáyati na nu in Jesús jáchi cuni na cuni johó na nu cáhan mé á. <sup>2</sup> Sahá ña cán quea



naçasáhá na fariseo xihín na jánaha ley Moisés cáhan núu na sahá. Já cáchí xihín táhan na já:

—Taa jan ndíquehe vaha da ñayivi cája cuachi ta xíxi da xihín ná —cáchí xihín táhan na cán.

<sup>3</sup> Anda já nasacu Jesús in quiahva nu ná já nacachi a já xihín ná:

<sup>4</sup> —Mé ndó tá cómí ndo in ciento ndicachi ta tá in cuití ndíñúhú in ndicachi jana ndo ña cája ndó quea jándacoo ndó comi jico sahun comi rí cán yucu ta já quee ndó cuahan ndó ndinducú ndó rí nandiñúhú cán janda quiahva ndíñehe ndó ri. <sup>5</sup> Ta tá ndíñehe ndó ri já cávatá ndo já quehe ndó ri chínúu ndó ri sahá jiqui ndo vaxi ndó. <sup>6</sup> Ta tá xínu coo ndó vehe ndó já játaca ndó ñani táhan ndo xihín na xíní táhan xihín ndó. Já casáhá cáchí ndó já xihín ná: “Xíní ñúhú cajii íní ndó xihín i jáchí cájii íní i sahá ña nandiñehé e ndicachi janá i, rí nandiñúhú cán”, cáchí ndó xihín ná. <sup>7</sup> Mé a ndaa ná cahan i xihín ndo ña quiahva já ta janda chága ví cájii ini na ndúu indivi tá jándacoo in ñayivi cuachi cája na a juú ga sahá comi jico sahun comi ñayivi, na cája tá cája ña vaha.

### *Sácu Jesús quiahva sahá in jiuhún, ña nandiñúhú*

<sup>8</sup> Ta viti ná cahan tucu u inga quiahva xihín ndo. In ñañaaha nasahin uxu jiuhún caa ña yahvi ndivaha nu ña. Ta tá ndíñúhú in táhan ña cán já ndícahmi ña ñúhu ta tíhvi ña vehe ña jáchí ndíhi ini ña ndínducú ña ña ta víí víí ndínducú ña ña janda quiahva ná ndíñehe ña ña. <sup>9</sup> Ta tá sa nandiñehe ña ña já játaca ña ñani táhan ña xihín na xíní táhan xihín ña já casáhá cáchí ña já xihín ná: “Xíní ñúhú cajii íní ndó xihín i jáchí cájii ini i sahá ña nandiñehé e jiuhún i, ña nandiñúhú”, cachi ña cán —nacachi Jesús.

<sup>10</sup> Anda já nacachi tucu Jesús já:

—Mé a ndaa ná caħan i xih̄in ndó quiaħva já cájii ínı́ tátı́ Ndióxi ndúu indivı́ tá jándacoo in ñayivi cuachi cája na —naçachi Jesús.

*Tá najándacoo in dataa tátá da ta naquee da cuah̄an xicá da*

<sup>11</sup> Andá já nasacu Jesús in quiaħva nu ná já naçachi a já:

—In dataa nasah̄in ivi jahyi ta da. <sup>12</sup> Ta da loho chá cán naçachi da já xih̄in tátá da: “Taá i, á a váha ná ndicahnda va ndó ñaha cómi ndı́ já ná ndiquehe e ña cáni nuú i ndiquehe e”, naçachi da cán xih̄in tátá da. Andá já nasahnda java tátá da ñaha, in táhnda naquee mé dá ta in táhnda naquee ñani da. <sup>13</sup> Ta chá va quivı́ nayaha já najicó ndihi da loho chá cán ñaha ña nañehe dá nu tátá da ta xih̄in jiuħún naçana cán naquee da cuah̄an xicá ndivaħa da chí ñuu toħı́. Ta cán naçasáhá da jatı́vı́ ndaja naçuu joho da jiuħún da ña cája da ña núu. <sup>14</sup> Ta tá sa najatı́vı́ ndihi da jiuħún da já naixinu in tama ndeé ndivaħa mé nu ín da cán. Já naçasáhá naixinu joco nu dá ta naçasáhá cuı́co da. <sup>15</sup> Andá já naquee da nasah̄an da ndúcu da chuun caja da nuú in dataa mé nu ín da cán. Ta nasah̄an da cán chuun nu dá ña ná cuħun da candaa da cóchı́ janá da cán. <sup>16</sup> Ta tá cúni coo ndiava já cúni coo ña sáxı́ cóchı́ cán. Ta chí caxı́ da ña cán janda quiaħva chutú tıxi da cúni da. Joo co saħan na ña nu dá. <sup>17</sup> Andá já naçasáhá da ndı́cani ini da já naçahán da já: “Cuah̄a chá mozo táhan na cája chúun nu tátá i chí yójo joho ñaha xı́xáhan na ta yóho xıhi va yeħe joco ín i. <sup>18</sup> Ña caja i queá ndicó coo tucu u nu ín tátá i ta já cachi i já xih̄in ná: Tátá manı́ i, naçaja i cuachi nu Ndióxi ta naçaja ri cuachi nu ndóħı́ va. <sup>19</sup> Ta chí coó saħa mí vi cacuu u jahyi ndó saħá ña naçaja i. Ndiqueehe ndó yeħe ná cacuu u tátı́hun in mozo va ndó, já cachi i cuħun i nu

tátá i”, naçahán da. <sup>20</sup> Anda já naquehe da íchi cuanúhu dá vehe tátá da.

’Ta janda xicá va vaxi da já naxini tátá da mé dá já nandicuni a da. Ta natahvi ini a saha dá. Já xínu a nasahan ñehé a da já nanumi a da ta natatí yúhu á sajóho da. <sup>21</sup> Anda já nacachi da já xihín tátá da: “Tátá maní i, nacaja i cuachi nu Ndióxi ta nacaja ri cuachi nu ndóhó va. Ta chí coó saha mí i cacuu u jahyi ndó”, nacachi da xihín tátá da. <sup>22</sup> Ta ndaja coo tátá da nacasáhá cáhan xihín java ga mozo já nacachi a já xihín ná: “Cama ndó ta tavá ndó jáhma, ña vaha ta jácandixi ndó jahyi i. Ta chicaan ndó in jéhe nducu ndáha dá. Ta chicaan ndó ndusa saha dá. <sup>23</sup> Ta cañehe ndó chélo, rí ndató nandaha jan já ná quivi rí cuxú jáchi caja i in víco viti. <sup>24</sup> Jáchi jahyi i yóho tá naquee da cuahan da naçahán i naxihí da. Joo viti nandicó coo da nuú i. Saha ña cán cúu á tátuhun nanditacu tucu da. Nasacuu da tátuhun da nandiñuhú joo viti nandee va da”, nacachi tátá da cán. Anda já nacasáhá na cája na víco.

<sup>25</sup> Joo ndaja coo da cúu ñani da, da sacuahá chága cán, ndácaan da cája chúun da yucu va. Ta tá nandicó coo da já naxini johó da tívi musica ta cáxita sáhá na. <sup>26</sup> Anda já nacana da in da cája chúun cán já nandaca tuhún ñahá da ndía cúu. <sup>27</sup> Anda já nacachi da cája chúun cán xihín dá: “Cúu víco jáchi nandicó coo ñanún. Ta nasahnda tátún chuun ña ná quivi chélo, rí ndató nandaha cán jáchi cájii íní na ña nacasaa vaha ñanún ta coó a nandoho da”, nacachi da cán. <sup>28</sup> Joo ndaja coo da sacuahá cán najoo da ta chí coó naxeen da quihvi da nu cúu víco cán. Saha ña cán naqueta tátá da jata véhe já cáhan ndahví a xihín dá ña ná quihvi da. <sup>29</sup> Anda já nacasáhá cáhí da já xihín tátá da: “Taá i, sa cándaá vaha ini ndó ña sa cuahá ndivaha cuia cája chúun i nu ndo ta cája i tóco ndihi ña sáhnda ndó nuú i caja i. Joo ni in tuhún toho tañu coó nasahan

ndó ni in tijúhu loho nuú i ña ná caja i in víco loho cuxu u xihín na xíní táhan xihín i. <sup>30</sup> Joo viti nasahní ndó chélo, rí ndató nandaha jan, ña cája ndó víco jáchi ñacasaa ñani i jan. Ta mé da jan naxica nuu da najátivi ndaja ñacuu da jjuhún ndó xihín najihí xíca jii”, ñacachi da cán xihín tátá da. <sup>31</sup> Anda já ñacachi tátá da já xihín dá: “Candehé jahyi a. Mé a ndaa níi tiempo ún xihín i. Ta ñaha mé vún cúu ndihi ña ín nuú i. <sup>32</sup> Joo mé a ndaa ndítahan nu yo caja í víco ta cajii íni yo viti jáchi ñandicó coo ñanún, mé da ñacahán yo ña naxihí. Ta viti ñacasaa da cúu á tátuhun ñanditacu tucu da. Nasacuu a tátuhun ñandiñúhú da joo ñandiñehe yó da viti”, ñacachi a cán xihín jahyi a — ñacachi Jesús.

## 16

*Ndindaa chuun ndáha in mozo jáchi coo ñacaja vaha da nuú xitoho da*

<sup>1</sup> Anda já nasacu tucu Jesús inga quiahva nuú na xíca tuun xihín á. Já ñacachi a já xihín ná:

—Ñasahiin in taa cuicá ta ñasahiin in da ndáa ñaha da. Joo java ñayivi ñasahan na chicaan na cuachi jata dá nuú xitoho da ña játivi ndaja ñacuu johó da ña cúu ñaha xitoho da. <sup>2</sup> Anda já ñacana xitoho da mé dá já ñacachi da já xihín dá: “Johó cáhí ñayivi ñaquixi na cáhan na sahún sahá ña cán quea táxi i cuénta nuun ña ndicanún nuú i ndaja cáa chuun ñacajún jáchi ndindaa chuun ndáhun ta a cácuu gaún da ndáa ñaha i”, ñacachi xitoho da cán xihín dá. <sup>3</sup> Anda já ñacasahá da cúu mozo cán ndícani ini da já ñacahán da já: “Ndía caja i viti jáchi ndindaa va chuun ndahá i caja xitoho i. Ta co ndée toho i caja i chuun veé. Ta tá ná caca nuu i cuati i ta cacahan va nuú i. <sup>4</sup> Sa xíní vi ndía caja i já ná ndiquehe vaha ñayivi yehe vehe na tá ná ndindaa chuun ndahá i caja xitoho i”, ñacahán da.



á. Joo ndá dā cō ndáá dā ñaha da xihín ndinuhu ini da vatí loho cúú á quiahva já a cándaa vaha da ñaha da tá cuaha cúú á. <sup>11</sup> Ta tá cō ndáá vaha ndó ñaha ñuyíví yóho já queá ni Ndióxi a quiahva toho a ñaha cuéntá indiví nu ndo jáchi a catiahva ndó candaa ndó ña. <sup>12</sup> Ta tá cō tiáhva ndó candaa ndó ña nasahan too inga na nu ndo, náha ña a cúu ndiquiahva na ña cacuu ñaha mé ndó nu ndo jáchi a catiahva ndó candaa ndó ña.

<sup>13</sup> Ni in tühún toho mozo a cúu caja chúun nuú ivi xitoho. Jáchi candají dā in xitoho da ta inga xitoho da quihvi ini chága dā. Á tá cōó ta caja ndíví vaha da chuun nuú in xitoho da ta inga dā cán a cája chúun vaha da nuu. Ta quiahva já ín ri xihín ndóhó va jáchi a cúu caja cáhnu ndó Ndióxi tá chínúu ndó ínima ndó jatá jjuhún ndo — nacachi Jesús.

<sup>14</sup> Ta nu cáhan Jesús cán ndíta na fariseo, na catóó ndivaha jjuhún táa joh na nu cáhan mé á. Ta nacasáhá na sácū ndaa na Jesús. <sup>15</sup> Andā já nacachi Jesús já xihín ná:

—Cája ndó tátuhun cúú ndó ñayivi vaha nuú ñayivi joo sa xíní vaha Ndióxi ínima ndo. Ndá ña cáhvi ini ñayivi ndáyahvi chága, ña jan queá cō ndáyahvi nu Ndióxi — nacachi Jesús xihín ná.

*Ndítahan nuú ñayivi caja na ña nasahnda Ndióxi anda quiahva ná naá saha ñuyíví xihín indiví*

<sup>16</sup> Andā já nacachi tucu Jesús já:

—Janda tá cámaní xinu Juan, dā nacaja ndúta ñayivi já nasahin ley Moisés xihín ña najánaha na profeta sanahá. Joo viti ndijáá ndicuíta nuu tuhun Ndióxi cuahan ña vaxi quivi cacomí Ndióxi cuéntá sahá ñayivi. Ta ndá na cúní ndiquiahva na mé ná ndáha Ndióxi ndítahan nu ná ndihi ini na ndihvi na íchi cuéntá mé á.

<sup>17</sup> Joo janda quiahva ná naá saha ñuyívi xihín indivi ndítahan nuú ñayivi caja na tóco ndihi ña sáhdá ley. Jáchi janda vaha chága ín a ná ndihi sahá ñuyívi xihín indivi a juú ga ña ná ndihi sahá in túhún tuhun ndácaan nu ley Moisés —nacachi Jesús.

*Tá jándacoo táhan na sa natandaha*

*(Mt. 19:1-12; Mr. 10:1-12)*

<sup>18</sup> Anda já nacachi tucu Jesús já:

—Tá jándacoo in dātaa ñájíhí da ta tándaha dá xihín inga ñáñáha já queá cája da cuachi nu Ndióxi. Ta ndá da tándaha xihín in ñáñáha, ña najándacoo yí, cája ri da cán va cuachi nu Ndióxi —nacachi Jesús.

*Ña nandoho in da cuicá xihín ña nandoho in da nani Lázaro*

<sup>19</sup> Ndícani Jesús nuú ñayivi já nacachi a já xihín ná:

—Nasahin in da cuicá ta a juú quiahva vaha jáhma nasandixi da ta chí a juú quiahva ñúchí nacaja cutú da vehe da jáchi ndijáa ní quivi nasacaja da víco nu xixáhan cuicá ndivaha da. <sup>20</sup> Ta nasahin in da ndahví nani Lázaro. Quíhvi da ta ndóho da cuehe ndihi táhyi. Ta ndahví cáa da ín coo da nu ñúhu yuyéhe da cuicá cán. <sup>21</sup> Ta mé da ndahví yóho cuni da jáchutú da tixi da xihín ña ndícava nu mesa da cuicá cán. Ta xihín ña ndeé quíhvi da ndahví yóho chí janda tina xínu coo rí yácó ndaa rí nuú ndihi nanana ní da cán. <sup>22</sup> Ta ndaja coo in quivi naxihí da ndahví cán. Já naxinu tátō Ndióxi já ñéhe na da cuahan da coo da indivi nu ín Abraham. Ta jári da cuicá cán va naxihí da ta nasahan na najánduxu ná da. <sup>23</sup> Ta nani ndóho ini da cuicá cán ndácaan da indayá já nandiñehe da nuu dá. Já naxini xicá da Abraham. Ta naxini da ín Lázaro xihín dá. <sup>24</sup> Anda já nacasáhá da cuicá cán cáyuhú da já nacachi da já: “Tátá Abraham, candáhvi loho ini ndó yehe. Ta ná chindahá ndó Lázaro ná quixi da yóho quiahva

loho da ticuǐ jándaxi loho da yaá i jáchi ndóho ndivaha ini i indayá yóho nu cáyi ñuhú ita.”<sup>25</sup> Anda já nacachi Abraham já xihín dá: “Jahyi a, xíní ñuhú ndicuhun inún ña vaha ndivaha nasahiún ñuyíví. Ta Lázaro yóho ndáhví ndivaha nandoho da ñuyíví sahá ña cán queá co ndóho ga ini da yóho viti nani ndóho inún jan viti.”<sup>26</sup> Ta a cúu saa toho Lázaro nu iún jan jáchi ín in táhvi cúná ndivaha tañu ndehe, na ndúu xoo chóho xihín ndóhó, na ndúu xoo chí jan. Sahá ña cán queá a cuú cuhun na ndúu xoo chóho chí jan ta ni na ndúu xoo chí jan a cuú quixi xoo chóho”, nacachi Abraham xihín da cán.<sup>27</sup> Anda já nacachi da cuicá cán já xihín Abraham: “Tá ta já ta caja loho ndó ñamaní, tátá Abraham ña ná chindahá loho ndó Lázaro ña ná cuhun da vehe tátá i<sup>28</sup> ná cahan loho da xihín na vehe e. Jáchi ndúu uhun ñani i ta co cúní i ña ná quixi na cán yóho ndoho ini na tá quiahva ndóho ini i viti”, nacachi da cuicá cán xihín Abraham.<sup>29</sup> Joo nanducú ñehe Abraham tuhun nu dá já nacachi da já xihín dá: “Sa ín va ley nacahyí Moisés xihín ña nacahyí na profeta nuú na cán. Vaha va ná caja na ña cáchí a”, nacachi Abraham xihín dá.<sup>30</sup> Anda já nanducú ñehe da cuicá cán tuhun nu Abraham já nacachi da já xihín dá: “Mé a ndaa queá cahan ndó jan, tátá Abraham. Joo vaha chága ná chindahá ndó in táhan na sa naxihí já ná cahan na xihín ñani i já ná jándacoo cama na cuachi cája na”, nacachi da xihín Abraham.<sup>31</sup> Anda já nacachi tucu Abraham já xihín dá: “Tá co cúní ñanún caja da ña nacahyí Moisés xihín ña nacahyí na profeta quiahva já a cándúsa toho ri na ndiquehe vaha na in ndíi tá ná nditacu a cuhun a cahan xihín ñanún”, nacachi Abraham xihín da cuicá cán —nacachi Jesús xihín ñayivi.



## 17

*Tá jácāhan táhan ñayivi caja na cuachi*

*(Mt. 18:6-7, 21-22; Mr. 9:42)*

<sup>1</sup> Anda já nacachi Jesús já xihín na xíca tuun xihín á:

—Ní tiempo quixi ñaha ña cája ña ná ndicají ini ñayivi caja na cuachi. Joo ndáhví nacuu na tá ná jándicava na inga na nuú cuachi. <sup>2</sup> Janda vaha chága ná candico in yuú yojó jico ná ta ná ndihi saha ná cahá tañuhú a juú ga ña jándicava na na ndáhví yóho nuú cuachi. <sup>3</sup> Cuéntá coo ndó xihín ña cája ndó.

<sup>4</sup> Tá ná caja ñani táhan ndó cuachi nu ndo, jánani ndó da. Ta tá ná tahvi ini da sahá cuachi nacaja da, caja cáhnu ini ndó saha dá. <sup>4</sup> Ta vatí usa táhnda ná caja da cuachi nu ndo in quivi ta já vaxi tucu da nu ndo usa táhnda ta já cásahá cáhí tucu da xihín ndo ña a ndícó coo ga da caja da ña já ndítahan nu ndó caja cáhnu ini ndó saha dá —nacachi Jesús.

*Cúni na xíca tuun xihín Jesús candeé cáhnu chága ini na mé á*

<sup>5</sup> Tá nandihí já nacachi na xíca tuun xihín Jesús cán já xihín á:

—Vá ná caja ndó ña ná candeé chága ini nde ndohó —nacachi na xihín á.

<sup>6</sup> Anda já nacachi Jesús já xihín ná:

—Tá ná candeé ini ndó yehe vatí cúú á tátuhun in ndiquí mostaza cuu cachi ndó xihín in yíto cáhnu ña ná cuhun dó candichi dó ini tañuhú ta chí já ndusa coo.

*Ña ndítahan caja in da nuú xitoho da*

<sup>7</sup> Tá ín in mozo ndo ta chindahá ndó da yúcu ña ná tiin da yata á candaa da quítí jana ndo ta tá ná ndícó coo da cán já ama ná cachi ndó xihín dá ña ná yaha da cacoo da nu mesa cuxu da. <sup>8</sup> Ña caja ndó queá cachi ndó já xihín

dá: “Jácatáhan ñaha ná cajini i ta caja ndívi ná cuxu u. Ta tá sa ñandihi ñaxixi i já cuxu mún tá cúnun”, ña ñan va queá cañan ndó xihín mozo ndo. <sup>9</sup> Ta ama ná ndiquiahva ñayivi ndixahvi nu mozo na tá ñandihi ñacaja da in chuun ñasahnda na nu dá caja da. <sup>10</sup> Ta quiahva já ndítahan coo ri xihín ndóhó va. Tá ná ndihi ñacaja ndó tóco ndihi chuun ñasahnda Ndióxi nu ndo já ndítahan nu ndó cachi ndó já: “Mé nde cúu nde mozo coó saha ta ñacaja cuití va nde chuun ndítahan nuú nde caja nde”, já ndítahan cachi ndó —ñacachi Jesús xihín na cán.

*Tá ñandaja vaha Jesús uxu ña ndóho cuehe táhyi*

<sup>11</sup> Ta nani xíca Jesús cuañan chí ñuu Jerusalén já ñayaha chí xoo nu ín lindero na Samaria xihín na Galilea. <sup>12</sup> Ta tá ñaxinu coo a in ñuu loho já ñaqueta uxu ña ndóho cuehe táhyi nu á joo ñasacuita xíca da nu á. <sup>13</sup> Já ñacasáhá cáyuhú da nu Jesús já ñacachi da já xihín á:

—Jesús, maestro, candáhví loho ini ndó ndehe — ñacachi da xihín Jesús.

<sup>14</sup> Tá ñaxini Jesús ndíhuxu da cán já ñacachi a já xihín dá:

—Cuáhán ndó ñaha ndó mé ndó nuú na cúu jutu — ñacachi Jesús xihín dá.

Ta nani xíca ndihi da cuañan da ñandivií yiquí cuñu da ta ñandindaa cuehe da. <sup>15</sup> Ta ndaja coo in táhan ndíhuxu da cán tá ñaxini da ña ñandivií yiquí cuñu da já ñacavatá ndivaha da. Ta ñacasáhá da cája cáhnu da Ndióxi cáyuhú cóhó da já ñandicó coo da nu Jesús. <sup>16</sup> Já ñacaxítí da nu á janda quiahva ñaxinu taan da nu ñúhu jáchi ndíquiahva ndivaha da ndixahvi nu á. Ta mé ñataa yóho cúu dá da Samaria. <sup>17</sup> Andá já ñacachi Jesús já xihín dá:

—Uxu cúu da ñandivaha ñacaja i. Joo in da cán coo ñaxeen toho da ndicó coo da ndiquiahva da ndixahvi nuú

i. <sup>18</sup> In túhún da tóho yóho cuití va cúu da nandicó coo ndíquiahva ndixahvi nu Ndióxi —ñacachi Jesús.

<sup>19</sup> Anda já ñacachi Jesús já xihín dataa cán:

—Candichi ta cuáhán. Nandivahún jáchi ñacandúsún yehe —ñacachi Jesús.

*Ndaja coo tá ná xinu coo quiví cacomí Ndióxi cuéntá sahá ñayivi*

(Mt. 24:23-28, 36-41)

<sup>20</sup> Ta ndaja coo na fariseo ñacasáhá na ndáca tuhún na Jesús ña ndá ama casáhá Ndióxi cacomí a cuéntá sahá ñayivi. Anda já nanducú ñehe Jesús tuhún nu ná já ñacachi a já xihin ná:

—A cúu cuni ndó nuú cacomí Ndióxi cuéntá sahá ñayivi.

<sup>21</sup> Coó toho ñayivi cachi xihin ndo: “Yóho íin a”, á “Caa íin a.” Mé a ndaa ná cahan i xihin ndo sa naxinu va quiví ta viti tañu mé ndó ñacasáhá cómí Ndióxi cuéntá sahá ñayivi —ñacachi Jesús xihín na fariseo cán.

<sup>22</sup> Anda já ñacasáhá cáchí a já xihín na xíca tuun xihin á:

—Vaxi quiví tá cuni ndó cuni ndó yehe, da nachindahá Ndióxi nduu ñayivi vatí ná coo i in quiví cuití va. Joo a cóo toho i xihin ndo. <sup>23</sup> Ta queta ñayivi cachi xihin ndo: “Yóho íin da.” Á tá coó ta cachi na xihin ndo: “Cán íin da”, cachi na xihin ndo. Joo coto a cühun ndó candehé ndo. A cándico ndó jata ná cühun ndo. <sup>24</sup> Jáchi tá ná xinu ndusa quiví quixi yehe já cuni ndó quixi i tá quiahva quixi tasa. Ta ndijáá ñayivi cuni na ndá quiahva ndiyehé a tá xoo tá xoo. Quiahva já coo tá ná xinu quiví quixi yehe, da nachindahá Ndióxi nduu ñayivi. <sup>25</sup> Joo jihna ñúhú ndítahan nuú i ndoho ndivaha ini i. Ta a juú quiahva candají ñayivi ndúu tiempo viti yehe. <sup>26</sup> Tá quiahva ñasahjin tiempo tá ñasahjin Noé sanahá quiahva já coo ri tá ná xinu coo quiví quixi ri yehe, da nachindahá Ndióxi

nduu ñayivi. <sup>27</sup> Jáchí mé tiempo cán xíxi na ta xíhi na ta cája na vicó tándaḥa janda quiahva naxinu quiví naquihvi Noé ini barco cáhnu. Já naxinu javi quíni ndivaḥa ta najahvi ñuyíví xihín ticuúí já naxihí ndihi ñayivi nasanduu tiempo cán. <sup>28</sup> Ta quiahva já nasahiin ri mé tiempo tá nasatacu Lot sanahá. Jandá johó cáxixi ñayivi ta jandá johó cáxihí na ta jandá johó xéen na ñaha ta jandá johó jícó na ñaha ndúu na jandá johó cáxutu na ta jandá johó cávaha na vehe na. <sup>29</sup> Ta tá naxinu quiví najándacoo Lot ñuu Sodoma cán já naqueta da cuahan da xihín na vehe da já nacuyu ñúhu xihín yuu cáyi chí indiví ta já naxihí ndihi ñayivi nasanduu cán. <sup>30</sup> Quiahva já caja ñayivi mé tiempo já jáchí ndihi ini na catacu na janda quiahva xinu coo quiví quixi tucu yehé ñuyíví yóho, mé da nachindahá Ndióxi nduu ñayivi.

<sup>31</sup> 'Ta ndá ndó, na ndúu jata véhe ndó mé quiví já a quihvi ndó ini vehe ndó ña tavá ndó ñaha cómi ndó. Ta ndá ndó, na ndúu yucu a ndíxi ndó vehe ndó. <sup>32</sup> Ndítahan ndicuhun ini ndó ndaja nandoho ñá cúú ñájíhí Lot jáchí nacava jata nuu ña sándeheé ñá ña najándacoo ñá ta já nandihí saha mé ñá cán. <sup>33</sup> Ndá na chínúu ínima jata ñaha ñuyíví yóho, na cán cúú na ndihi saha. Joo ndá na ndíquiahva mé ndáha mí i ta ín tiahva na quivi na sahá i, na cán cúú na catacu anda ama cáa quiví.

<sup>34</sup> 'Mé a ndaa ná cahan i xihín ndo ña tá ná xinu quiví cán já ndiquehe e na cúú cuéntá mí i. Cacuu a tátuhun tá ndúu ivi na quíji na in xito ta in na ndiquehe e ta inga na candoo va sahá ña coo nacandúsa na mí i. <sup>35</sup> Ta tá ndúu ivi na ndíco na ta in ñá ndindita cuhun xihín i ta inga ñá candoo va. <sup>36</sup> Ta tá ndúu ivi dataa yucu xutu da ta in da ndindita cuhun xihín i ta inga da candoo va —nacachi Jesús.

<sup>37</sup> Tá naxini johō nā xíca tuun xih̄in Jesús ña yóho já nandaça tuhún nā mé á já nacachi na já xih̄in á:

—Ta ndachi yaha tóco ndihi ña cáhí ndó xih̄in nde yóho, xitoho.

Anda já nacachi Jesús já xih̄in ná:

—Tá quiahva cája tiyocó tá táca ri nū cándúhu in quíti, rí naxih̄i quiahva já caja ñayivi taca na nuú i tá ná xinū quiví quixi i —nacachi Jesús.

## 18

### *Tá naxiça in ña cuáan ñamanj nuú da cúu juéxe*

<sup>1</sup> Nasacu Jesús in quiahva nū ná jáchi xih̄in quiahva yóho cúnj a jánaḥa nū ná ña níi tiempo xínj ñúhú caça tahví nā nū Ndióxi ta cō ndítahan cuitá ini na xih̄in á. <sup>2</sup> Já nacachi a já xih̄in ná:

—In ñuu nasah̄in in juéxe ta coó nasah̄in toní ñúhú da xih̄in Ndióxi ta ni cō sáhnj i mé dá cúu ñayivi. <sup>3</sup> Ta mé ñuu cán nasah̄in in ña cuáan. Ta ndijáá níi quivj sáhan ña cáhan ndahví ña xih̄in mé juéxe cán ña ná caja víj da sahá ña sahá in nā cō cúnj táhan xih̄in ña. <sup>4</sup> Ta sa cuahá quivj ta já cúu va ña sáhan ña nū dá ta cō cúnj da caja víj da saḥa ña. Joo tá nandihj já nacahán da já: “Vatí coó toní ñúhú i xih̄in Ndióxi ta ni cō sáhnj i mí i cúu ñayivi <sup>5</sup> joo já caja tá caja víj i saḥa ña cuáan yóho jáchi jándihj ndivaha ña yeḥe saḥa ña cán ndiquehe e saḥa ña já ná a quixi ga ña jándihj ña ini i”, nacahán da cúu juéxe cán —nacachi Jesús xih̄in ná.

<sup>6</sup> Anda já nacachi Jesús já xih̄in nā ndúu cán já:

—Ña yóho queá nacachi juéxe, da cō ñeḥe ínima vaha cán. <sup>7</sup> Joo cáhnu ga ví ñaha caja Ndióxi tá ná ndiquehe a sahá nā cúu cuéntá mé á tá xíca tahví nā nū á ñuu ta ndiví. Jáchi ndátj tiahva chindeé a nā cúu cuéntá mé á. <sup>8</sup> Mé a ndaa ná caḥan i xih̄in ndo ña ivj laá ndiquehe mé á

sahá ná. Joo in ñaha cúnì ndaça tuhún ì ndohó. Á ndiñehé e ñayivi cándeé ini na yehe tá ná xinu quiví quixi tucu u ñuyiví yóho —ñacachi Jesús xihín ná.

*Sácú Jesús quiahva sahá in da fariseo xihín sahá da játaca jiuhún cuéntá impuesto*

<sup>9</sup> Anda já nasacu Jesús inga quiahva nuú java ñayivi, na ndiñehé jícó mé, na cáhán ña mé cuití na cája ña va. Ta já ñacasáhá cáchí a já xihín ná:

<sup>10</sup> —In tañu ivi ta ñasahan da veñuhu caça tahví da nu Ndióxi. In táhan da cán cúú fariseo ta inga da cán cúú da játaca jiuhún cuéntá impuesto. <sup>11</sup> Ta nani xíca tahví da fariseo cán nu Ndióxi cándichi da já cáchí da já: “Tátá Ndióxi, ndiquiahva ì ndixahvi nu ndo jáchi co cája ì tá quiahva cája java ga ñayivi. Jáchi java na cája cuihná na ta quini cája na ta cátóo na coo na xihín ñájíhí ñani táhan na. Ta jári ndiquiahva ì ndixahvi nu ndo jáchi co cája ì tá quiahva cája da játaca jiuhún cuéntá impuesto yóho. <sup>12</sup> Jáchi yehe ivi tañu xíjuhun ì in in semana ta tá cháhvi na yehe sahá chuun cája ì já cávaha ì uxu táhndá ta já jóco ì in táhndá nu mé nó”, cáchí da fariseo cán. <sup>13</sup> Joo da játaca jiuhún cuéntá impuesto cán xíca xíca nasandichi da ta chí ni nuu dá co cúnì da ndiñehé da indiví sahá ña cáhán da ña coo saha dá caja da ña. Ña cája da queá cáni da yíca ndícá da ta já cáchí da já xíca tahví da nu Ndióxi: “Tátá Ndióxi, candáhvi ini ndo yehe jáchi cúu u in da cája cuachi”, cáchí da. <sup>14</sup> Mé a ndaa ná cahan ì xihín ndo ña ñacaja cáhnu ini Ndióxi sahá da játaca jiuhún cuéntá impuesto já cuanúhu va da joo coo ñacaja cáhnu ini a sahá da fariseo cán. Ñacaja cáhnu ini Ndióxi sahá da játaca jiuhún cuéntá impuesto jáchi ndá na ndiñehé jícó mé jánuu ndáha Ndióxi na. Joo ndá na jánuu mé nu Ndióxi já jándiñehé jícó mé á na —ñacachi Jesús xihín ná.

*Cája yii Jesús na valí**(Mt. 19:13-15; Mr. 10:13-16)*

<sup>15</sup> Ta cuahá ñayivi ñéhe na na valí naixinu coo na nu Jesús já ná cani ndaa ndáha á na. Joo tá naixini na xíca tuun xihin Jesús cán ña yóho, ñacasáhá na cája cuehe na xihin mé na ndáca na valí cán. <sup>16</sup> Joo ñacana Jesús na já ñacachi a já xihin ná:

—Quiahva ndó ñamaní ná quixi na valí nuú i. Ta a cájí nuu ndó nu ná jáchi cacomí Ndióxi cuéntá sahá ñayivi tá ná cajú na tá quiahva cajú na valí yóho. <sup>17</sup> Mé a ndaa ná cahan i xihin ndo ndá na co cúní ndiquiahva na mé ná ndáha Ndióxi tátuhun cajú na valí yóho já queá a cúu cacomí Ndióxi cuéntá saha ná —ñacachi Jesús xihin ná.

*Cáhan in da cuicá xihin Jesús**(Mt. 19:16-30; Mr. 10:17-31)*

<sup>18</sup> In táhan da sáhdá chuun cán ñandaca tuhún da Jesús já ñacachi da já xihin á:

—Maestro, mé ndó cúu ndó taa vaha ña cán queá ndáca tuhún i ndohó ndía ndítahan cajú i já ná ñehe táhvi i cuhun i indiví coo i anda ama cáa quivi —ñacachi da xihin Jesús.

<sup>19</sup> Anda já ñacachi Jesús já xihin dá:

—Ndá cuéntá queá cáhún xihin i ña cúu u da vaha. Ni in túhún toho ñayivi coo cúu ná na vaha ñuyiví yóho. In túhún Ndióxi cuití va queá vaha. <sup>20</sup> Sa xini vún ña sáhdá Ndióxi nuun cajún já cáhí a já: “Coto a coún xihin ñájíhí á yí ñani táhún. Coto a cáhnún ndii. Coto a cajú cuíhnún. Coto a cáhun ña tuhún sahá ñayivi. Ta cajú cáhnún tátún nánún” —ñacachi Jesús xihin da cuicá cán.

<sup>21</sup> Anda já ñanducú ñehe da cán tuhun nu Jesús já ñacachi da já xihin á:

—Janda taa loho i ñacasáhá i cajú i tóco ndihi ña sáhdá Ndióxi cajú i —ñacachi da xihin Jesús.

<sup>22</sup> Tá naxini joho Jesús ña ñacachi da yóho xihin á já ñacachi a já xihin dá:

—Inga ñaha cámanj cajún: Cuáhán jicún tóco ndihi ñahún jan ta ndicahnda jihún jan nuú na ndahví já ñehe táhvun coo cuahá ñahún indiví. Ta tá nandihí já quisún candicún yehe —ñacachi Jesús xihin dá.

<sup>23</sup> Tá naxini joho da cuicá cán ña ñacachi Jesús xihin dá já ñacacuéha ndivaha ini da jáchi ín cuahá ndivaha ñaha dá. <sup>24</sup> Tá naxini Jesús ña ñacacuéha ini da cuicá cán já cáchí a já:

—Ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuénta saha ná. <sup>25</sup> Jáchi janda cama chága cuu yaha in camello ini in yávi saha yítucú a juú ga ña ná ndiquiahva in na cuicá mé ná ndáha Ndióxi ña ná cacomí a cuénta saha ná —ñacachi Jesús.

<sup>26</sup> Tá naxini joho ñayivi ndíta cán ña ñacachi Jesús já ñacachi na cán já:

—Ndá na cúu na cuu cacu ndaa ínima, dá já.

<sup>27</sup> Anda já ñacachi Jesús já xihin ná:

—Ndióxi quéa cuu caja tóco ndihi ñaha vatí ñayivi a cuú caja na ña —ñacachi Jesús xihín ñayivi ndúu cán.

<sup>28</sup> Anda já ñacachi Pedro já:

—Candehé ndo, xitoho i. Ndehe najándacoo nde tóco ndihi ña ñasacomí nde ta ndíco nde ndohó —ñacachi da xihin Jesús.

<sup>29</sup> Anda já nanducú ñehe Jesús tuhun nu dá já ñacachi a já:

—Mé a ndaa ná cahan i xihin ndo ña ndá na jándacoo vehe á tátá náná na á ñani na á ñájlhí na á jahyi na sahá ña cúnj na ña ná cacomí Ndióxi cuénta saha ná, <sup>30</sup> na cán cúu na ñehe cuaha chága ñaha ñuyíví yóho jata tóco ndihi ña najándacoo na. Ta vaxi quíví já ñehe táhvi ri na catacu na indiví anda ama cáa quíví —ñacachi Jesús.



*Cáxi tuhun tucu Jesús ña quivi a*

*(Mt. 20:17-19; Mr. 10:32-34)*

<sup>31</sup> Tá nandihí já ñatavá xóo Jesús ndíhuxu ivi na xíca tuun xihin á cán. Já ñacachi a já xihin ná:

—Viti cohó chí ñuu Jerusalén nuú xinu coo tóco ndihí ña ñacahyí na profeta sahá yehe, da ñachindahá Ndióxi nduu ñayivi. <sup>32</sup> Jáchi mé ñuu cán tiin na yehe já ndiquiahva na yehe ndahá na tóho. Cuacu ndaa na yehe. Canahá na xihin i. Cuihna ndaa na tójí na yehe. <sup>33</sup> Cani na yehe. Ta tá nandihí já cahní na yehe. Joo tá ná yaha uni quivi já nditacu tucu u tañu na ñaxihí —ñacachi Jesús.

<sup>34</sup> Joo na xíca tuun xihin á cán ni loho coo ñacandaá ini na ña cúni Jesús cachi a xihin ná. Jáchi cúu á ñaha ña coo ñacuu candaá ini na saha.

*Tá nandaja vaha Jesús in da cuáá ñuu Jericó*

*(Mt. 20:29-34; Mr. 10:46-52)*

<sup>35</sup> Tá ñacayati Jesús ñuu Jericó cán ta yati jín íchi nu xíca mé á cuahan cán íin coo in da cuáá sáti da. <sup>36</sup> Ta tá ñaxini johó da ña yaha cuahá ñayivi cuahan na já ñacasáhá da ndáca tuhún da ndía cúu. <sup>37</sup> Anda já ñacachi na já xihin dá:

—Jesús, da ñuu Nazaret, da cán cúu da yaha cuahan yóho —ñacachi na xihin dá.

<sup>38</sup> Anda já ñacasáhá da cuáá cán cáyuhú da já cáchi da já:

—Jesús, da ñaquixi chichi David, caji ndó ñamaní candáhví loho ini ndó yehe —cáchi da.

<sup>39</sup> Joo ñayivi, na cánuú cuahan xihin Jesús cán ñacasáhá na caji cuehe na xihin dá ña ná caji da yúhu dá. Joo ví ga ví ñacasáhá da cáyuhú da já cáchi tucu da:

—Ndóhó, da ñaquixi chichi David, caji ndó ñamaní candáhví loho ini ndó yehe —cáchi da cáyuhú da.

<sup>40</sup> Andá já ñacandichi Jesús já ñasahnda chuun ña ná cañehe na da cuaá cán nu á. Ta tá ñaxinu da nu á já nandaca tuhún a da. <sup>41</sup> Já ñacachi a já xihín dá:

—Ndía cúnun ná caja i xuhun —ñacachi Jesús xihín dá.

Andá já ñanducú ñehe da cuaá cán tuhun nu á já ñacachi da já:

—Ndaca ndehé e cuni i, xitoho i —ñacachi da.

<sup>42</sup> Tá ñandihi já ñacachi Jesús já xihín dá:

—Candehé viti. Nandivahún jáchi cändeé inún yehe —ñacachi Jesús xihín dá.

<sup>43</sup> Chí ivi laá ñanuna nuú da cuaá cán. Ta chí a juú quiahva cája cáhnu da Ndióxi. Ndico da Jesús cuahan da. Ta jári tóco ndihi ñayivi tá ñaxini na ña yóho já ñacasáhá na cája cáhnu na Ndióxi.

## 19

### *Tá cáhan Jesús xihín in da naní Zaqueo*

<sup>1</sup> Tá ñandihi já ñandihvi Jesús ñuu Jericó cán já xíca mahñú ñuu cuahan. <sup>2</sup> Ta cán ñasahjin in da cuicá naní Zaqueo, da cúu da sacuahá nuú na játaca jiuhún cuéntá impuesto. <sup>3</sup> Ta cuni da cuni da Jesús joo a cuú cuni ñahá da jáchi cáti cuahá ndivaha ñayivi nu Jesús. Ta mé dá co xínu da co da cuni ñahá da jáchi cúu dá da ndihí. <sup>4</sup> Chí xínu da ñacanúu da nuú ñayivi cuahá cán já ñandaa da nuú in yíto yati mé jín íchi, mé nuú yaha Jesús cán ña ná cuni ñahá da. <sup>5</sup> Ta tá ñayaha Jesús yati saha yíto cán já ñandiñehe nuú á nu cánúu da cán. Já ñacachi a já xihín dá:

—Zaqueo, cuánuu quí jáchi cuni coo tóo i vehún quivi víti —ñacachi Jesús xihín dá.

<sup>6</sup> Andá já ndáva nihni Zaqueo ñanuu da nu yíto cán. Já cávatá da ñandiquehe vaha da Jesús cañehe da a cuahan da xihín á vehe da. <sup>7</sup> Joo tá ñaxini tóco ndihi java ga ñayivi cán ña yóho já ñacasáhá na cáhan núu na saha Jesús. Ta

cáchí nā ñā cuāhan mé á coo tóo a vehe in dataa, da cāja cuahá cuachi. <sup>8</sup> Ta tá sa ndúu ndihi na vehe Zaqueo já nandaca ndichi Zaqueo já nacachi da já xihín Jesús:

—Candehé ndo, xitoho i. Cahnda java ndaa i ñaha cómí i ta já ndicahnda i ña nuú nā ndahví. Ta ndá nā nacaja cuíhná i ñaha, nā cán quiahva i comi táhnda chága ñaha nuu jáchi najándahvi i nā —nacachi Zaqueo cán.

<sup>9</sup> Anda já nacachi Jesús já xihín ná:

—Quiví viti cāja cáhnu ini Ndióxi sahá cuachi da yóho xihín cuachi nā vehe da jáchi xihín ña nacaja da yóho viti náha ña mé a ndaa cándéé ini da Ndióxi tá quiahva nacaja Abraham. <sup>10</sup> Ta yehe, da nachindahá Ndióxi nduu ñayivi naquixi i ndinducú u nā xíca nuu cāja cuahá cuachi jáchi cacu ndaa ínimā ná cúní —nacachi Jesús xihín ná ta já naquee a cuahan tucu a íchi chí ñuu Jerusalén.

*Tá nasahan in dataa jiuhún da nuú uxu mozo da  
(Mt. 25:14-30)*

<sup>11</sup> Ta nani xíni johō ñayivi ña cáhan Jesús já nasacu mé á in quiahva nu ná jáchi cáyati chága mé á ñuu Jerusalén cuahan. Ta mé ñayivi ndíco cuahan cán nacahán nā ña tá xinu cōo a ñuu Jerusalén cán chí ivi laá va casahá Ndióxi cacomí a cuéntá sahá ñayivi vatí a juú a já. <sup>12</sup> Anda já nacachi Jesús já xihín ná:

—Nasahiin in dataa, da cúu jahyi in rey. In quiví naquee da cuahan xíca da ña ndicojo da chuun cacuu da rey. Tá nandihí nasacu ini da nuhu da ñuu da. <sup>13</sup> Joo tá camaní nuhu da já nacana da uxu mozo da. Ta nasahan da in in jiuhún nuú in in da cán ta mé jiuhún cán cúu á ña ín ndivaha yahvi. Anda já nacachi da já xihín mozo dá: “Caja ndó ndahví xihín jiuhún yóho janda quiahva ná xinu quiví ndíco cōo tucu u quixi i”, nacachi da xihín mozo da. Já naquee da cuanúhu dá. <sup>14</sup> Ta ndaja coo ñayivi ñundáhyi xíca cándají nā da. Sahá ña cán queá nachindahá nā in

táhn<sub>da</sub> táto ña ná cachi na xih<sub>in</sub> tátá da ña co cúni toho na ña ná cacom<sub>i</sub> da cán cuéntá saha ná. <sup>15</sup> Joo já nandicojo da cán chuun cacuu da rey mé ñundáhyi xicá. Ta tá naxinu coo da cán já nasahnda da chuun ña ná cuhun na cana na mozo da, da nasahan da jiu<sub>hún</sub> nu cán. Jáchi cúni da candaa ini da ndaja jiu<sub>hún</sub> ñañehe in in da cán jatá jiu<sub>hún</sub> da. <sup>16</sup> Tá nandihi já naxinu coo in táhan da ñañehe jiu<sub>hún</sub> cán nu dá já nacachi da já: “Candehé ndó, xitoho i. Nasahan ndó in jiu<sub>hún</sub> nuú i ta viti nanduu a uxu”, nacachi da. <sup>17</sup> Anda já nanducú ñehe da cúu rey cán tuhun nu dá já nacachi da já xih<sub>in</sub> dá: “Vaha ndivaha nacajún xih<sub>in</sub> ña yóho. Náha ña mé a ndaa cúun in mozo vaha jáchi nacaja ndihún tá íin nacachi i xuhún cajún xih<sub>in</sub> jiu<sub>hún</sub> i vatí loho quea nasahan i nuun caja chúun. Ta viti caja i ña ná cacomún cuéntá sahá uxu ñuu”, nacachi rey cán xih<sub>in</sub> dá. <sup>18</sup> Tá nandihi já naxinu coo inga táhan da ñañehe jiu<sub>hún</sub> cán nu dá já nacachi da já: “Candehé ndó, xitoho i. Nasahan ndó in jiu<sub>hún</sub> nuú i ta viti nanduu a uhun”, nacachi mozo cán. <sup>19</sup> Anda já nacachi da cúu rey já xih<sub>in</sub> dá: “Vaha nacajún sahá ña cán quea caja i ña ná cacomún cuéntá sahá uhun ñuu”, nacachi rey cán xih<sub>in</sub> dá. <sup>20</sup> Ta tá nandihi já naxinu coo inga táhan da cán já nacachi da já: “Candehé ndó, xitoho i. Yóho íin mé jiu<sub>hún</sub> nasahan ndó nuú i. Nachicaan vaha i ña nu jáhma i <sup>21</sup> sahá ña yíhvi i ndohó. Jáchi cúu ndó in ta cuehe ndivaha. Ta cátóo ndó ndiquehe man<sub>i</sub> uun ndó ñaha. Ta cátóo ndó ña ná caja chúun inga ñayivi já jandá xinu uun ndó ndiquehe ndó ñaha ñañehe ná jatá chuun cája ndó”, nacachi mozo cán. <sup>22</sup> Anda já nanducú ñehe da cúu rey cán tuhun nu mozo da já nacachi da já xih<sub>in</sub> dá: “Co cúun in mozo vaha nuú i. Xih<sub>in</sub> tuhun cáhun chícáun cuachi jatun jáchi co cúnun caja chúun sahá i. Cáchún ña xini vahún cúu yehe in da cuehe ndivaha ta cátóo i quehe e jiquí jiu<sub>hún</sub> i vatí coó

naçaja chũun i sahá. <sup>23</sup> Sahá ña cán quéa ndá cuéntá quéa coo nasahan tóun jjuhún i, dá já. Já quéa tá ná ndicó coo i já ná ndiquehe e jiquí á nuú na cán, nduu”, naçachi rey cán xihín mozo da. <sup>24</sup> Tá nandihí já naçachi tucu rey xihín java ga ñayivi ndíta cán já: “Candaa ndó jjuhún ndáha dá ta quiahva ndó ña nuú da cómí uxu a jan”, naçachi da cúu rey cán. <sup>25</sup> Anda já naçachi na ndíta cán já xihín rey: “Candehé ndo, xitoho i. Ndá túní quiahva ri nde jjuhún yóho nuú da sa cómí uxu a cáa jáchí sa cuahá va jjuhún cómí da cáa”, naçachi na xihín rey cán. <sup>26</sup> Já naçachi rey cán já: “Mé a ndaa ná çahan i xihín ndo, ña ndá na sa iin ñaha nuu, mé na cán ñehe táhvi ná coo chága ña nu ná. Joo ndá na coo ñaha nuu sahá ña co çaja chũun na já quéa janda ña loho cómí na ndindaa”, naçachi rey cán. <sup>27</sup> Ta naçachi tucu da já: “Cuáhán ndó quehe ndó ñayivi quini, na co cúní yehe, na coo naxeen ña ná cacomí i cuéntá sahá cán já ná quixi na. Ta cahní ndó na ná quivi na nuu táhyí i”, naçachi rey cán —naçachi Jesús ndicani a nuú ñayivi.

### *Ndíhvi Jesús ñuu Jerusalén*

*(Mt. 21:1-11; Mr. 11:1-11; Jn. 12:12-19)*

<sup>28</sup> Tá nandihí naçachi Jesús ña yóho xihín ná já naquehe tucu a íchí xíca çahan chí ñuu Jerusalén. <sup>29</sup> Ta tá sa naxinu coo a jini yucu yitó olivo cán nuú ja chá xinu coo a ñuu Betfagé xihín ñuu Betania cán já nasahnda chuun nuú ivi táhan da xíca tuun xihín á cán. <sup>30</sup> Já naçachi a já xihín dá:

—Cuáhán ndo ñuu loho ndácaan jan. Ta tá ná xinu coo ndó jan ndiñehe ndó in búrrō ndíco ndaa jan, rí a ñaha yii ndaa na. Ndaxí ndó rí ta cañehe ndó rí quixi ndó. <sup>31</sup> Ta ndá na ná ndaca tuhún ndohó ña ndá cuéntá quéa ndaxí ndó rí já cachi ndó já xihín ná: “Mé a cúu xitoho nde xíní ñúhú a rí”, cachi ndó xihín ná —naçachi Jesús xihín da cán.

<sup>32</sup> Já naquee ndíví da cuaḥan da. Ta tá quiahva naçachi Jesús coo chí quiahva já ndusa nasahiin. <sup>33</sup> Jáchi nani ndáxí da búrrō cán ndúu da já naçahan mé na xihín jana rí cán saḥa ri já naçachi na cán já:

—Ndá cuéntá quea ndáxí ndó búrrō jana nde jan —naçachi na cán.

<sup>34</sup> Anda já nanducú ñehe da xíca tuun xihin Jesús cán tuhun nu ná já naçachi da já:

—Ndáxí nde ri jáchi mé a cúú xitoho nde, xíní ñúhú a ri —naçachi da.

<sup>35</sup> Já naquehe da ri ñehe da cuaḥan da nu Jesús. Anda já nachojó ñayivi jáhma ná jata ri já najánda na Jesús jata ri. <sup>36</sup> Ta nani xíca búrrō cán cuaḥan rí xihin Jesús já nachinduu ñayivi jáhma ná íchi nuú yaha rí cán xihin á. <sup>37</sup> Ta yati ñuu Jerusalén, mé nuú ndíca yúcu naní yitó Olivo cán já naçasáhá cáyuhú tóco ndihi na cúú cuéntá mé á cán. Cája cáhnu na Ndióxi xihin ña cájii íní na saḥa tóco ndihi ña náhnu naçini na naçaja Jesús. <sup>38</sup> Já cáhí na já cáyuhú na:

—Ndicáhnu nahá ná cacuu da cómí cuéntá saḥa yo yóho jáchi cúú dá da vaxi yuhú nuu Ndióxi. Viti cájii ini na ndúu indiví. Cáhnu ná cacuu Ndióxi —cáhí na cáyuhú na.

<sup>39</sup> Anda já naçachi java na fariseo ñúhu tañu ñayivi cán já xihin Jesús:

—Maestro, jánani ndó na ndíco jata ndó yóho ná a cáyuhú cóhó na —naçachi na xihin Jesús.

<sup>40</sup> Joo nanducú ñehe Jesús tuhun nu ná já naçachi a já xihin ná:

—Mé a ndaa ná caḥan i xihin ndo ña tá ná catáji yuhú na yóho janda já yuu ndúu jín íchi jan casáhá cayuhú a caja cáhnu a yehe —naçachi Jesús.

<sup>41</sup> Tá *naçayati* *chága* Jesús ñuu Jerusalén cán ta tá *naçini* a ñuu cán já *naçasáhá* *táhvi* ini a *sácu* a *sahá*. <sup>42</sup> Já *naçachi* a *já*:

—Cúni *jánaḥa* i *ndohó* *ndíá* *ndítahan* *caja* *ndó* *já* *ná* *coo* *vaha* *ínima* *ndó* *nu* *Ndióxi*. Joo *có* *cúni* *toho* *ndó* *candaá* ini *ndó* *ña*. Ta *viti* *a* *cúu* *ga* *candaá* ini *ndó* *ña*. <sup>43</sup> *Jáchí* *vaxi* *quivi* *tá* *quixi* *na* *có* *cúni* *ndohó* ta *caji* *nuu* *na* *nu* *ndó* ta *cani* *táhan* *na* *xihín* *ndó*. Ta *ni* *in* *xoo* *a* *cúu* *cunu* *ndó* *jáchí* *ní* *cúu* *caji* *nuu* *na* *cán* *já* *ná* *a* *queé* *ndó*. <sup>44</sup> Ta *jándihi* *na* *saha* *ndó* *jáchí* *cahní* *na* *tócó* *ndihi* *ndó*, *na* *ndúu* *cán*. Ta *ni* *in* *yuu* *a* *cándoo* *jatá* *inga* *yuu* *jáchí* *ña* *cuyu* *cacuu* *ndihi* a. Já *ndoho* *ndó* *jáchí* *có* *candaá* ini *ndó* *ña* *naquixi* i *jácacu* *u* *ndohó* *já* *ná* *a* *ndíhi* *saha* *ndó* —*naçachi* *Jesús*.

*Tá nataxí Jesús na ndúu jícó ñaha yéhe veñuhu*

*(Mt. 21:12-17; Mr. 11:15-19; Jn. 2:13-22)*

<sup>45</sup> Tá *naçinu* *có* Jesús ñuu Jerusalén cán já *nañdihvi* a *veñuhu* *cáhnú* *ndácaan* ñuu cán. Já *naçasáhá* *taxí* *a* *na* *ndúu* *jícó* *cán* *xihín* *na* *ndúu* *xéen* *cán*. <sup>46</sup> *Jáchí* *naçaja* *cuehe* *a* *xihín* *ná* ta *já* *naçachi* a *já*:

—Já *cáchí* *tuhun* *Ndióxi*: “*Vehe* *mí* i *cacuu* a *nuú* *quixi* *na* *caça* *táhvi* *na* *nuú* *i*”, *cáchí* *a*. Joo *ndohó* *nañdai* *cuu* *ndó* *yóho* *cája* *cuíhná* *ndó* *nuú* *ñayivi* —*naçachi* *Jesús*.

<sup>47</sup> *Ndijáá* *ní* *quivi* *sáhan* *Jesús* *veñuhu* *cáhnú* *cán* *jánaḥa* *tuhun* *Ndióxi* *nuú* *ñayivi*. Joo *na* *cúu* *sacuaha* *nuú* *jutu* *xihín* *na* *jánaḥa* *ley* *Moisés* *xihín* *na* *sacuahá* ñuu *ndúcú* *na* *ndá* *quiahva* *caja* *na* *cahní* *na* *Jesús*. <sup>48</sup> Joo *có* *ñéhe* *íní* *na* *ndaja* *caja* *na* *cahní* *na* *Jesús* *jáchí* *tócó* *ndihi* *ñayivi* *cúni* *na* *taa* *joho* *na* *nu* *jánaḥa* *Jesús*.

## 20

*Tá nandaca tuhún na Jesús ña yo sáhan ñamani nu á jánaḥa ñayivi*

*(Mt. 21:23-27; Mr. 11:27-33)*

<sup>1</sup> Ta ndaja coo in quivi ndácaan Jesús veñuhu cáhnu jánaḥa ñayivi ndaja cuu cacu ndaa ínima ná já naxinu na cúu sacuaḥa nuú jutū xihín na jánaḥa ley Moisés ta cátaḥan ri na sacuaḥá veñuhu naxinu coo na xihín ná nu ndácaan Jesús cán. <sup>2</sup> Anda já nacachi na já xihín Jesús:

—Ndá saḥa queá jánaḥún ña yóho. Yo já saḥan ñamani nuun cajún ña cájún yóho —nacachi na cán xihín Jesús.

<sup>3</sup> Anda já nanducú ñehe Jesús tuhun nu ná já nacachi a já xihín ná:

—Ndáca tuhún ri yeḥe va ndohó. Cachi ndó xihín i: <sup>4</sup> Yo já nachindahá Juan ña ná quixi da caja ndúta dá ñayivi. Á Ndióxi nachindahá da, á ñayivi nachindahá ñahá —nacachi Jesús xihín na cán ndáca tuhún a na.

<sup>5</sup> Anda já nacasáḥá ndítuhún xihín táhan na sacuaḥa cán já cáchí na já:

—Ndía cachi yó xihín Jesús yóho. Jáchi tá ná cachí ña Ndióxi queá nachindahá Juan já nducú ñehe Jesús tuhun nu yo já cachi a já xoho: “Ndá cuénta queá coo naxeen ndó candúsa ndó da, dá já”, cachi Jesús xoho. <sup>6</sup> Ta tá ná cachí ñayivi va cúu na nachindahá Juan já ndicuíta ñayivi ta cahní na mí xihín yuu. Jáchi tóco ndihi ñayivi cándaḥa vaha ini na ña Ndióxi queá nachindahá Juan jáyaha da tuhun cáhan mé á nuú ñayivi —nacachi xihín táhan na cán.

<sup>7</sup> Sahá ña cán queá nacachi na xihín Jesús ña co xini toho na yo já nachindahá Juan ña ná quixi da caja ndúta dá ñayivi. <sup>8</sup> Anda já nanducú ñehe Jesús tuhun nu ná já nacachi a já xihín ná:

—Ta ni yeḥe a cáxi tuhun i xihín ndó yo já nasahan ñamani nuú i caja i ña yóho —nacachi Jesús xihín ná.

*Sácú Jesús quihva saḥá java mozo, da nacaja quini xihín xitoho da*

*(Mt. 21:33-44; Mr. 12:1-11)*



<sup>9</sup> Tá nandihí já nacasáhá Jesús cáhan xihín ñayivi ta já nasacu a quiahva yóho nu ná já nacachi a já:

—Nasahiin in dataa ta najándee cuaha dá tó uva. Ta tá nandihí já nasahan ndojó na mé dó uva cán. Anda já naquee da cuahan xicá da cuaha tiempo. <sup>10</sup> Ta tá naxinu coo tiempo jáquee na uva nu dó uva ñaha da cán já nachindahá da in mozo da ña ná cuhun da ndiquehe da uva, rí ndítahan nu dá ndiquehe da. Joo mé na cája chúun tóo ñúhu dá cán natiin na mé mozo cán ta nacani na da ta já cáa uun da nandicó coo da nacaja na. <sup>11</sup> Tá nandihí já nachindahá mé da xihín ñaha ñúhu cán inga tucu mozo da. Joo quiahva já nacaja ri na xihín da cán va. Nacanahá na xihín dá ta nacani na da. Ta já cáa uun da nachindahá tucu na da nuú xitoho da. Coó ñaha nasahan na nu dá. <sup>12</sup> Ta mé da xihín ñaha ñúhu cán nachindahá tucu da inga mozo da ta quiahva já nacaja ri na xihín da cán va. Najándicuehe na da ta já nataxí na da.

<sup>13</sup> Ta tá nu ndihí já nacahan mé da xihín ñaha ñúhu cán já: “Ña caja i viti queá chindahá i jahyi maní i jáchi cája i cuénta coo toní ñúhú na xihín dá tá ná cuni na da”, nacahan mé da xihín ñaha ñúhu cán. Ta tá nandihí já nachindahá da jahyi maní dá. <sup>14</sup> Joo tá naxini na cája chúun tóo ñúhu dá cán ña vaxi jahyi da já nacachi xihín táhan na cán já: “Candehé ndo. Yóho vaxi da cúu jahyi xitoho í. Ta tá ná xinu quiví quivi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo ñúhu yóho ndáha mí”, nacachi xihín táhan na cán. <sup>15</sup> Anda já natavá na da cúu jahyi xitoho cán jata cútu ta cán nasahní na da —nacachi Jesús.

Anda já nandaca tuhún Jesús ñayivi ndúu cán já nacachi a já xihín ná:

—Á co xini ndó ndía caja da xihín ñaha ñúhu viti. <sup>16</sup> Ña caja da queá quixi da ta cahní ndihi da na nacaja chúun

tóo nu ñúhu dá. Já ndiquiahva da ñúhu dá nuú java ga na já ná caja chúun na nu á —ñacachi Jesús.

Tá ñaxini johó na ndíta cán ña yóho já ñacachi ndihi na já:

—A cándeé Ndióxi coo ña jan já —ñacachi na cán.

<sup>17</sup> Joo ñasandehé Jesús nu ná já ñacachi a já:

—Ta viti cachi ndó xihín i ndía cúní cachi tuhun Ndióxi tá cáchí a já:

Mé yuu ña najácana da cávaha vehe, ña cán cúú ña ñanduu yuu ndúhu sahá vehe ña ín chága saha, cáchí tuhun Ndióxi.

<sup>18</sup> Ta yehe cúú u tátuhun in tótó cáhnu. Ta ndá na ná yaha ndicava jatá tótó cán chí chachi ndihi na. Quiahva já ndihi sahá ñayivi tá co cúní na candúsa na yehe. Ta mé tótó cáhnu cán tá ná yaha ndicava jatá in ñayivi chícaji ndihí ñahá a cán. Quiahva já ndihi sahá ñayivi ini indayá tá co cúní na candúsa na yehe —ñacachi Jesús.

*Ndáca tuhún na Jesús á ndítahan nu ná chahvi na jjuhún cuéntá impuesto*

(Mt. 21:45-46; 22:15-22; Mr. 12:12-17)

<sup>19</sup> Chí sa mé hora já cúní na cúú sacuaḥa nuú jutú xihín na jánaḥa ley Moisés cán tiin na Jesús jáchí ñacandaḥa ini na ña saḥa mé va na cán sácú Jesús mé quiahva nuú ñayivi cán. Joo coó ñatiin na Jesús jáchí ñayihví na ñayivi ndúu táa johó nu cáhan Jesús cán. <sup>20</sup> Ña ñacaja na quea ñachindahá na java dataa ña ná cananí da Jesús. Ta ndája da mé dá ña cúú dá ta vaha ndivaha joo co cúú da tá quiahva ndáa da. Ta xihín ña yóho cúní da cayati da nu Jesús ná candeḥé da á yaha yúhu á cahan ndá ñaha ña cuu cuhun da jicó túhún da mé á nuú da cúú gobernador. <sup>21</sup> Sahá ña cán quea ñacayati da nu Jesús ta ñandaca tuhún da mé á já ñacachi da já xihín á:

—Maestro, cándaꝯ ini nde ña cáhan ndó ta jánaḥa ndó ña ndaa. Ta cándaꝯ ini nde ña tá cáhan ndó saḥá in ñaha cája ñayivi cúú á saḥá ña sándeḥé ndó janda ínima ná. Ta cándaꝯ ini nde ña jánaḥa ndó ña ndaa saḥa íchi cuéntá Ndióxi. <sup>22</sup> Saḥá ña cán quéa cúni nde candaꝯ ini nde viti á ndítahan nuú nde chahvi nde jiuḥún cuéntá impuesto nuú da cómi cuéntá saḥa yo ñuu Roma, á cõ ndítahan toho nuú nde caja nde ña —naçachi na cán xihin Jesús.

<sup>23</sup> Joo sa naçandaꝯ va ini Jesús ña cáhvi núu va ini na saḥá ña cán quéa nanducú ñehe a tuḥun nu ná já naçachi a já xihin ná:

—Cándaꝯ cáxi táhyí ini i ña cúni ndó coto ndojó cuití ndó yeḥe. <sup>24</sup> Jánaḥa ndó in táhan jiuḥún jan nuú i. Yo naḥná ta yo quivi quéa ndaa nu á —naçachi a xihin ná.

Já naçachi na já:

—Ñeḥe a quivi xihín naḥná da cómi cuéntá saḥa yo ñuu Roma —naçachi na xihin á.

<sup>25</sup> Anda já naçachi Jesús já xihin ná:

—Ndiquiaḥva ndó ñaha da cómi cuéntá saḥa ndó ñuu Roma jan nu dá. Ta ndiquiaḥva ndó nu Ndióxi ña cúú ñaha mé á nu á —naçachi Jesús xihin ná.

<sup>26</sup> Chí cõõ naçuu caja na jándahvi na Jesús nuú ñayivi ndúu cán jáchi víi nanducú ñehe ndihi Jesús tuḥun nu ná. Ta chí johó cátóntó ndihi ñayivi xihín quiaḥva nanducú ñehe Jesús tuḥun nu ná. Chí naçatáji na cán.

*Ndáca tuḥún na saduceo Jesús á mé a ndaa nditacu tucu ndii*

*(Mt. 22:23-33; Mr. 12:18-27)*

<sup>27</sup> Tá nandihí já naçee java na saduceo cuahan na çahan na xihín Jesús. Ta mé na saduceo cõ cándúsa na ña ndítacu tucu na sa naxihi. Tá nasaa na nu íin Jesús já naçachi na já xihin á:

<sup>28</sup> —Maestro, nu ley nacahyi Moisés sanahá natandaha chuun ta cáhí a já: “Tá tándaha in dataa xihin ñájíhí da ta tá coó jahyi ñá cacu xihin dá ta tá ná xinu quivi quivi da já queá cáhí ley Moisés ña ndítahan tandaha tucu ñájíhí da xihín da cúú ñani mé ndii cán já ná coo jahyi da cán xihin yuhú nuú ñani da”, já cáhí ley Moisés. <sup>29</sup> Ta viti cuni johó ndó ná cacu nde in quiahva nu ndo. Nasahiin usa ñani. Ta da nu cuítí cán natandaha dá. Joo nayaha tiempo naxihí da ta coó toho jahyi da nacacu xihin ñájíhí da. <sup>30</sup> Anda já natandaha tucu ñá cuáan cán xihín ñani chí ivi mé ndii cán. Joo naxinu quivi naxihí ri da yóho va ta chí coó jahyi da nacacu xihin ñá cán. <sup>31</sup> Anda já natandahá da chí uní cán xihin ña. Joo ni da cán ni java ga ñani da coó nacuu cacu jahyi xihin ña. Ndíhusa da natandaha xihin ña ta ndíhusa da naxihí. Joo ni in da coó nacacu jahyi xihin ña. <sup>32</sup> Tá nu ndíhí já naxihí ri mé va ñá. <sup>33</sup> Ña cúni nde candaa ini nde queá, ndá da cacuu ndusa yí ñá cán tá ná xinu quivi nditacu tucu ndii. Jáchi ndíhusa va ñani da cán natandahá xihin ña —nacachi na cán ndáca tuhún na Jesús.

<sup>34</sup> Anda já nanducú ñehe Jesús tuhun nu ná já nacachi a já:

—Nani ndúu ñayivi ñuyívi yóho cuití va tándaha ná. <sup>35</sup> Jáchi ndá na nanditacu tucu ta ñañehe táhvi ná coo na indivi já queá co tándaha na ta ni co sáhan toho na jahyi jíhí na tandaha ná. <sup>36</sup> Jáchi mé cán cacuu na tátuhun táto Ndióxi já a quivi ga na. Ta cacuu na jahyi Ndióxi jáchi sa nanditacu na tañu ndii. <sup>37</sup> Ta sa xini yo ña nditacu tucu ndii jáchi já nacachi Moisés sanahá tá nacahí da sahá ña naxini da tañu tohíñú, dó cándaha ñúhu cáyi cán. Tá nacahan da sahá Ndióxi, nacachi da ña janda viti cája cáhnu Abraham xihín Isaac xihín Jacob mé Ndióxi vatí naxihí na sanahá. <sup>38</sup> Ta ña yóho cúni cachi a ña tácu yii

va Abraham xihín Isaac xihín Jacob vatí sa naxihi yiquí cuñu na. Jáchí tóco ndihi na cúu cuéntá Ndióxi, tácu na nu mé á —nacíhi Jesús xihín ná.

<sup>39</sup> Anda já nacachi java na jánaḥa ley Moisés cán já xihín á:

—Vaha va nacahan ndó, Maestro.

<sup>40</sup> Ta chí coḥ nasahan ndeé ga ini na ndaca tuhún chága na mé á.

*Jánaḥa Jesús nuú ñayivi ña cúu Cristo ta ta cúu á Ndióxi  
(Mt. 22:41-46; Mr. 12:35-37)*

<sup>41</sup> Anda já nacachi Jesús já xihín ñayivi ndúu cán:

—Ndávaḥa cáchí ñayivi ña vaxi Cristo chichi David.

<sup>42</sup> Ta ndáa ini Salmos ña nacahyí David já nacachi da já: Ndióxi queá nacachi já xihín xitoho i:

“Coo xoo cuáha i yóho,

<sup>43</sup> janda quiahva ná caja i ña ná cacomún cuéntá sahá na co cúní yohó”, nacachi Ndióxi, já nacahyí David sanahá.

<sup>44</sup> Ndávaḥa cáchí na ña vaxi Cristo chichi David joo mé tiempo cán nacachi David ña cúu á xitoho da —nacachi Jesús.

*Cahan Jesús sahá cuachi na jánaḥa ley Moisés  
(Mt. 23:1-36; Mr. 12:38-40; Lc. 11:37-54)*

<sup>45</sup> Tóco ndihi ñayivi ndúu cán naxini johó na tá nacasáhá Jesús cáchí a xihín na xica tuun xihín á já:

<sup>46</sup> —Cuéntá coo ndó xihín na jánaḥa ley Moisés jáchí cátoó na cándixi na jahmá nání caca nuu na. Ta cátoó na caḥan toní ñúhú ndivaḥa ñayivi xihín ná tá xica nuu na nuú yahvi. Ta tá cuahan na veñuhu cátoó na cacoo na nu sácoo na iin chága saḥa. Ta tá cuahan na víco cátoó na coo vaha na. <sup>47</sup> Ta cándaa na vehe najihí cuáan. Ta tá nandihí cáni ndivaḥa cája na xica tahví na nu Ndióxi jáchí cúní na jájahvi na nuú ña núu cája na. Mé a ndaa ná

cahan i xihin ndo ña na jánaha ley Moisés yóho cacuu na na ndoho chága ini caja Ndióxi nu ndíhí —ñacachi Jesús.

## 21

*Ña najoco in ña cuáan ndáhví*

*(Mr. 12:41-44)*

<sup>1</sup> Ta ndaja coo ndácaan Jesús ini veñuhu cáhnu cán ta sándehe a ndá quiahva táán na cuicá jiuhún ini sató nu jóco ñayivi jiuhún nu Ndióxi. <sup>2</sup> Ta jári ñaxini a ñaxinu coo in ña cuáan ndáhví ta ñataán ña ivi jiuhún ña núu yahvi ini mé sató cán. <sup>3</sup> Anda já ñacachi Jesús já xihin na xíca tuun xihin á cán:

—Mé a ndaa ná cahan i xihin ndo ña cuaha chága jiuhún nasahan ña cuáan ndáhví yóho a juú ga tóco ndihi java ga na cán. <sup>4</sup> Jáchi tóco ndihi na java cán sahan na ña yójó nu va na. Joo ña cuáan ndáhví yóho nasahan ña nu Ndióxi tóco ndihi ña cómi ña catacu ña —ñacachi Jesús.

*Cáxi tuhun Jesús ña vaxi quivi ndihi sahá veñuhu cáhnu ndácaan Jerusalén cán*

*(Mt. 24:1-2; Mr. 13:1-2)*

<sup>5</sup> Java ñayivi cán ndítuhún na sahá veñuhu cáhnu ñuu Jerusalén ndíta na. Ta ndítuhún na sahá yuu ndató ndivaha ñacavaha veñuhu cán. Ta cahan na sahá ñaha najoco ñayivi nu Ndióxi ndaa cán. Anda já ñacachi Jesús já xihin ná:

<sup>6</sup> —Vaxi quivi ndihi saha tóco ndihi ña ndíta ndó sándehe ndo yóho. Ta ni janda in yuu a cándo jatá inga yuu ña nditani cacuu tóco ndihi ña yóho —ñacachi Jesús xihin ná.

*Ña coo tá ná cayati quivi ndihi saha ñuyivi*

*(Mt. 24:3-28; Mr. 13:3-23)*

<sup>7</sup> Anda já nandaca tuhún na Jesús já nacachi na já xihin á:

—Maestro, ndá ama coo tóco ndihi ña yóho. Ta ndaja coo tá sa nacayati mé quivi cán —nacachi na xihin Jesús.

<sup>8</sup> Anda já nacachi Jesús já:

—Cuéntá coo ndó ta a quiáhva ndó ñamani jándahvi ñayivi ndohó. Jáchi quixi cuahá ndivaha na cuéntá mí i ta cahan na ña tuhún tá cachi na já xihin ndo: “Yehe cúu Cristo, da nachindahá Ndióxi cacomí a cuéntá sahá ñayivi.” Ta cachi na já: “Viti naxinu coo tiempo ndihi sahá ñuyíví”, cachi na xihin ndo. Joo coto a cándusa ndó candico ndó jatá ná cahun ndo. <sup>9</sup> Tá ná cuni johó ndó ña cáni táhan ñayivi ñuyíví yóho, a cáyihví toho ndó. Jáchi ndúsa já ndítahan coo. Joo cámaní yí va jáxinu coo quivi ndihi sahá ñuyíví —nacachi Jesús xihin ná.

<sup>10</sup> Anda já nacahan chága Jesús xihin ná já nacachi a já:

—Ñayivi ndúu in nación ndicuita na caní táhan na xihin na ndúu inga nación ta caní táhan na in ñuu xihin na inga ñuu. <sup>11</sup> Ta quixi cuahá ña taan tá sa nacayati quivi ndihi sahá ñuyíví. Ta quixi tama ndeé. Ta quixi cuehe nuú ñayivi ndúu cuahá ñuu. Ta chí catóntó ndivaha ñayivi cuni na ñaha náhnu chí indiví. Ta yíhví ndivaha na tá cuni na java ñaha xituhún ndivaha.

<sup>12</sup> Joo tá cámaní xinu coo quivi coo tóco ndihi ña yóho já ndicuita ñayivi caja xíxi na xihin ndó, na cándusa yehe. Ta cañehe na ndohó cahun ndó ini veñuhu na ta cán caja víi na sahá ndo sahá ña cándeé ini ndó yehe. Ta taan na ndohó ini vecaa ta já cañehe na ndohó cahun ndó cavíi sahá ndó nuú na cúu jutixia xihin nuú na cómi cuéntá sahá ñayivi. Tóco ndihi ña yóho ndoho ndó sahá ña cándeé ini ndó yehe. <sup>13</sup> Ta xihin ña yóho cuu ñehe íni ndo cahan ndó sahá i nuú na cán. <sup>14</sup> Ta a ndícani ini ndó sahá ndá tuhun cahan ndó sahá mé ndó nuú na cán tá ná xinu ndó

nu ná. <sup>15</sup> Jáchí mí i quiahva i tũhun nu ndo ta ndaja ndíchí i jini ndo já ná cuu nducú ñehe vaha ndó tũhun nuú na cán. Ta chí a cuú quee vaha yuhú na cán xihín ndo. <sup>16</sup> Joo cuahá ñayivi jicó túhún na ndohó. Ta chí janda tátá ndo á ñani ndó á táhan ndó á na xíní táhan xihín ndo, na cán cacuu na jicó túhún ndohó cuahá tañu. Ta java táhan ndó, na cándeé ini yehe quivi ndó caja na. <sup>17</sup> Ta ndijáá ñayivi ñuyíví candají na ndohó sahá ña cándeé ini ndó yehe. <sup>18</sup> Joo ni in ñaha a ndóho ndó anda ni in ijí jini ndó a ndíhi saha. <sup>19</sup> Ta tá coo nacuitá ndo xihín tóco ndíhi ña núu caja na xihín ndo já xinu ndó canduu ndó indiví anda ama cáa quivi.

<sup>20</sup> Tá ná cuni ndó ña nacava tiyivi soldado jatá ñuu Jerusalén ndúu da, xíní ñúhú candaá ini ndó ña sa naxinu quivi ndíhi sahá ñuu cán. <sup>21</sup> Ña ndítahan caja ndó mé quivi cán quea cunu ndó cuhun ndó chí yucu tá ndúu ndó chí estado Judea. Ta ndá ndó, na ndúu ñuu Jerusalén xíní ñúhú jándacoo ndó ñuu jan ta cunu ndó cuhun ndo. Ta ndá ndó, na ndúu yucu, a ndícó coo ga ndó ndíhvi ndó ñuu Jerusalén yóho. <sup>22</sup> Jáchí mé quivi já cacuu a quivi ndoho ini ñayivi já ná xinu coo tóco ndíhi nuú ña nacachi tũhun Ndióxi coo sanahá ndivaha. <sup>23</sup> Ndáhvi nacuu najihí tá ñúhu jahyi na mé quivi já. Ta ndáhvi nacuu na tá ñehe ndaa na na valí táhan ña chíchí yíi. Jáchí ndoho ndivaha ini ñayivi ndúu ñuyíví mé quivi já sahá ña xójo ndivaha ini Ndióxi xihín na cán. <sup>24</sup> Java ñayivi quivi na caja soldado ta java na cató ná já cañehe na na cuhun na ndijáá chí ñuu tóho canduu na jáchí ndíhi sahá ñuu Jerusalén yóho. Ta já quixi na ñuu tóho ta casahá na cahnda na chuun nuú ñuu Jerusalén yóho janda quiahva ná xinu coo quivi cacu ini Ndióxi ña ná quee na tóho cán cuhun na.

<sup>25</sup> Anda já cuni ndó ña náhnu ndivaha chí nuú candii xihín nuú yoo xihín nuú quimi viti. Ta ñayivi ñuyíví yóho



yihví ndivaha na ta chí a cándaꝯ ini na ndíꝯ caja na jáchi quini ndivaha taꝯ nuú ndicojo tañuhú. <sup>26</sup> Ta chí janda quivi tóo ñayivi xihín ña yihví na jáchi casáhá ndicani ndivaha ini na saha tóco ndihi tondóhó vaxi ñuyíví yóho. Jáchi janda mé candii xihín yoo xihín quimi ndiquiji nuu a. <sup>27</sup> Anda já cuni ndó yehe, da nachindahá Ndióxi nduu ñayivi, quixi i tañu vico xihin tóco ndihi ndée cáhnu i ta chí ndiyihvi ndaa mé nuú quixi i. <sup>28</sup> Tá ná casáhá yaha tóco ndihi ña cáhí i xihin ndo yóho, xíní ñúhú ndindeé ini ndó ta ndiñehe ndó nuu ndó jáchi sa nacayati quiví jácaꝯ Ndióxi ndohó cuhun ndó coo ndó indiví —nacachi Jesús xihin ná.

*Sácú Jesús quiahva sahá titó ñuhú*

*(Mt. 24:32-35; Mr. 13:28-31)*

<sup>29</sup> Anda já nasacu a in quiahva nu ná já nacachi a já:

—Xíní ñúhú candehé ndo ndá quiahva cája chúun in titó ñuhú, á ndá yito nacuu. <sup>30</sup> Tá ná cuni ndó ña jandá joho cana núma do já cándaꝯ ini ndó ña nacayati tiempo javi. <sup>31</sup> Ta quiahva já tá ná cuni ndó ña sa cúu yáha tóco ndihi ña cáhí i xihin ndo yóho já candaꝯ ini ndó ña sa nacayati quiví casáhá Ndióxi cacomí a cuéntá sahá ñayivi.

<sup>32</sup> Mé a ndaa ná cahan i xihin ndo ña cuni ñayivi ndúu mé tiempo já yaha tóco ndihi ña nacachi i xihin ndo já quivi na. <sup>33</sup> Mé a ndaa ña cúu indiví xihin ñundáhyi yóho ndihi sahá joo tuhun nacahan yehe xihin ndo a ndíhi toho sahá jáchi coo tá coo tá íin nacachi i xihin ndó coo.

<sup>34</sup> Cuéntá coo ndó. Xíní ñúhú candati tiahva ndó quiví quixi i ndiquehe e ndohó. A cáca nuu ndó yóho cáa ña caja ndó ña cúní yiquí cuñu ndó. A cóho ndó caca nuu ndó. Ta a ndíhi nahá ini ndó ndicani ini ndó sahá ñaha ñuyíví yóho. <sup>35</sup> Tá ná xinu quiví quixi i cacuu a tátuhun tá sácú jehé in dataꝯ in trampa nuu in quítí sahá ña cúní da tiin da ri. Mé quítí cán co xíní rí ndáchí íin jehé trampa

tiin ñahá cán. Quiahva já cō xíní ñayivi ndúu ñuyíví ndá quíví quixi tucu u ñuyíví yóho. <sup>36</sup> Xíní ñúhú canduu tiahva ndó quíví quixi i. Níi tiempo xíní ñúhú caca tahví ndo nu Ndióxi já ná ndindeé ini ndó tá ná quixi tóco ndihi ña yóho nu ndo ta já ná cuu xinu cōo vaha ndó indiví já ná cuu coo víi ndo nuú yehe, da nachindahá Ndióxi nduu ñayivi — nacachi Jesús jánaḥa nuú ñayivi cán.

<sup>37</sup> Nini quívi nasahijn Jesús ini veñuhu cáhnu jánaḥa tūhun Ndióxi nuú na cán. Ta tá ñuú já sáhan quíji a yúcu yitó Olivo cán. <sup>38</sup> Ndijáá ní quívi naha chá naxinu cōo ñayivi veñuhu cáhnu cán jáchi cúní na cuni jōho na ña jánaḥa Jesús nu ná.

## 22

### *Jándique táhan na tūhun na ña cahní na Jesús*

*(Mt. 26:1-5, 14-16; Mr. 14:1-2, 10-11; Jn. 11:45-53)*

<sup>1</sup> Ta yati tandaa víco pascua tá xíxi ñayivi pan ña cō queé yusá naxiaa xihín. <sup>2</sup> Já nacasáhá na sacuaḥa nuú jutū xihín na jánaḥa ley Moisés ndúcú na ndaja caja na cahní na Jesús. A cuú caja na cahní tívi na ña jáchi yíhví na canahá ñayivi xihín ná.

<sup>3</sup> Joo ndaja coo tiñáhá sacuaḥa nandeta nuu rí ínima in táhan uxu ivi da xíca tuun xihín Jesús. Mé da cán naní da Judas ta Judas Iscariote cáhan na xihín dá. <sup>4</sup> Ta nasahan Judas cahan da xihín na sacuaḥa nuú jutū ta xihín na sacuaḥa nu policia ndáa veñuhu. Ta nanditúhún da xihín ná ña cuu caja da jicó túhún da Jesús ta ndiquiahva ñahá dá mé á nu ná. <sup>5</sup> Xihín ña yóho nacajii íní na cán ta nasahan na tūhun na nu Judas ña quiahva na jihún nu dá. <sup>6</sup> Ta nacandúsa Judas caja da ña chí nacasáhá da ndúcú da ndaja caja da ndiquiahva da Jesús nuú na cán tá cōo ñayivi ndúu xihín á.

*Xijíni Jesús vicó pascua xihín na xíca tuun xihín á*  
(Mt. 26:17-29; Mr. 14:12-25; Jn. 13:21-30; 1 Co 11:23-26)

<sup>7</sup> Natandaa mé víco tá xíxi na pan ña co quée yusá naxiãa xihín. Mé víco yóho nasacaja na ña tá nu cuía ta sáhní na ndicachi válí jóco na nu Ndióxi. <sup>8</sup> Mé quivi já nasahnda Jesús chuun nu Pedro xihín nu Juan já nacachi a já xihín dá:

—Cuáhán ndó cajú ndíví ndo ña cajíní vicó pascua — nacachi a xihín dá.

<sup>9</sup> Anda já nacachi da cán já xihín á:

—Yo vehe cúní ndó cuhun nde ná cajú ndíví nde ña cuxú.

<sup>10</sup> Anda já nanducú ñehe Jesús tuhun nu dá já nacachi a já:

—Tá ná quihvi ndó ñuu Jerusalén jan já cuni ndó in dataa ta ndójo da in yoo ticuúi cuahan da. Candico ndó jata dá cuhun ndo janda quiahva cuni ndó ndá vehe quihvi da. <sup>11</sup> Ta já cuhun ndó cahan ndó xihín mé da xihín ñaha vehe cán já cachi ndó já xihín dá: “Da jánaħa ndeħe cúu da cáchí xuhun: Ndáchí íin nuú coo í cajíní í vicó pascua xihín na xíca tuun xihín í.” <sup>12</sup> Anda já jánaħa mé da cán in cuarto cáhnu ña cánúu jini véhe piso ninu. Sa íin tiaħva va ña. Cán cajú ndíví ndó ña cajíní —nacachi Jesús.

<sup>13</sup> Anda já naquee ndíví da cán cuahan da. Ta tá íin nacachi Jesús xihín dá coo quiahva já ndusa nasahin. Ta chí nacaja ndíví da tóco ndíhi ña cajíní na vicó pascua.

<sup>14</sup> Tá naxinu coo hora cajíní na já nasacoo Jesús xihín tóco ndíhi na xíca tuun xihín á nu mesa. <sup>15</sup> Anda já nacachi Jesús já xihín ná:

—Sa xíca ndivaha ini í cajíní í vicó pascua yóho xihín ndó nani íin tóo í xihín ndo jáchí vaxi quiví quivi í. <sup>16</sup> Jáchí mé a ndaa ná cahan í xihín ndo janda ná xinu quivi cacomí

Ndióxi cuéntá sahá ñayivi anda jávı cajını tucu u vicó pascua xihın ndo —nacachi Jesús xihın ná.

<sup>17</sup> Anda já natiin a in vaso nu ñúhu tó uva ta nandiquiahva ndixahvi nu Ndióxi. Ta já nacachi a já xihın na xıca tuun xihın á:

—Coho ndó dó ñúhu ini vaso yóho ta cahnda java ndó dó nu táhan ndó. <sup>18</sup> Jáchi a ndícó coo ga i coho i tó uva janda quiahva ná xinu coo quivi cacomı Ndióxi cuéntá sahá ñayivi —nacachi Jesús xihın ná.

<sup>19</sup> Tá nandihi natiin a pan ta nandiquiahva ndixahvi nu Ndióxi sahá. Anda já nasahnda java ña já nasahan ña nuú na xıca tuun xihın á cán já nacachi a já xihın ná:

—Mé pan yóho cúú á tátuhun yiquı cuñu i jáchi ndiquiahva i mí i quivi i sahá ndihi ndó. Xını ñúhú cajanó ña yóho ña ná ndicuhun ini ndó ña naxihı i saha ndo —nacachi Jesús xihın ná.

<sup>20</sup> Tá sa nandihi naxijını na ta já natiin a vaso nu ñúhu tó uva ta já nacachi a já:

—Dó ñúhu ini vaso yóho cúú dó tátuhun niı i jáchi cahni na yehe ta cuıta niı i saha ndihi ndó. Ta xihın ña yóho xinu coo nuú tuhun nasahan Ndióxi nuú ñayivi sanahá tá nacachi a jácacu a ñayivi.

<sup>21</sup> 'Cuni johu vaha ndó ná cahın i xihın ndo. Nu mesa yóho in coo da jıcó túhın yehe. <sup>22</sup> Jáchi janda sanahá nasacu ini Ndióxi ña ndítahan ndoho ini yehe, da nachindahá mé á nduu ñayivi. Joo ndáhvı nacuu da jıcó túhın yehe —nacachi Jesús.

<sup>23</sup> Xihın ña nacachi Jesús yóho nacasáhá na xıca tuun xihın á cán ndáca túhın táhan na saha ndá da cúú da sácú ini cuhun jıcó túhın ñahá.

*Ndítuhún ihvi xihın táhan na xıca tuun xihın Jesús*

<sup>24</sup> Tá nandihi já nacasáhá ndítuhún ihvi xihın táhan da xıca tuun xihın Jesús cán sahá ndá da cúú da in chága

sahá. <sup>25</sup> Sahá ña cán queá ñacachi Jesús já xihín ndihi da cán:

—Ndijáá ñuyívi sáhndá rey chuun nuú ñayivi tá quiahva cúni mé dá. Ta jári cúni da ña ná cachi ñayivi saha dá ña cúu dá da cája vaha. <sup>26</sup> Joo coó nditahan coo ña cán tañu mé ndó. Ña nditahan caja ndó queá tá in ndó cúni ndó cacuu ndó da íin chága saha, xíní ñúhú jánuu ndáha ndó mé ndó tátuhun da loho chága nu ndíhi ndó. Ta ndá da cúni cahnda chuun, xíní ñúhú cacuu da tátuhun in da cája ndívi nu mesa xitoho da. <sup>27</sup> Mé ndó sa cánda vaha ini ndó ña íin chága sahá da íin coo nu mesa a juú ga da cája ndívi ñahá. Joo yehe najánuu ndáha i mí i ta nanduu u tátuhun in da cája ndívi nu ndo.

<sup>28</sup> Ndóhó cúu ndó na nasanduu tuun xihín i nu tóco ndihi ña ihvi naquixi nuú i. <sup>29</sup> Sahá ña cán queá tá quiahva ñacaja tátá i ñamani xihín i ña ná cacomí i cuéntá sahá ñayivi quiahva já caja i ñamani xihín ndó <sup>30</sup> ña ná nditútu ndó canduu ndó xihín i tá ná cacomí i cuéntá sahá ñayivi. Ta já ná cuu caja vií ndo sahá na naquixi ndíhuxu ivi táhndá na naquixi chichi Israel —ñacachi Jesús xihín ná.

*Cáxi tuhun Jesús ña chijehé tuhun Pedro ña xini da mé á  
(Mt. 26:31-35; Mr. 14:27-31; Jn. 13:36-38)*

<sup>31</sup> Andá já nandicahan Jesús já ñacachi a já xihín Pedro:

—Simón, cuni johó vahún. Jáchi naxica Satanás, mé tiñáhá sacuahá ñamani ña ná coto ndojó rí tóco ndihi ndó tá quiahva jáxixi na trigo. <sup>32</sup> Joo sa naxica tahví i nu Ndióxi saha yóhó, Simón já ná a jándacoún ña cándéé inún yehe. Ta tá sa nandicó coo inún xihín ña cajún jan, nditahan chindeún java ga na cándéé ini yehe já ná coo ndacú na íchi cuéntá mí i —ñacachi Jesús xihín dá.

<sup>33</sup> Andá já nanducú ñehe Pedro tuhun nu Jesús já ñacachi da já xihín á:

—Candehé ndo, xitoho i. Yehe sa íin tiahva i cuhun i vecaa xihin ndo. Ta janda ná cahní na yehe xihin ndo tá cúní na jáchi sa íin tiahva vi —nacachi da xihin Jesús.

<sup>34</sup> Já nacachi Jesús já xihin dá:

—Candehé Pedro ná cahan i ña ndaa xuhun. Mé quivi viti tá camani cana chéle já uni tañu chijehé tuhún sahá i ta cahún ña co xini tohún yehe —nacachi Jesús xihin dá.

*Cáxi tuhun Jesús ña sa cáyati hora ndoho ini a*

<sup>35</sup> Tá nandihí já nandaca tuhún Jesús na xica tuun xihin á cán já nacachi a já xihin ná:

—Jihna nachindahá i ndohó cuhun ndó cahan ndó tuhun Ndióxi ta nacachi i xihin ndo ña ná a cáñehe ndó yátí ni jihún ta ni inga ndusa a cáñehe ndó cuhun xihin ndo. Á nandimaní ñaha nu ndo tá nasahan ndo já —nacachi Jesús xihin ná.

Já nacachi na já:

—Ni in ñaha coó nandimani nuú nde —nacachi na.

<sup>36</sup> Anda já nacachi tucu a já xihin ná:

—Joo viti coó ga ña cán coo. Viti cáhí i xihin ndo ña tá íin yátí nu ndo, xini ñúhú cañehe ndó ña cuhun ndo. Cañehe ndó jihún ndo tá ná quee ndó cuhun ndo. Ta tá coó machiti nu ndó, xini ñúhú jicó ndó jahmá ndeé ndo já cueen ndó machiti ña ná coo tiahva ndó. <sup>37</sup> Jáchi sanahá nacahyi a nu libro yii Ndióxi ta sahá yehe nacahan tá nacachi a já: “Nacachi ñayivi cúú dá taa quini sahá ña cán quea nachitáhan na da xihin ñayivi quini.” Tóco ndihí ña nacahyi nuú tuhun Ndióxi sahá yehe sanahá xini ñúhú xinu coo a viti —nacachi Jesús.

<sup>38</sup> Anda já nacachi na xica tuun xihin á cán já:

—Candehé ndo, xitoho nde. Yóho ñéhe nde ivi machiti —nacachi na.

—Sa íin vaha —nacachi Jesús xihin ná.

*Cuah̄an Jesús Getsemaní cacā tahví a nū Ndióxi*

(Mt. 26:36-46; Mr. 14:32-42)

<sup>39</sup> Tá nandihí já naq̄ee Jesús cuah̄an yúcu yító Olivo nū sá sahan̄ tuun a cacā tahví a nū Ndióxi. Ta já ndíco ndihí na xíca tuun xih̄in á cán jatá cuah̄an na. <sup>40</sup> Ta tá sā naxinū c̄oo na cán já nac̄achi a já xih̄in ná:

—Cacā tahví ndó nū Ndióxi já ná a ndícava ndó nuú cuachi tá ná coto ndojó tiñáhá ndohó —nac̄achi Jesús xih̄in ná.

<sup>41</sup> Tá nandihí já natavá xóo Jesús mé á tañu na cán já nasah̄an tátuhun in quiah̄va nū xinū c̄oo in yuu tá jání yó ña xih̄in ndáhā yo. Quiah̄va já nac̄axíca mé á tañu na cán já nac̄axítí a xíca tahví a nū Ndióxi. <sup>42</sup> Já nac̄achi a já:

—Tátá Ndióxi, á cuu caja ndó ñamaní já ná a ndóho i ña ih̄vi ndivahā ña vaxi nuú i ndoho i. Joo ná coo tá ín cúní mé ndó ná a cóo toho ña cúní yehe —cáchi Jesús xíca tahví a.

<sup>43</sup> Andā já nac̄anáhā in tátó Ndióxi indiví já naxinū a sáhan̄ tuhun ndeé ini Jesús. <sup>44</sup> Ta nac̄asáhá ndóho ndivahā ini Jesús jáchi nac̄acuéhā ini a. Sah̄á ña cán queá nanducú ndeé chága ví a xíca tahví a nū Ndióxi. Ta chí ndícaa mé teen̄ a nū ñúhu ta dó cán cúu dó tátuhun nií cúyu nū ñúhu.

<sup>45</sup> Ta tá nandihí naxíca tahví a nū Ndióxi já nandacā ndichi a já naq̄ee a cuah̄an nū ndúu na xíca tuun xih̄in á cán. Ta nanditahan mé á na ndúu na quíji na. A juú quiah̄va cándíi ini na sahá ña cán nanaá ini na naquíji na.

<sup>46</sup> Andā já nac̄achi a já xih̄in ná:

—Ndá cuéntá queá quíji ndo ndúu ndó. Cuah̄an ndac̄oo ndó ta cacā tahví ndó nū Ndióxi já ná a ndícava ndó nuú cuachi tá ná coto ndojó tiñáhá ndohó —nac̄achi Jesús xih̄in ná.

*Tá natiin na Jesús*

(Mt. 26:47-56; Mr. 14:43-50; Jn. 18:2-11)

<sup>47</sup> Jandá cáhan chá va Jesús xihín na xíca tuun xihín á cán cándichi a já naxinu cuahá ndivaha ñayivi nu in a. Ta in táhan da uxu ivi xíca tuun xihín á, da naní Judas cán, da cán cúu da ndáca ñayivi vaxi da. Ta nacayati da tatí yúhu dá sajóho Jesús. <sup>48</sup> Anda já nacachi Jesús já xihín dá:

—Judas, tatí yúhun sajóho i tátuhun da quíhvi ini yehe. Joo xihín ña cájún jan ndíquiahvún yehe ndahá na co cúní yehe, da nachindahá Ndióxi nduu ñayivi —nacachi Jesús.

<sup>49</sup> Tá naxini tóco ndihi na ndúu xihín Jesús cán ña cúu já nacasáhá ndáca tuhún na mé á já nacachi na já:

—Á cúní ndó, xitoho nde ña ná ndicuíta nde xihín machiti cani táhan nde xihín ná —nacachi na.

<sup>50</sup> Joo in táhan da xíca tuun xihín Jesús cán najándicuehe da in da cúu mozo da sacuahá nuú jutu cán jáchi nachitúhun dá johó xoo cuáha da. <sup>51</sup> Joo já nacachi Jesús já xihín ná:

—Sa in vaha. A cáni táhan ndó xihín ná —nacachi Jesús.

Tá nandíhi já nacani ndaa ndáha mé á johó mozo cán já nandaja vaha mé á da. <sup>52</sup> Ta nacasáhá cáhan Jesús xihín na sacuahá nuú jutu cán xihín na sacuahá nu policia ndáa veñuhu xihín na sacuahá veñuhu cán, mé na nacasaá tiin na Jesús já nacachi a já xihín ná:

—Cája ndó xihín i tátuhun cája na xihín ta cuíhná jáchi naqueta ndó vaxi ndó tiin ndó yehe xihín machiti ta xihín yíto. <sup>53</sup> Joo coó a ná caja toho ndó xihín i tá nasahin i tañu ndó veñuhu cán. Joo núná nu ndó viti caja núu ndó jáchi nasahan Ndióxi ñamaní ña ná tiin ndó yehe. Jáchi nacuaá viti ta chíndeé tiñáhá sacuahá ndohó caja ndó ña núu —nacachi Jesús xihín na cán.

*Tá nachijehé tuhun Pedro ña xini da Jesús*

*(Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

<sup>54</sup> Anda já natiin na Jesús. Já ñéhe na a cuahán na vehe da cúu sacuahá nuú jutu cán. Ta xíca xíca ndíco Pedro jata



na cuahān da. <sup>55</sup> Ta tá naxinu coo ñayivi cán yuhú yéhé da cúu sacuahā nuú jutū cán já nandicahmi na núhu nasacoo na xítúni na. Já naxinu coo ri Pedro nasacoo da tañu na cán xítúni da. <sup>56</sup> Joo ndaja coo in ñáñáha cája chúun vehe jutū sacuahā cán naxini ñá íin coo da xítúni da yávi núhu cán. Ta nacasáhá sándehe ñá nu dá já cáchi ñá já:

—Da xíca tuun xihin Jesús cúu ri da íin coo yóho va —nacachi ñá cán.

<sup>57</sup> Joo nacasáhá Pedro chíjehé tūhun da já nacachi da já:

—Candehé, ñáñáha. Co xini toho i ndá da cúu da jan —nacachi Pedro xihin ñá cán.

<sup>58</sup> Chá va ta naxini inga dataa Pedro ta já nacachi da já xihin dá:

—In táhan da xíca tuun xihin Jesús cáa cúu ri yóhó va —nacachi da cán xihin Pedro.

Anda já nacachi Pedro já:

—Uhun. A juú toho táhan na cán cúu yehe —nacachi da.

<sup>59</sup> Ta tá sa nayaha tátūhun in hora já nacachi inga dataa já:

—Mé a ndaa da xíca tuun xihin Jesús cúu ri da yóho va jáchi cúu dá da estado Galilea.

<sup>60</sup> Anda já nacachi Pedro já xihin dá:

—Co xini toho i ndá saha cáhun —nacachi Pedro.

Tá chí mé hora já nani cáhan Pedro xihin dataa cán já nacana chéle. <sup>61</sup> Anda já nandicoto nihni Jesús nasandehé a nu Pedro. Tá nandicuhun ini Pedro sahá tūhun nacachi Jesús xihin dá tá cámaní tiin na a tá nacachi a já: “Mé quivi viti tá cámaní cana chéle já uni tañu chijehé tūhún sahá i ta cahún ña co xini tohún yehe”, nacachi a xihin dá. <sup>62</sup> Anda já naqueta Pedro cuahān da já nacasáhá sácu ndivaha da.

*Tá sácū ndaa na Jesús**(Mt. 26:67-68; Mr. 14:65)*

<sup>63</sup> Ta java dataa, da ndúu ndáá Jesús cán naçasáhá da sácū ndaa da ña. Ta naçani ñahá da. <sup>64</sup> Nachicaji da nuu á ta naçani da jahnda nuu á já naçasáhá da ndáca tühún da mé á já cáchí da já xihín á:

—Cachi yo já naçani jahnda nuun —cáchí da xihín á.

<sup>65</sup> Ta cuahá chága nuú ña núu cáhan na xihín á ña cáñahá na xihín á.

*Ndája ndíchí na Jesús**(Mt. 26:59-66; Mr. 14:55-64; Jn. 18:19-24)*

<sup>66</sup> Ta tá sa nativi já nataca na sacuahá nuú na Israel cán xihín na sacuahá nuú jutu cán xihín na jánaha ley Moisés cán viti. Já ñéhe na Jesús cuahan na cavií sahá nuú na cán. Ta tá sa nanditútú ndihi na cán ndúu na já nandaca tühún na Jesús já naçachi na já xihín á:

<sup>67</sup> —Caxi tühun xihín nde á cúun Cristo, da nachindahá Ndióxi cacomí cuéntá sahá ñayivi —naçachi na xihín á.

Anda já naçachi Jesús já xihín ná:

—Tá ajan ná cachi i xihín ndo ta chí a cándusa toho ndó yehe. <sup>68</sup> Ta cája i cuéntá a cáhan ndó xihín i tá ná ndaca tühún i ndohó. Ta cája i cuéntá ni a cándusa ndó janí ndó yehe. <sup>69</sup> Joo viti sa natandaa quiví cuhun yehe, da nachindahá Ndióxi nduu ñayivi ta coo i xoo cuáha Ndióxi indivi jáchí ín ndée mé á caja tóco ndihi ñaha —naçachi Jesús xihín ná.

<sup>70</sup> Anda já naçasáhá tóco ndihi na cán ndáca tühún na mé á já naçachi na já:

—Á jivi ndusa yóhó cúun in tühún jiní já jahyi Ndióxi, dá já —naçachi na.

Anda já naçachi Jesús já xihín ná:

—Ajan. Jivi cúu u tá ín cáchí ndó jan —naçachi Jesús.

<sup>71</sup> Anda já nacasáhá tóco ndihi na cán cáhan na já nacachi na já:

—Cọ ndítahan ndinducú chága yó ñayivi cacuu testigo nuú ña cáhan da yóho jáchi sa xíni johó í ña cáhan da ta chícaan da cuachi jata mé dá —nacachi na cán.

## 23

*Tá nandiquihva na Jesús ndáha Pilato*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Anda já nandaca ndichi ndihi na cán já ñéhe na Jesús nasahan na nu Pilato. <sup>2</sup> Ta cán nacasáhá na chícaan na cuachi jata já nacachi na já sahá:

—Natiin nde da yóho jáchi xíca nuu da jándivaa da ñayivi ñuu nde. Cáchi da ña có ndítahan toho nuú nde चाहvi nde jiuhún cuénta impuesto nuú da cómi cuénta saha yó ñuu Roma. Ta cáchi da ña mé dá cúu dá Cristo, da chindahá Ndióxi cacomí cuénta sahá ñayivi. Ta cáchi da cúu dá in rey —nacachi na cán xihin Pilato.

<sup>3</sup> Anda já nandaca tuhún Pilato Jesús já nacachi da já xihin á:

—Á mé a ndaa cúun in rey, da cómi cuénta sahá na Israel —nacachi da cán xihin Jesús.

Anda já nacachi Jesús já xihin dá:

—Ajan. Jivi cúu u tá quiahva cáchi ndó jan.

<sup>4</sup> Anda já nandicahan Pilato xihin na sacuaḥa nuú jutu cán ta xihin ñayivi ndúu cán já nacachi da já:

—Cọ ndíñeḥe mí vi nda cuachi quéa nacaja da yóho —nacachi Pilato.

<sup>5</sup> Joo ñayivi cuaha cán nacasáhá cáyuhú cóhó chága na já cáchi na já:

—Mé da jan naxica nuu da jándivaa da tóco ndihi ñayivi estado Judea xihin ña jánaḥa da nu ná. Ta janda Galilea

naçasáhá da jándivaa da ñayivi. Ta viti naxinu da ñuu nde cája da já —nacachi ñayivi cáyuhú na.

*Tá ñéhe na Jesús cuḡhan na nu Herodes*

<sup>6</sup> Tá naxini johó Pilato ña nacachi ñayivi cán já nandaca tuhún da na á cúú Jesús da estado Galilea. <sup>7</sup> Ta tá nacachi na ña ndusa cúú Jesús da estado Galilea já nachindahá Pilato Jesús ña ná cuhun a nuú Herodes, da cúú gobernador nuú ñayivi estado Galilea. Jáchi mé tañu já nasahin tóo da ñuu Jerusalén. <sup>8</sup> Tá naxini Herodes Jesús já nacajii íni da jáchi sa janda jihna cuni da Jesús cúni da. Jáchi cuahá tañu nandicani ñayivi nu dá sahá ña cája Jesús. Ta cúni da cuni da ña ná caja Jesús in ñaha xituhún. <sup>9</sup> Ta cuahá ndivaha ñaha nandaca tuhún Herodes cán Jesús joo coó nanducú ñehe a tuhun nu dá. <sup>10</sup> Ta tañu ñayivi cán ñúhu ri na sacuahá nuú jutú xihín na jánaha ley Moisés ta chí a juú quiahva ndúcú ndéé na chícaan na cuachi jata Jesús. <sup>11</sup> Anda já naçasáhá Herodes cája xixi da xihin Jesús ta quiahva já cája ri na cúú soldado da cán xihin á. Ta najácandixi na Jesús xihin jahmá lándá tátuhun jáhma sándixi in rey. Nacaja na já xihin á jáchi cúni na cuacu ndaa ñahá na. Tá nandihi já nachindahá tucu Herodes Jesús ña ná cuhun a nu Pilato. <sup>12</sup> Ta chí mé quivi já nandique táhan máni Herodes xihin Pilato jáchi jihna co cúni táhan toho da, nduu.

*Sácú ini na ndaja caja na cahni na Jesús*

(Mt. 27:15-26; Mr. 15:6-15; Jn. 18:39-19:16)

<sup>13</sup> Anda já najánditaca Pilato na cúú sacuahá nuú jutú cán xihín na jutixia xihín java ñayivi. <sup>14</sup> Já nacachi da já xihin ná:

—Mé ndó ñéhe ndó da yóho nacasaá da nuú i. Ta cáchi ndó ña xíca nuu da jándivaa da ñayivi. Joo sa naxini ndó ña nandaja ndíchí i da nu ndo. Ta ni in túhún toho cuachi

táhan ña cáhan ndó saha jan coó nanditahan i nu dá. <sup>15</sup> Ta ni Herodes coó cuachi ná ndiñehe jata dá sahá ña cán quea nanducú ñehe da da nuú i. Cuni joho vaha ndó: Coó saha cúú á ña quivi da. <sup>16</sup> Ña caja i quea jándoho i ini da. Anda já janí vi da cuhun da —nacachi Pilato cán xihin ná.

<sup>17</sup> Tañu víco pascua cán nasahiin costumbre nu Pilato janí da in táhan da ñúhu vecaa ña ná candoo vaha da nuú ñayivi. <sup>18</sup> Saha ña cán quea nacasáhá cáyuhú tóco ndihi ñayivi nu dá já cáchí na já:

—Cahní ndó da jan ta janí ndó Barrabás nuú nde —cáchí na cáyuhú na.

<sup>19</sup> Mé Barrabás yóho ndácaan da vecaa jáchi najátaca cuaha dá ñayivi ta nandicuita da xihin na sacuaaha ñuu Jerusalén cán ta cúú dá da sahní ndii. Saha ña cán quea ndácaan da vecaa. <sup>20</sup> Joo cúni Pilato janí da Jesús saha ña cán quea nacahan tucu da xihin ñayivi. <sup>21</sup> Joo ví ga ví nacasáhá na cán cáyuhú cóhó na nu dá já cáchí na já:

—Cata caa ndó da ndica crúxu. Cata caa ndó da.

<sup>22</sup> Ta anda já nacahan tucu Pilato ña cúú uni xihin ná já nacachi da já:

—Coó toho ña núu nahá nacaja toho da yóho. A cuú cahnda i chuun ña ná cahní na da jáchi coó cuachi da. Ña caja i quea cahnda i chuun ña ná jándoho na ini da. Anda já janí vi da —nacachi Pilato.

<sup>23</sup> Joo ví ga ví ndúcú ndée na cán cáyuhú na ña ná cata caa na Jesús ndica crúxu. Ta xihin ña ndúcú ndée na cán cáhan na ta ndúcú ndée ri na sacuaaha nuú jutú cán cáhan na. Saha ña cán quea natahnu ini Pilato. <sup>24</sup> Ta nacandúsa da caja da ña cúni na cán xihin Jesús. <sup>25</sup> Ta najaní da Barrabás jáchi da cán nacahan mé ná saha ña ná janí dá. Ta mé Barrabás yóho nasandacaan da vecaa saha ña najándivaa da ñayivi ta saha ña nasahní da ndii.

Anda já nandiquiahva da Jesús nu ná ña ná caja na tá cúni mé ná xihin á.

*Tá nacata caa na Jesús ndica crúxu*

*(Mt. 27:32-44; Mr. 15:21-32; Jn. 19:17-27)*

<sup>26</sup> Ta tá ñehe na Jesús cuahan na cata caa na a já naxini na in da naní Simón, da ñuu Cirene vaxi da ndihvi da ñuu Jerusalén. Ta já najacuhun ndáha ná da ña ná ndacojo da crúxu nuú taca Jesús cán. Ta nandico da Jesús cuahan da.

<sup>27</sup> Ta a juú quiahva cuahá ñayivi ndíco jatá cuahan na. Ta cuahá najihí sácu ndivaha na ta cáyuhú na cuahan na jatá jáchi táhnda ini na sahá. <sup>28</sup> Joo nandicoto nihni Jesús nu ná já nacachi a já xihin ná:

—Najihí, na ñuu Jerusalén, a cuacu toho ndó sahá yehe. Saha mé va ndó ta sahá jahyi ndó viti ndítahan cuacu ndó.

<sup>29</sup> Jáchi vaxi quivi já casahá ñayivi cachi na já: “Tahví nacuu najihí, na coo nacacu jahyi. Ta tahví nacuu na coo jahyí chíchi”, cachi na jáchi ndóho ndivaha ini na. <sup>30</sup> Mé tiempo já casahá ñayivi cachi na já: “Vá ná cuyu yucu jata yo já ná quivi”, cachi na. Ta cachi na xihín java yucu: “Chijehé ndó ndehe”, já cachi na sahá ña ndóho ndivaha ini na. <sup>31</sup> Candehé ndo ndá quiahva jándoho na ini i ta cúu u tátuhun in yitó cuí, dó tácu. Ta cája xíxi na xihín i joo xíxi chága caja na xihin ndóhó jáchi cúu ndó tátuhun in yitó íchi —nacachi Jesús xihín na cán.

<sup>32</sup> Ta tá ñehe na Jesús cuahan cata caa na a ndica crúxu já ñehe ri na ivi da cúu da quini cuahan na cata caa na da já ná quivi da xihin á. <sup>33</sup> Ta tá naxinu coo na in nuú naní lásá yiquí jíní ndi cán nacata caa na a ndica crúxu. Ta nacata caa ri na ivi da quini cán va: in da xoo cuáha Jesús ta inga da xoo íti a. <sup>34</sup> Ta tá cáta caa na Jesús ndica crúxu já nacachi a já:

—Tátá Ndióxi caja cáhnu ini ndó sahá ña cája ñayivi yóho xihín i. Jáchi co xíni na ndía cája na —nacachi Jesús.

Ta ndaja coo java soldado cán nacasáhá da sájíquí da sahá jáhma Jesús já queá nda da ná quee vaha ndiquehe da jáhma á. <sup>35</sup> Ta ñayivi ndúu cán sándehe ná nu tácaa Jesús ndica crúxu nani ná cúu jutixia nasacuíta na ndúu na sácú ndaa ñahá cán já cáchí na já:

—Najácacu da java ga ñayivi. Ta viti ná jacacu da mé dá tá mé a ndaa cúu dá Cristo, da nacaxi Ndióxi cacomí cuéntá sahá ñayivi —cáchí na sácú ndaa ñahá na.

<sup>36</sup> Ta jari java soldado sácú ndaa da Jesús ndúu da. Ta nacayati da cán nu Jesús já nachiñee da vino, dó iyá yúhu á ña ná coho a do. <sup>37</sup> Ta já cáchí da já cáyuhú da nu á:

—Tá ta mé a ndaa cúun rey, da cómí cuéntá sahá na Israel chindeé mún já ná a quívún —cáchí da.

<sup>38</sup> Ta nachindaa na in tabla ndica crúxu yati jini Jesús ta nu mé tabla cán nacahyí na: “Da yóho cúu rey nuú na Israel.” Ta mé ña yóho nacahyí na ña tuhun griego, ña cáhan na nación Grecia xihín tuhun latín, ña cáhan na ñuu Roma xihín tuhun hebrero, ña cáhan na Israel viti.

<sup>39</sup> Ta in táhan da quini tácaa ndica inga crúxu yati jiin á cán nacasáhá da cánahá da xihín á. Ja cáchí da ja:

—Tá mé a ndaa cúun Cristo, da nachindahá Ndióxi cacomí cuéntá sahá ñayivi chindeé mún já ná a quívún. Ta chindeé ndehe ja ná a quíví nde —cáchí da.

<sup>40</sup> Joo inga táhan da quini tácaa inga xoo jiin a cán nacasáhá da janani da da cáhan xihín Jesús cán ja nacachi da ja xihín dá:

—Á co yíhví tohún Ndióxi. Jachi in cúu yo ndóho iní yóho <sup>41</sup> joo mé Jesús yóho coó toho cuachi nacaja da. Ta mé cuití ví ndítahan ndoho iní ña ná chahví sahá cuachi nacaja í —nacachi da cán janani da inga da tácaa cán.

<sup>42</sup> Tá nandihi ja nacachi da ja xihín Jesús:

—Jesús, caja ndó ñamaní ndicuhun ini ndó sahá i tá ná casáhá ndó cacomí ndó cuéntá sahá ñayivi —ñacachi da xihín Jesús.

<sup>43</sup> Anda já ñacachi Jesús já xihín dá:

—Mé a ndaa ná cahan i xuhun ña mé quivi víti cuhún coún xihín i indiví —ñacachi a xihín dá.

### *Tá naxihi Jesús*

*(Mt. 27:45-56; Mr. 15:33-41; Jn. 19:28-30)*

<sup>44</sup> Ta tátuhun caxivi já ñacanaá ní cúu ñuyívi. Ta janda caa uni sahini já ñacasáhá nandiyehé tucu. <sup>45</sup> Nanaá nuú candii. Ta janda já nandatá java ndaa jáhma ndeé ña tácaa veñuhu cáhnu ñuu Jerusalén ña sáji nuu nuú yí ndivaha.

<sup>46</sup> Anda já ñacayuhú cóhó Jesús já cáchi a já:

—Tátá Ndióxi, ndáha mé ndó jándacoo i ínima i.

Ta tá ñacachi a ña yóho já naxihi va.

<sup>47</sup> Ta ndaja coo da sáhdá chuun nuú soldado cuéntá Roma cán tá naxini da tóco ndihi ña nayaha yóho já ñacasáhá cája cáhnu da Ndióxi já ñacachi da já:

—Mé a ndaa táhyí coo toho cuachi da yóho —ñacachi da.

<sup>48</sup> Ta tóco ndihi ñayivi ñasanduu cán, na naxini nuú naxihi Jesús jandá johó cáni na yica ndíca na sahá ña táhdá ini na saha Jesús já cuanúhu va na. <sup>49</sup> Joo tóco ndihi na xini táhan xihín Jesús ñacandoo na ndíta xíca na sándehe na. Ta tañu na cán ñasanduu ri najihí táhan na ñaquixi xihín á janda estado Galilea cán.

### *Tá ñachicaan na yiquí cuñu Jesús ini cáva*

*(Mt. 27:57-61; Mr. 15:42-47; Jn. 19:38-42)*

<sup>50</sup> Ta ndaja coo ñasahiin in dataa naní José, da ñuu Arimatea ña ndácaan estado Judea cán. Ta cúu dá in taa vaha, da cája ña ndaa cuití va. Ta cúu da in táhan na cómi cuéntá sahá na Israel. <sup>51</sup> Mé José yóho coo ñatahan ini da xihín ña ñacaja java ga na cán jáchi ndáti da casaa quivi



cacomí Ndióxi cuéntá sahá ñayivi. <sup>52</sup> Ta nasahan da cahan ndahví da xihin Pilato ña ná ndiquiahva da yiquí cuñu Jesús nu dá. <sup>53</sup> Ta chí nasahan Pilato ñamaní nu dá chí nasahan da najánuu da yiquí cuñu Jesús ndica crúxu cán. Já nachitíví ñahá da xihin jáhma vaha ta já nachicaan ñahá da ini in yávi ndacaan ndica cáva. Ta ni in túhún toho ndji a ñaha chícaan na ini mé cáva cán. <sup>54</sup> Mé quiví cán nasacuu a quiví cája ndíví ñayivi ñaha vehe na jáchi ja chá cacuu a quiví ndíquehe ndée ná sahá ña cán quea ndíhi ini na jáxinu na chuun cája na.

<sup>55</sup> Ta najihí, na nasandico jata Jesús janda tá naquixi a chí estado Galilea cán nasahan na sándehe na ndica cáva nuú najáqueta nuu na yiquí cuñu Jesús cán. <sup>56</sup> Ta tá nasaa na vehe na já nacaja ndíví na perfume xihin java ga ñaha támi sáhan ña ná jándicuchu na yiquí cuñu Jesús. Ta inga quiví itaan nandiquehe ndée ná tá quiahva nasahnda Ndióxi caja na janda sanahá.

## 24

### *Tá nanditacu tucu Jesús*

*(Mt. 28:1-10; Mr. 16:1-8; Jn. 20:1-10)*

<sup>1</sup> Ta tá sa nayaha quiví ndíquehe ndée ná ta naha chá quiví domingo já naquee tucu najihí cán cuahan na nuú nachicaan na yiquí cuñu Jesús ini cáva cán. Já ñéhe na perfume, dó nacaja tiaha na cán. Ta ndáca táhan java ga najihí xihin ná cuahan na. <sup>2</sup> Ta tá naxinu coo na cán já naxini na ña coo ga yuu ndájí ndaa yuhú cáva nuú nasandacaan yiquí cuñu Jesús. <sup>3</sup> Anda já naquihvi na ini cáva cán joo coo ga yiquí cuñu Jesús nanditahan na. <sup>4</sup> Ta chí nayihví na ta co xini na ndíca caja na. Ta jonáá va naxini na ndíta ivi dataa yati jíin ná. Ta a juú quiahva ndató yéhe jáhma ndíxi da cán. <sup>5</sup> Ta chí a juú quiahva yíhví najihí já

naçandayi na jandã quiãhva naçinu jini ná nu ñúhu. Anda já naçachi dataa cân já xihin ná:

—Co ndítahan toho ndinducú ndo in da tácu tañu nu sánduu ndii. <sup>6</sup> Coó toho Jesús ín yóho jáchi sa nanditacu va. Xíní ñúhú ndicuhun ini ndó ña naçachi a xihin ndo tá naçahin a estado Galilea. <sup>7</sup> Mé á cúú á da naçin-dahá Ndióxi nduu ñayivi ta sa naçachi a xihin ndo ña ndiquiahva na mé á ndahá ñayivi quini. Ta naçachi a xihin ndó ña cata caa na a ndica crúxu ta tá ná xinu uni quivi já nditacu tucu a —naçachi dataa cân.

<sup>8</sup> Anda já nandicuhun ini najihí cân ña naçachi Jesús xihin ná. <sup>9</sup> Chí naquee na cuahan na já nandicani ndihi na sahá ña yóho nuú na uxu in naçica tuun xihin Jesús xihin nuú java ga na ndúu cân viti. <sup>10</sup> Mé najihí cân, na naçahan cáxi tuhun ña yóho nuú na apóstol cân naçacuu María, ña ñuu Magdala xihin Juana xihin María, ña cúú náná Jacobo xihin java ga najihí. <sup>11</sup> Joo na apóstol, na naçica tuun xihin Jesús cân naçahan na ña cuéntó uun va queá. Sahá ña cân queá coó naçeen na candúsa na ña naçachi najihí cân xihin ná.

<sup>12</sup> Joo ndaja coo naqueta Pedro xínu da cuahan da sándehé da ini cáva nuú naçicaan na yiquí cuñu Jesús cân. Naçini da jáhma vaha ña naçativí a cân joo coó toho yiquí cuñu a. Ta chí naçatóntó da naquee da cuanúhu dá vehe da.

*Cátahan Jesús cuahan xihin ivi na cuahan chí ñuu Emaús  
(Mr. 16:12-13)*

<sup>13</sup> Ta mé quivi já ivi táhan na cúú cuéntá Jesús naquee na cuahan na in ñuu naní Emaús. Mé ñuu cân ñéhe táhan tátuhun uxu in kilometro xihin ñuu Jerusalén. <sup>14</sup> Ta ndítuhún na cân cásahan na saha tóco ndihi ña naçuu ñuu Jerusalén cân. <sup>15</sup> Ta nani ndítuhún na cásahan na já naçayati Jesús nu ná já naçasáhá xica mé á xihin ná

cuah̄an n̄a. <sup>16</sup> Ta vatí sándehé n̄a cán n̄u Jesús joo cōó n̄acuu ndicuni na mé á. <sup>17</sup> And̄a já n̄and̄aca tuhún Jesús n̄a cán já n̄acachi a já:

—Ndía ndítuhún ndó cásah̄an ndo. Ta ndavaha cácuéha ini ndó cásah̄an ndo —n̄acachi a xih̄in ná.

<sup>18</sup> Já in táhan n̄a cán, d̄a naní Cleofas n̄anducú ñeh̄e da tuhun n̄u á já n̄acachi da já:

—Níí cúú va n̄andicuīta nuu tuhun sah̄á ñ̄a n̄acuu ñ̄uu Jerusalén tañu quiv̄i yóho. In tuhún yóhó tañu n̄a ndúu cán cúú d̄a cō xini ñ̄a nayaha —n̄acachi da.

<sup>19</sup> And̄a já n̄acachi Jesús já xih̄in ná:

—Ndía n̄acuu, v̄aha.

Já n̄acachi n̄a cán já xih̄in á:

—Naquixi in d̄a naní Jesús chí ñ̄uu Nazaret ta n̄asacuu da in profeta cáhnu ndivaha jáchi cuah̄á ndivaha ñ̄a náhnu n̄acah̄an d̄a. Ta cuah̄á ndivaha ñ̄a náhnu n̄acaja da n̄u Ndióxi xih̄in nuú ñ̄ayivi. <sup>20</sup> Joo n̄a sacuah̄a nuú jut̄u xih̄in n̄a jutixia ñ̄uu nde n̄atiin na mé Jesús ta já n̄andiquiah̄va na d̄a ñ̄a ná cahní n̄a d̄a ta já n̄acata caa na d̄a ndica crúxu. <sup>21</sup> Joo mé nde n̄acah̄an nde ñ̄a mé Jesús cán cacuu da d̄a ndáti nde chindeé d̄a ndeh̄e, n̄a Israel yóho já ná a cája xixi ga n̄a ñ̄uu Roma xih̄in nde, n̄acah̄an nde. Joo n̄andihi va viti jáchi sa nayaha un̄i quiv̄i n̄axih̄i d̄a cán. <sup>22</sup> Vatí naqueta java najih̄í tañu nde yóho najáyih̄vi n̄a ndeh̄e jáchi naha chá n̄asah̄an n̄a nuú n̄andux̄u Jesús cán. <sup>23</sup> Ta cáhí n̄a ñ̄a cōó ga yiquí cuñu Jesús ndácaan cán. Sah̄á ñ̄a cán quea n̄axinu n̄a nuú n̄asanduu nde ta n̄andicani na nuú nde ñ̄a n̄acanáha java tát̄o Ndióxi n̄u ná ta n̄acachi na ñ̄a tácu va Jesús. <sup>24</sup> Ta java táhan d̄a xica tuun xih̄in nde cán n̄asah̄an d̄a sándehé d̄a ini cáva cán ta chí já ndusa cáa tá quiah̄va cáhí najih̄í. Ta cō mé Jesús n̄axini na —n̄acachi n̄a cán xih̄in Jesús.

<sup>25</sup> And̄a já n̄acachi Jesús já xih̄in n̄a cán:

—Ñayivi tóntó ndivaha cúu ndó. Jáchi yáncá ndivaha já xínu ini ndó candúsa ndó ña ndaa ña ñacahan na profeta sanahá. <sup>26</sup> Á co cándaa ini ndó ña jihna ñúhú nanditahan nuú da cúu Cristo ndoho ini da ta tá sa nandihí já ndiñehe jíco Ndióxi da já ndacojo da chuun cacomí da cuéntá sahá ñayivi —ñacachi Jesús.

<sup>27</sup> Anda já ñacasahá ndícani a nu ná ña ñacahyi nuú tuhun Ndióxi nu cáhan saha tóco ndihí ña ndítahan ndoho da cúu Cristo. Ñacasahá ndícani a janda libro ñacahyi Moisés sanahá janda quiahva ñaxinu a nu tóco ndihí libro ña ñacahyi na profeta sanahá.

<sup>28</sup> Ta tá ñaxinu coo na ñuu nuú cuahan na cán já ñacaja Jesús tátuhun yáha saa cuahan. <sup>29</sup> Joo mé na cán ñacaja ndúsa ná xihin á ña ná coo tóo a xihin ná. Já ñacachi na já xihin á:

—Yóho candoo ndó coo tóo ndó jáchi sa ñahini cuí va ta ja chá cuaá —ñacachi na xihin á.

Anda já ñaquihvi Jesús ini vehe ña candoo a xihin ná. <sup>30</sup> Ta tá ñasaco a nu mesa xihin ná já ñatiin a in pan já nandiquiahva ndixahvi nu Ndióxi sahá. Ta ñasahnda java ña já ñasahan ña nu ná. <sup>31</sup> Ta chí ivi laá ñanuna xini túni ná ta já nandicuni na mé á ña cúu á Jesús. Joo ivi laá najándiñúhú a mé á nu ná. <sup>32</sup> Anda já ñacachi xihin táhan na já:

—Íchi queá cájii ndivaha iní tá nandicani Jesús tuhun Ndióxi nu yo tá vaxí íchi xihin á —ñacachi xihin táhan na cán.

<sup>33</sup> Chí ivi laá ñaquehe tucu na íchi ña ndicó coo tucu na ñuu Jerusalén. Tá ñaxinu na cán nandíñehe ná ña ndítútú ndíhuxu in táhan na ñaxica tuun xihin Jesús cán ndúu na xihin java ga na ndúu cán. <sup>34</sup> Anda já ñacachi na cán xihin ndívi na yóho:

—Mé a ndaa táhyí nanditacu tucu Jesús, xitoho í. Ta naxini Simón mé á —naxachi na.

<sup>35</sup> Anda já nacasáhá ndíví nā cán ndícani na ña nasandaca táhan na xihín Jesús nasahan na. Ta nandicani na ña nandicuni na mé á nani nasahnda java mé á pan ña cuxu na.

*Náha Jesús mé á nuú nā naxica tuun xihín á  
(Mt. 28:16-20; Mr. 16:14-18; Jn. 20:19-23)*

<sup>36</sup> Ta nani ndítuhún yii ná ndúu na já naxinu coo Jesús nandaca ndichi a mahnú nā cán já naxahan Ndióxi á xihín ná já naxachi a já:

—Ná caja Ndióxi ña ná coo vaha ini ndó.

<sup>37</sup> Joo nayihví nā cán ta naxahan nā ña cúu á in ínima ndii va. <sup>38</sup> Joo já naxachi Jesús já:

—Ndá cuéntá queá yíhví ndó. Ta ndá cuéntá queá co cándusa ndó ña cúu yehe Jesús. <sup>39</sup> Candehé ndó ndahá i ta candehé ndó sahá i. Sa mé yehe cúu vj. Cani ndaa ndáha ndó yehe ta candehé vaha ndó yehe. Jáchí in ínima ndii coo toho yiquí cuñu a tá quiahva sándehe ndó ña ín yiquí cuñu yehe —naxachi Jesús xihín ná.

<sup>40</sup> Ta nani cáhan Jesús xihín ná já nacasáhá náha ndáha á xihín sahá nu ná. <sup>41</sup> Joo cámaní yíí candúsa nā cán ña cúu mé á Jesús jáchi naxatontó nā ta cájii ndivaha ini na ña cán queá naxachi tucu Jesús já xihín ná:

—Ndá ñaha ín nu ndó ná cuxu u —naxachi Jesús xihín ná.

<sup>42</sup> Anda já nasahan nā in túhun tiyacá nayata nu á xihín in ñimá ñuñu nu á. <sup>43</sup> Já natiin a ña ndáha ná já naxixi a ña nani sándehe nā a. <sup>44</sup> Tá nandihí já naxachi a já xihín ná:

—Sa nayaha tá ín naxachi i xihín ndó jihna. Sa naxinu coo tá ín naxahyí Moisés xihín nā profeta sanahá sahá ña ndítahan ndoho i. Ta jári David tá naxahyí da libro Salmos

já nacahan ri da cán va sahá ña ndoho i —nacachi a xihin na.

<sup>45</sup> Anda ja nacaja Jesús ña na ndinuna xini tuni na ja na canda ini na ña cuni cachi tuhun Ndióxi cán. <sup>46</sup> Ta nacachi a ja xihin na:

—Janda sanahá nacahyi ña ndítahan quivi yehe, da cúu Cristo, da nachindahá Ndióxi cacomí cuénta sahá ñayivi. Joo nacahyi ri ña ndítahan nditacu tucu u quivi uni. <sup>47</sup> Ña cán quea ndítahan nuu ñayivi caca nuu na cahan na tuhun vaha sahá i nii cúu ñuyivi ja na ndicó coo ini ñayivi ta jandacoo na cuachi cája na. Anda ja caja cáhn ini Ndióxi sahá ndihi cuachi na. Ta janda ñuu Jerusalén xini ñuhú ñayivi casahá na cahan na tuhun vaha sahá i ta ja cuahun na janda ndijáa ñuyivi. <sup>48</sup> Ta ndóhó cúu na naxini ndaja cáa ña nandoho i ña cán quea ndítahan nu ndó cuahun ndó caxi tuhun ndó tóco ndihi ña yóho nuu ñayivi. <sup>49</sup> Cuni joho vaha ndó jáchi chindahá i ínima yii Ndióxi ja na cañuhu a ini in in ndó. Jáchi quiahva ja nacachi Ndióxi, tátá i tá nasahan tuhun a nu ndo. Joo ndítahan canduu ndihi ndó ñuu Jerusalén yóho janda quiahva na ndicutú nda ínima ndo xihin ndée Ndióxi ña quixi indivi —nacachi Jesús xihin na.

*Tá nandaa Jesús cuahan indivi  
(Mr. 16:19-20)*

<sup>50</sup> Anda ja ndáca Jesús na cán nasahan na xihin á yuhú ñuu Betania. Ta nandiñehe a ndáha á ja nacaja yii á na. <sup>51</sup> Ta tá cája yii á na ja natavá xóo a mé á ja nandaa cuahan indivi. <sup>52</sup> Tá nandih nacaja cáhn na cán Jesús ja cavatá ndivaha na nandicó coo na ñuu Jerusalén. <sup>53</sup> Ta nii tiempo nasandu tuun na veñuhu cáhn cája cáhn na Ndióxi. Já na coo.

Tuhun saá ña najándacoo Jesucristo nu yo: El Nuevo  
Testamento en el mixteco de Silacayoapan  
New Testament in Mixtec, Silacayoapan (MX:mks:Mixtec,  
Silacayoapan)

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

### Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 27 Sep 2019 from source files dated 27 Sep 2019

7f2d3ecf-6d15-55a5-9081-6e970474df2f